



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

891.99

7-89

БЕРЕГИТЕ КНИГУ!

ОНА СЛУЖИТ НЕ ОДНОМУ, А МНОГИМ.

Возвращайте книгу в
срок, чтобы и другие
могли воспользоваться
_____ ею. _____

КОГДА КНИГА ВЗЯТА

20/11
11
242

of

5311

15 NOV 2011



891.99
7-89 ^{ուչ}

ՅՈՎՀԱՆՆԵՍ ԳՈՒՐԲԱԽԱՆ

5 - 9227 7-91

ԾԱՆՈԹ ՊԱՏԿԵՐՆԵՐ

2191



Центральная Саб. и.л. Ленина

ИНВЕНТАРНОМЪ 1936 г.

№ 0.-ՊԵՏԵՐԱՌԻՐԳ

«ԳՈՒՀԿԻՆԵԱՆ ԱՐԵԿԱՏԻՊ» ՀԱՅԿԱԿԱՆ ՏՊԱՐԱՆ

1903

ԲԵ. 1103
ԸՑ-Գ

60K.

04 APR 2013

28.133



I.

9227

Գ. քաղաքի Տիրամօր եկեղեցու
 յարկի տակ՝ ժամկոչներին յատկաց-
 րած մի խցիկ կայ. 188.. [Ժուականի
 ապրիլ ամսի սկզբում՝ մի կիրակի ա-
 ռաւօտ՝ այդ խցիկում կախած պատի ժամացոյցի
 միջից մի կկու է դուրս գալիս, չորս անգամ «կը-
 կու» է կանչում և կրկին մտնում ներս:

Հերթապահ ժամկոչ Մաթոսը, որը թախտի
 վրայ իր անկողնում քնած է, հէնց որ լսում է
 կկուի ձայնը, շարժել է սկսում, մի քանի
 անգամ տեղումը շուռ է գալիս, բարձրաձայն
 յօրանջելով ցատկում է անկողնից, հագնում է
 շորերն ու բարձրանում զանգակատուն. այդ օրը
 պատարագ պէտք է լինի:

Մաթոսը առաջ մեծ զանգն է տասնուհինգ
 անգամ կէնտ-կէնտ խփում, յետոյ մեծ զանգի
 ձայնին միացնում է հինգ միմեանցից փոքր զան-
 գերի ձայները և սկսում երկար ու բարակ զան-
 գահարել: Ըստերին այնպէս է թւում, կարծես,

Дозволено цензурою. С.-Петербургъ, 19-го Юня 1903 года.



876
41

«Пушкинская Скоропечатня», Лештуковъ, 4.

զանգակները ժամկոչ Մաթոսի ձեռում կենդանութիւն են ստացել և հա՛ «գիւլի-գիւլի-բիւլի-բիւլի գիւլի-գիւլի- դօն-դօն» են բղաւում: Քառորդ ժամի շափ այդպէս զանգահարելուց յետոյ՝ Մաթոսը զանգակատնից ցած է իջնում, եկեղեցու դռներն է բաց անում, մի քանի սրբերի առաջ մարած կանթեղներն է նորից վառում, մի քանի մոմկաշնների մէջ կիսավառ մոմեր է տնկում, արեմտեան դռնով դուրս է գալիս և մի ըոպէ աչքերը գցում քաղաքի տներին... Նրանք մութ ստուերներով են շրջապատւած, մթնշաղը դեռ ևս ամեն տեղ է տիրում: Մաթոսը վերադառնում է իր խցիկը, անկողինն է հաւաքում, թախտի տակից մի շիշ է դուրս բերում, փողը բերնին դնելով մնացած արագն էլ է խմում ու կրկին նոյն դռնով դուրս գալիս, բուրնոթու տուփը ձեռին: Մի ինչ որ բայաթի քթի տակից մրմռալով՝ մի քանի անգամ ետ ու առաջ քարի վրայ նա ման է դալիս, յետոյ նստում է սանդուխի ամենաբարձր աստիճանի վրայ և սկսում բուրնոթին քթածակերից կուշտ-կուշտ ներս քաշել: Մաթոսը կը լինի մօտ յիսուն տարեկան. բարձրահասակ է և շատ նիհար . զանգի առաջին կէսը անմազ է բոլորովին, միւսը սպիտակախառն սև ու երկայն մազերով է ծածկւած. միբուքի մի քանի մասերը բոլորովին սպիտակած

են, ձախ աչքն էլ շիւ է: Այդ շիւ աչքը շատերին է մոլորեցնում. այն ըոպէին՝ երբ Մաթոսի շիտակ նայող աչքը խոնարհութիւն և պատկառանք է արտայայտում, շիւ աչքը, ընդհակառակը, բարձրից է մտիկ տալիս ձեր երեսին և խորհրդաւոր կերպով ժպտում, որի ազդեցութեան տակ՝ դուք ձեզ վատ էք զգում. ձեզ այնպէս է թւում՝ կարծես, մի վատ բան էք արել, Մաթոսը իմանում է այդ և իր շիւ աչքովը հասկացնում է, որ եթէ ուզի, ամեն բան ուրիշին կը պատմի և ձեզ խայտառակ կանի: Բայց և այնպէս ծխականներից շատերը քաշում են ժամկոչ Մաթոսից, որովհետև նա է միայն տեսնում ամեն անգամ, թէ ինչպէս եկեղեցուն կից հանգստարանում՝ թագա մեռելների գերեզմանների վրայ ուշ գիշերներին լոյս է իջնում. այո, նա տեսնում է այդ և իսկոյն միւս օրը յայտնում տէրտէրներին, տէրտէրներն էլ — ծխականներին, իսկ վերջինները շտապում են զէպի լոյս իջած գերեզմանը, եօթը ծունկ աղօթք են անում նրա վրայ և հողից մի փոքր առնում շորի մէջ փաթաթում ու տանում տուն: Եւ ով այնուհետև հիւանդանայ՝ հողի ծրարը նրա բարձի տակն են դնում. հիւանդը երեք օրից բոլորովին առողջանում է ու տեղից վեր կենում: Մաթոսն է նոյնպէս տեսնում մի անգամ Ս. Սարգսի տօնից մի օր առաջ՝ նոյնպէս ուշ գիշերին՝

որ եկեղեցին յանկարծ լուսաւորեց. նա գնում գիշերապահ Մակիշին է զարթեցնում և երկսով գալիս, դրան ճեղքերից ներս են նայում. Մակիշը «չինչ չի տեսնում, բայց Մաթոսը տեսնում է որ Ս. Սարգիսը իր որդու հետ ձիան վրայ հեծած եկեղեցում ման է գալիս. բայց երբ դուռը բանալով նրանք ներս են մտնում, ամեն բան աներևութանում է: Միւս օրը ժողովուրդը իմանում է այդ և ահագին բազմութեամբ լցում եկեղեցի:

Մաթոսը լուրիշ երկրից է եկած և շատ է ափսոսում որ մայրը նրան Գ. քաղաքում չի ծնել: 20 տարի շարունակ ժամկոչութիւն է անում Տիրամօր եկեղեցում, շատ տէրտէրներ և տիրացուներ է տեսել, տիրացու Միմօնի հետ խնամիական կապերով է կապւած և իրան առհասարակ լաւ է զգում, որովհետև զիրքը հաստատ է, հմուտ և փորձւած ժամկոչ է համարւում:

Նա թէև լաւ եկամուտ ունի, բայց փող չի կարողանում պահել, որովհետև արագ շատ է սիրում և ամեն օր խմում է: Իսկ Ջատկի և Ծնընդեան տօներից անմիջապէս յետոյ՝ երկու-երեք շաբաթ շարունակ՝ նա համարեա ամեն օր հարբած է լինում, որովհետև Տիրամօր եկեղեցու բոլոր ծխականներին էլ այցելում է տէրտէրների հետ գուզընթացաբար ու «տօնը» շնորհաւորում:

րում: Մայրով է ման գալիս Մաթոսը. սայլի միջին արագի տակառիկ ունի դրած և մի մեծ քթոց: Սանդուխով վեր բարձրանալով՝ դրան առաջ ոտներովը ձայներ է հանում, կոկորդն է հուպ տալիս ու զօրով հագում. մին էլ տեսնես, դուռը կիսով չափ բացում է և տանտիկինը Մաթոսին մի թաս արագ է տալիս: «Ջնհաւոր Ծնունդ» կամ «Քրիստոս յարեաւ ի մօելոց» ասում է նա քաղցր ձայնով և քիթ ու մուկթը կծկում. արագի թասը տեսնելիս՝ իսկոյն թեկ տակից մի շիշ է հանում, ձագարը դնում բերնին և արագը ածում շիշի մէջ. եթէ մի թաս էլ տան, այն էլ կածի այնտեղ և յետոյ, խմորեղէնն ու ձւերը փէշի մէջ ածած, գլուխ տալով ցած է իջնում, ձւերն ու խմորեղէնը դարսում քթոցի մէջ, արագն էլ, եթէ շիշը լեցւել է արդէն, տակառի վերեւի ծակը բաց է անում և կըլկլացնելով ածում այնտեղ ու շիշը դատարկում: Պատահում է որ տէրտէրն ու տիրացուն նրանից առաջ են մտնում ծխականի տունը. Մաթոսը մինչև նրանց դուրս գալը սպասում է դրան մօտ: Ներսից «ըր՛ ո-ըր՛ ո, մը՛ ո-մը՛ ո» ձայներ են գալիս նրա ականջին. բայց հէնց որ մըմուցը կտըրւում է, տէրտէրն ու տիրացուն շտապ-շտապ դուրս գալիս, Մաթոսն էլ արագի շիշը թեկ տակ դրած առաջ է գալիս ու «տօնը» շնորհաւորում:

Երեք օր տէրաէրնների հետ միաժամանակ տնից
-տուն ման գալով՝ Մաթոսը երկու տակառիկ
արաղ, մի քանի հազար ներկած ձու և ահագին
քանակութեամբ խմորեղէն է հաւաքում ու տա-
նում տուն: Չուն ու խմորեղէնը նրա երեխաներն
են ուտում, իսկ ինքը երկու երեք շաբաթ ան-
ընդհատ արաղ է խմում ու քէֆ քաշում: Այդ
ժամանակամիջոցում ծխականներից շատերն են
նկատում, որ եկեղեցու զանգակները սովորա-
կանից շատ աւելի երկար են դողանջում, աւելի
ձայնեղ են դառնում և քաղցրահնչին: Մաթոսը
նրանց, կարծես, մի առանձին կենդանութիւն է
հաղորդում: Մի անգամ, կէսօրից մի փոքր ան-
ցած, Մաթոսը վեր առնում արաղով լիքը շիշը
ծոցն է դնում ու բարձրանում զանգակատուն.
ինչքան ժամանակ է մնում նա այնտեղ, յայտնի
չէ, միայն թէ հեռում նա ինչ որ կրակ տեսնե-
լով՝ սկսում է բոլոր ուժովը «դան-դան-դան»
հրդեհի զանգ խփել. նրան ձայնակցում են միւս
եկեղեցիների զանգերը. մարդիկ տներից դուրս են
թափւում, դէս ու դէն են վազում, հրդեհի տեղն
են ուզում իմանալ. վերջիվերջոյ յայտնւում է,
որ ոչ մի հրդեհ չկայ, այլ միայն Փանոս աղայի
բակում չորս հատ խոզ են խանձել: Տէր Խաչա-
տուրը այդ առիթով թէև շատ է բարկանում
Մաթոսի վրայ, բայց տիրացու Սիմօնը, Մաթո-

սի խնամին, մէջ է մտնում, ուրիշին մեղա-
պարտ է դուրս բերում ու Մաթոսին ազատում
փորձանքից:

Իր պաշտօնի մէջ Մաթոսը առհասարակ
ծոյլ է. դժւար գործերը կամ իր ընկեր — ժամ-
կոչ Գաբօյին է յանձնում և կամ գիշերապահ
Մակիչին. այդ երկուսը Մաթոսի անմիջական
ազդեցութեան տակ են գտնւում, նրա հետ էլ
արաղ են խմում և ընկերութիւն անում:

II.

Եկեղեցու հարաւային կողմի ծառերի միջից
հաստափոր մի մարդ ետփնջու մէջ փաթաթ-
ւած դուրս է գալիս և մօտենում սանդուխին.
դա գիշերապահ Մակիչն է, Մաթոսի մօտիկ ըն-
կերը:

Առաւօտեան գով քամին և զանգակների
դողանջիւնն են նրան անուշ քնից վեր կացրել.
թէ չէ՛ պահապանների տնակում փափուկ ետ-
փնջու մէջ փաթաթւած, թախտի վրայ նա
ամբողջ գիշերը անուշ քուն էր քաշում. այդ կեր-
պով է նա առհասարակ պահպանում իրան յանձ-
նրած եկեղեցին. և, պէտք է ասել, դեռևս ոչ մի

գող նրա օրով այնտեղ չի մտել. Մակիչի խորմ-
փոցից սարսափահար լինելով՝ նրանք հեռու-հե-
ռու են ման գալիս: Մակիչը հաստ ու յաղթան-
գամ տղամարդ է, մօտ 40 տարեկան. անհոգ,
ծոյլ և բթամիտ է, բայց աղաւնի շատ է սիրում.
Իր տան կտրի տակ միշտ աղաւնիներ է ունե-
նում պահած:

— Հը՛, քէօփակ, ողջունում է նրան Մաթո-
սը, սանդուխի մօտ կանգնած տեսնելով: Մակիչը
նրան բարձրաձայն յօրանջելով է միայն պատաս-
խանում:

— Վեր առ, աչքերդ շուտ կը բացուին, ա-
սում է Մաթոսը, բուրնոթու տուփը ցոյց տա-
լով:

— Քէֆս ըսկի լաւ չէ, Մաթոս, մըթմըթում
է Մակիչը՝ յամբաքայլ վեր բարձրանալով. նա
նստում է Մաթոսի կողքին և սկսում բուրնոթի
քաշել, հազալ ու փոշտալ:

— Հը՛, ինչ էլաւ քեզ, տօ. էջը հօ քթիդ
տակին չխանձւեց. հողեմ ես քու գլոխը, ինչքան
ես խմել, որ քէֆդ լաւ չի, պըտի սըվորես, տօ,
պըտի սըվորես...

— Գըսըվորեմ, Մաթոս, եավաշ-եավաշ կը-
սըվորեմ... համ էլ փիս երազ եմ տեսել:

— Ի՞նչ ես տեսել:

— Մի էգ եղունիկ տեսայ... էկաւ ու մեր

տան կտրին նստեց, իմ որձ եղունիկի հետ չիզի
-բիզի արեց ու երկսով թռան ու փախան. էդ,
ասենք, հէչ... ոտիս վրայ շուռ եմ գալի; այ
տղայ, տեսնում եմ ինչ... մի հատ էլ անծուխի
նման սև ազուաւ եղունիկներիս բնի մօտ ա նըս-
տած. շւացնում եմ, փափաղովս եմ վախացնում,
քար եմ փնտրում որ խփեմ, հայ դէս, հայ դէն,
չէլաւ... անիծածը թռաւ ու եալլահ... եղունիկ-
ներիս բունը մտաւ. էդ սահաթին ես էլ թարսի
նման զարթնեցի. էլ չիմացայ թէ ինչ էլաւ...
Լաւ բան չի ազուաւը, Մաթոս:

— Ի՞նչ ա որ:

— Ազուաւը հէնց իմանաս տէր Խաչատուրն
ա. նա ինձ դուրս կանի, կըտեսնես:

— Ա՛յ թէ դուրս չարաւ, էն ժամանակ ինձ
ի՞նչ կըտաս:

— Զըխչըխը չի լսում, ասում ա, սաղ գի-
շերը քնած ես մնում, ասում ա, սաքի ինքը գի-
շերները ըսկի չի քնում:

— Ի՞նչ կըտաս, քեզ ասում եմ, երկու
բօթիլ արաղ կառնես...

— Երկու բօթիլ... Մաթոս, քու խաթրու
իրէքն էլ, չորսն էլ կառնեմ. ինչքան փող ըլի
մօտիս՝ քեզ փէշքաշ ա, թաք, քեզ դուբբան,
տէր խաչատուրը ինձ դուրս չանի:

— Աըխային կաց, սարսաղ, քանի տիրացու

Միմօնը սաղ ա՛ իմ ճանն էլ ալչու կրկանգնի,
քոնն էլ:

— Ախար դու մարդ ես է, Մաթոս...

Այդ միջոցին փողոցի դրան կողմից ոտների
ձայներ են լսուում. Մաթոսը վեր է կենում նըս-
տած տեղից, Մակիչն էլ է իսկոյն ցատկում ու
մի կողմ քաշուում. նրանք երկսով լճու դէպի
դուռն են նայում:

— Տօ՛, մտիը էլի, լսուում է այն կողմից:
Մաթոսը ճանաչում է իր ընկեր—ժամկոչ Գաբոյի
ձայնը և կրկին նստում: Գալիս են տիրացունե-
րից երկուսը, Գասպարն ու Մինասը, ձեռներին
մի-մի աշտանակ բռնած: Յոգնած ու խղճուկ
ձայնով նրանք բարև են տալիս, զգուշութեամբ
սանդուխով վեր են բարձրանում և աշտանակնե-
րը տանում եկեղեցի: Նրանց ետևից մի ոտի
վրայ կաղալով գալիս է և Գաբօն:

— Բարի լոյս, ասում է նա մշմշալով և իս-
կոյն նստում քարէ սանդուխի վրայ:

— Աստու բարին քեզ, պատասխանում է
Մակիչը ու նորից նստում Մաթոսի մօտ:

— Հը՛, պնշածակերդ ընչի՛ ես ուռցրել, քէօ-
փակ, հարցնում է Մաթոսը:

— Օհ, շատ փիս յոգնած եմ, իմ տունը
ախար ճրտեղ ա...

— Աշտանակները ընչի՛ ես տիրացուների ձե-
ռը տուել, քէօփակ, խեղճ ես ձեանում...

— Սուս, ետվաշ խօսա, խարել եմ. տէր
Խաչատուրն ա հրամայել, ասացի, ձեռաց հաւա-
տացին. օհ, ոտներս...

— Մեռելը դու թաղեցիր, քէլէխի հացը դու
կերար, բարձին ու դօշակին դու տէր դառար,
մեզ համար ըսկի մի բօթիլ արաղ չառեցիր, քէօ-
փակ, հալա մարդ էլ ես խարում...

— Թող, թէ Աստուածդ կըսիրես, Մաթոս.
արաղ ես ուզում, արաղ կառնեմ. էնպէս եմ
յոգնած, էնպէս եմ յոգնած...

— Ընչի՛, ինչ ես արել:

Հալա հարցնում ես էլ... էրէկ ախար տէր
Խաչատուրը քեզ էր հրամայել որ նրա տունը
զնաս. ընչի՛ ինձ զրկեցիր:

— Չատ էլ լաւ արեցի:

— Բազարից մի ջլալ ալիը վզիս դրած մին-
չև նրա տունն եմ տարել... օֆ, վզաքորս հալա
ցաւում ա. ետոյ... կոտրած անկաջով դատարկ
դազանը Փանոս աղայի մօտ եմ տարել ու իւզով
լիքը ետ բերել. էդ քեզ էրկու. ծիծաղում ես,
հն... ետոյ... տէրտէրակնոջ լազանը—իրա նման
ահագին գատ ա—քաշ տալով ընչախ էյ... քա-
ղաքի ծէրը, կլեկչի Օվակի մօտ եմ տարել. քաղ-
ցած-ծարաւ էնքան եմ սպասել, մինչև որ կլե-

կել եմ տուել, առել ու ետ բերել... ոտներս, ոտներս մինչև հըմի էլ են մզմզում:

— Եանի Օվակի տանը ըսկի բան չկերանք:

— Երկու թէ իրէք թիքա դօլմա եմ կերել. հացի վերջին հասայ, դրանով ինչ կըլի: Լազանը բերել եմ, տօ, սահաթը վեցն ա դառել, էլի ուզում ա մեռելի տունը դրկի:

— Այ տղայ, դրանում ըսկի ջիգեար չի մնացել, նկատում է Մակիչը:

— Ըսկի որ ասես, հաստատում է Գաբօն:

— Ախար, Գաբօ, երազումս էլ տեսայ ես նրան:

— Ո՞ւմ տեսար:

— Սե ազոսու տեսայ, ո՞վ պըտի ըլի, տէր Խաչատուրն ա հալբաթ:

— Եավաշ խօսա, տմբօ, տէր Խաչատրի անունը տալիս՝ առաջ մի լաւ չորս կողմդ նայիր, ետոյ բերանդ բաց արա, նկատում է Մաթոսը ու դառնում Գաբօյին.

— Օվակի դօշակը քանիսո՞վ ծախեցիր, դըրուստն ասա:

— Օվակի դօշակը... երկու մանէթով. ինչ կայ:

— Սուտ ես ասում. չորս մանէթ երկու աբասի փող ես առել ջհուղից:

— Ո՞վ ասաւ:

— Քեզ ինչ. ընչի՞ ես սուտ ասում, քէօփակ. էսօր երկու աբասին կըհանես ու մեզ համար աբաղ կըբերես:

— Բա դու թագա խաբար չես լսել, կըտրում է նրան յանկարծ Գաբօն:

— Ի՞նչ խաբար:

— Ախար դու մի ասիլ Թխմաղենց հարսը ծանր հիւանդացել ա, էսօր-էգուց, ասում են, կը մեռնի:

— Ի՞նչ ես ասում:

— Հաստատ. քո բաժինն ա, ա՛յ... պա՛-պա՛ պա՛-պա՛... չորս բարձ, երկու դօշակ, երկու վերմակ, ինչքան ասես շորեր քեզ կըհասնի...

— Եանի դըրուստ հիւանդ ա՛:

— Տօ, քեզ բան եմ ասում. տատմէր Մրօն իր բերնովը էրէկ պատմում էր մեր տանը. էսօր տէր Խաչատրին բալքի հաղորդելու կանչեն:

— Էդ լաւ բան ա՛...

— Գու էդտեղ 25 մանէթ փող կաշխատես, Մաթոս, չունքի հարուստ օջաղ ա... մանդալը կրակ ես գցել թէ չէ...

— 2եմ գցել:

— Գնամ, պատրաստեմ... ճֆ, ոտներս...

Նրանք բարձրանում են տեղներից. Գաբօն մտնում է եկեղեցի, Մակիչը դանդաղ քայլերով սանդուխից ցած է իջնում ու դուրս գալիս դէ-

պի փողոց. Մաթոսն էլ մտնում է իր խցիկը, թեք է ընկնում թախտի վրայ ու մտածում, թէ Թխմագենց հարսը որ մեռնի, իրան ինչքան բան է հասնելու:

Հինգ ըոպէից Գարօն ածուխով լիքը մանգալը երկու ձեռներով բռնած նորից դուրս է գալիս սանդուխի վրայ. մանգալը դնում է քարի վրայ և սկսում է ածուխը կրակել ու հովահարել:

Գարօն Մաթոսից հինգ տարով փոքր է. հասակը՝ կարճ, փորը՝ ներս ընկած, դուխը՝ խիաբի նման նեղ ու երկար, վիզը՝ բարակ և նոյնպէս երկար. աջ ոտի վրայ կաղում է. լալկան մարդու ձայն ունի. դիրքը հաստատ չէ, որովհետեւ տէր Խաչատրին դուր չի գալիս. էսօր-էգուց նա կարող է դուրս անել: Գարօն աղէսի նման խորամանկ է, նապաստակի նման էլ երկչոտ. եթէ տեղը գցեց՝ անպատճառ սրան-նրան կըխաբի. բայց եթէ խաբեբայութեան մէջ բռնուց՝ ձկան նման բերանը ջուր առած՝ մի տեղում ինչպէս նապաստակ կուչ է գալիս ու պզգում. այդ ըոպէին ուզում ես՝ թակիր նրան, ուզում ես՝ հայհոյիր, ինչ ուզում ես, ասա, ամեն բան սուս ու փուս կուլ կըտայ, մինչև որ վերջապէս զգես, խզաս ու հեռանաս մօտիցը: Մաթոսի հետ նա ընկերութիւն է անում, ժամանակ-ժամանակ ա-

րադով է նրան պատում, շատ անգամ էլ յիմար ու խեղճ է ձևանում, որպէս զի, փորձանքի մէջ ընկնելիս, նրա պաշտպանութիւնը վայել է ու մնայ իր պաշտօնի մէջ:

Ածուխի կոյտը սկսում է կարմրել, նրա դանազան ճեղքերից կապտագոյն լեզակներ են դուրս ցցւում: Այդ միջոցին երեցփոխանի օգնական մուխսի Բաղալը համարեա անձայն քայլերով վեր է բարձրանում սանդուխով ու մտնում եկեղեցի. երեսը ջերմեռանդօրէն խաչակնքելով՝ նա չորում է Տիրամօր պատկերի առաջ և աղօթում. յետոյ, սաղմոսներ շնչալով, մօտենում է մոմերի պահարանին ու բանալիով բաց անում:

III

876
41

Մուխսի Բաղալը կըլինի 45 տարեկան. կարճահասակ է և նիհար. սև մազն ու միրուքը կիսով չափ սպիտակել են արդէն. թոյլ իրանը առաջ է թեքւած. աջ թիակի ոսկորը դուրս է ցցւած. կլոր ու սևորակ աչքերի նայւածքը ժրպտուն է միշտ: Նրա բնաւորութեան մէջ՝ ջերմեռանդութիւնն ու միամտութիւնը էթանագին ցուցամոլութեան հետ ամենահաշտ կերպով են ապրում: Եկեղեցին, ժամերգութիւնը, տէրտէրներն



ու այն ամենը ինչ որ եկեղեցուն է վերաբերում՝
Բաղալի համար սրբութիւններ են: Վարք Սրբոցն
ու Ս. Գիրքը նա ազատ է կարդում. էֆիմերդէն-
նոյնպէս. հմուտ երազաբանի հռչակ է վայելում
արհեստաւորների ու մանրավաճառների շրջան-
ներում: Տասնումէկ տարի առաջ նա պսակել է
սիրուն աղջկայ վրայ. տուն էլ ունի, պարտէզ էլ
ունի, ամեն բանով գոհ է Աստուծոց, միայն մի
մանչ զաւակ է փափագում ունենալ, բայց Աստ-
ւած տասնումէկ տարի շարունակ նրա կնոջ-
սիրունիկ Եղսիի արգանդը կապած է պահում,
երեխայ չի տալիս: Այդ ժամանակամիջոցում՝ ինչ-
քան Եղսիին ծանօթ փոքրիկ աղջիկներ կային,
բոլորն էլ մեծանում-մարդի են դնում, կէստ ու
ջուխտ երեխաներ են ծնում և իրանց օջախները
շենցնում. իսկ Եղսին ու Բաղալը բուէճներին մամն
մենակ են մնում բոլորովին իրանց տան չորս
պատերի մէջ. այդ հանգամանքը մեծ խոց է
դառնում Բաղալի սրտի համար. նա արդէն սկը-
տում է մինչև անգամ ատել իր ամուսնուն. նա-
խատում է նրան ամեն մի յարմար բոլորովին, ա-
մաչացնում է և լացացնում, բայց իր սրտի խոր-
քում՝ յոյսը դեռ ևս չի կտրում բոլորովին: Ամեն
անգամ, երբ որևէ արհեստաւորի տանը երեխայ
է ծնւում և Բաղալն էլ սովորաբար հրաւիրւած
է լինում այնտեղ, նա երկար չի նստում, որով-

հետև նորածին մանուկի ձայնը և ծնողների ու-
րախ դէմքերը նրա նախանձն են սաստիկ գըր-
գըռում. տար-տար իւղով-ձուռն լաւաշի մէջ փա-
թաթելով՝ վեր առնում ծոցն է դնում և շտա-
պում դէպի տուն. հէնց որ ոտը դնում է իր տան
շեմի վրայ՝ նրա և Եղսիի միջև հետևեալն է սո-
վորաբար կատարւում:

— Եղսի, էստեղ արի, շուտ արա.

— Ի՞նչ կայ, Բաղալ, որտեղից ես գալի.

— Հալա հարցնում ես էլ թէ որտեղից եմ
գալի... չես ամաչում.

— Ընչի պէտք ա ամաչեմ ախար.

— Սուս արա, թէ չէ... վեր առ էս լաւաշը,
իւղով-ձուռն ա միջումը, կնունքից եմ գալիս, դօ-
շիդ քսիր ու կեր, բալքի էս անգամ ուղուր բլի...
էհ, ինչքան իւղով-ձուռն ա որ դու կերար. մի բան
էլա չելաւ... ո՞ր ես սեղանի վրայ դնում, տօ.
կեր, կեր ասում եմ, չար սահաթ կայ, բարի սա-
հաթ կայ, կեր...

Բաղալը լաւաշի ծայրը զօրով կնկայ բերանն
է կոխում.

— Բաղալ, քե մատաղ, բաց թող, բերանս ցա-
ւում ա, կուտեմ, կուտեմ, հրէս ուտում եմ էլի...
թէ Աստւած կամենայ, ես էլ երեխի տէր կըլեմ:

— Ախար երբ է... էսքան տարի գլուխս ես
մենակ իւղում.

— Ընչի եմ գլուխդ իւղում, քան...

— Բա ի՞նչ ես անում... դու կնիկ ես եանի...

— Կնիկ չեմ բա ի՞նչ եմ.

— Սատանի տոպրակ ես դու, հա...

— Վայ ես քօռանամ, էդ ինչ խօսք ա որ դու ինձ ասում ես, Բաղալ, վայ իմ գլխին...

— Վայը իմ գլխին ա եկել որ քեզ նման ջորուն եմ պատահել, բղաւում է Բաղալը, ոտը տափին տալով. բայց երբ նկատում է որ Եղսիի աչքերից արցունք է թափւում, իսկոյն լրջանում է ու ձայնը մեղմացնում.

— Լաւ, լաւ, էլ ո՞ւր ես լաց ըլում. սուտ եմ ասում, վեր առ, էս կտորն էլ կեր ու պրծիր:

Եղսին համ ուտում է, համ էլ հեկեկում:

— Սիրտս այրւած է, Եղսի ջան, էնդուր համար եմ տաքանում, թէ չէ ընչի պէտք ա քո սիրտը ցաւացնեմ. ի՞նչ արած, էլի դու իմ Եղսին ես, օտար չես, հօ չեմ կարա քեզ ուրիշի հետ փոխել...

Եւ ահա, այդ խօսքերից յետոյ Եղսին աչքերը սրբում-հանգստանում է, իսկ Բաղալը գլուխակոր ման է գալիս սենեակում ու շշնջում.

— Մեղայ Տէր, մեղայ, մեղայ... Սիրտ իմ խռովեցաւ ի փորի իմում և ես թոթափեցայ իբրև մարախ: Այլ արդարք ժառանգեսցեն գերկիր և բնակեսցեն յաւիտեանս յաւիտենից...

Բաղալի աղօթքները վերջապէս հասնում են Աստծու ականջին:

Մի ամառային գիշեր՝ Բաղալն ու Եղսին, իրանց տան կտրին պառկած, անուշ քուն էին քաշում. կէս գիշերը արդէն վաղուց էր անցել. գունատ աստղերը շիւ աչքերի նման երկնակամարի վրայ բլբլում էին. լուսինը, ամալի կտորտանքների տակ փոփոխակի մտնել ու դուրս գալով, շուրջը աղօտ լոյս էր շաղ տալիս և հետըզհետէ արեամուտ հորիզոնին մօտենում. շան հաջոց անգամ չէր լսւում այդ միջոցին. երբեմն-երբեմն միայն կատունների տուփոտ համերգների արձագանքը դուրս էր թռչում շինարների ու նռնիների խորքերից և գալիս ու ըռպէսբար խանգարում էր կտրներում պառկած հայ քրիստոնեաների խաղաղ քունը:

Բաղալն ու Եղսին այնուամենայնիւ շատ անուշ քուն էին քաշում այդ պահուն. նազուկ գեփիւռն էլ թրթռում էր նրանց շուրջը, դուրեկան մեղեդիներ էր շշնջում նրանց ականջներին և ծառ ու ծաղկի բուրմունք էր որ անընդհատ բերում ու խփում էր Բաղալի քիթին: Նոյն այդ քիթը, վերմակի տակից մերթընդմերթ դուրս ցցւելով, կամ խրտնած ոչխարի նման էր բառաչում և կամ ոտներից կախ տւած խոզուկի նման խռվում.

մի-մի անգամ էլ կիսաջարդ շոնգուրի չփշփոց էր լսում Բաղալեան քթի խորքերից:

Եղսին յանկարծ զարթնում է և այլ ևս չի կարողանում քնել. խորհրդաւոր ժպիտը դէմքին՝ նա մերթ սքտի զարկն է տնտղում, մերթ երկընքի աստղերին է մտիկ տալիս և մերթ անհամբեր հայեացքներ գցում կողքին պառկած ամուսնու վրայ:

—Սուրբ Մարիամ Աստուածածին, դուրբան ըլեմ քո լիս երեսին, շշնչում է նա վերջապէս ու նստում տեղաշորի վրայ:

—Որձակը փախաւ, բղաւում է յանկարծ Բաղալը քնի մէջ: Եղսին ժպտում է, բերանը մօտեցնում է ամուսնու ականջին ու փսփստում.

—Բաղալ, քե մատաղ, վեր կաց, բան եմ ասում...

Բայց Բաղալը, ըստերևութին, ոչինչ չէր լսում. պարբերաբար քթից ու բերնից «խը՛ռ-բը՛ռ-փը՛շ-փո՛ւհ» ձայներ արձակելով՝ նա անվըրդով քուն էր քաշում:

—Ոնց պէտք ա ուրախանայ, երբ իմանայ թէ բանը ինչումն ա, ախ, Տէր Աստուած, մտածում է Եղսին, աչքերը Բաղալի դէմքին մեխած:

—Բաղալ, Բաղալ, զարթիր է, ախար բան եմ ուզում ասել, կրկնում է նա, ամուսնու թեւից թեթեակի քաշելով:

—Սուս արա, կտրում է նրան այս անգամ Բաղալը:

Նա երեսը միւս կողմն է շուռ տալիս ու գլուխը կոխում բարձի տակ: Այդ իսկ ըոպէին՝ սոսկալի ճիշ է բարձրանում նրանց կտրի ծայքին. երկու կատու, մէկմէկու հետ պինդ փաթաթւած, միքանի ըոպէ միմեանց դունչ են շանկուում և յետոյ, կտրից ցած գլորելով, ընկնում են փշալի մամուլսենու խորքը:

—Տէր ողորմեա, բացագանչում է Բաղալը, քնաթաթախ տեղից վեր թռչելով: Աչքերը կիսախուփ, շրթունքները ծամծամելով՝ քանի մի ըոպէ նա իր շուրջն է նայում, առանց իրան հաշիւ տալու թէ որտեղ է և ինչ է անում:

—Վայ, նանէ, սիրտս թրթռաց, կոտորելք գուք, նստիր, Բաղալ, նստիր, մի վախիր, անիծւած կատուներն էին, շշնչում է Եղսին. Բաղալը սուս ու փուս նստում է:

—Բաղալ, քե մատաղ, ինչքան ժամանակ ա զարթնել եմ, քունս չի տանում...

Բայց Բաղալը նրան չի լսում. գլուխը երկու ձեռների մէջ առած՝ նա անշարժ նստել է, մինչդեռ շրթունքները հազիւ լսելի ձայնով շշնչում են.

—Ես ննջեցի և ի քուն եղէ. զարթեայ և Տէր ընդունող իմ էր: Ի բաց կացէք յինէն ամենե-

քեան, ոչք գործէք զանօրէնութիւն: Որպէս գերեզման բաց է կոկորդ նոցա և լեզուք իւրեանց նենգաւորք եղին...

—Անտէր կատուները էլի կտուրն են բարձրանում, նկատում է Եղսին.

—Վաստակեցայ ես ի հեծութեան իմում, լուացի զամենայն գիշեր զմահիճս իմ և արտասուօք իմովք զանկողինս իմ թացի:

—Դ՛ն քնչի չես քնում, յանկարծ դառնում է Բաղալը իր ամուսնուն և ղեռ ևս պատասխան չստացած՝ շարունակում դժգոհ ձայնով.

—Ընչի չես թողնում որ մարդ կարգին քնի. էլի սկսեցիր քո հին խաղերը... անամօթ.

—Ով ա խաղալ ուզում, քն...

—Դ՛ն, ո՞վ պէտք ա ուզի, ես հօ չեմ.

—Քե մատաղ, Բաղալ, մի բարկանար, ուրիշ բան կայ.

—Ուրիշ ի՞նչ կայ ախար...

Եղսին նրա ականջին մի բան է շնչում. Բաղալը մի ըոպէ մնում է սառած. բայց շուտով է սթափում, բռնում է Եղսիի թևից և դողդոջուն ձայնով հարցնում.

—Սուտ հօ չես ասում.

—Վայ ես քօռանամ, ընչի պէտք ա սուտ ասեմ.

—Տես, հա, քանի անգամ ասել ես, սուտ ա դուրս եկել, հանաքը դէն թող, թէ չէ...

—Այ մարդ, թուրք հօ չես, քեզ բան եմ ասում, հանաքի վախտ ա, ա՛յ, ա՛յ, էլի սրտիս տակովը լիլփում ա...

—Լիլփում ա...

—Եավաշ, ո՞ւր ես բղաւում, հարևան կտրից ձայներ են գալիս:

—Վայ ես նրա նազուկ տոտիկներին մատաղ ըլեմ, լիլփում ա, հա՛... փառք ողորմութենիդ, Աստուած, տաժնումէկ տարւայ մեր աղօթքները վերջապէս դու լսեցիր:

—Դէհ, ի՞նչ կասես հըմի, Բաղալ, կնիկ եմ թէ ջորի.

—Լաւ, լաւ, իհարկէ հըմի կնիկ ես, ես քո հոգուն մատաղ... ախ, Աստուած... Ահա ծանեա-զի Աստուած իմ ես դու: ՁԱստուած օրհնեցից ի բանս իմ և զՏէր գովեցից ի խօսս իմ: Եղսի ջան, մեղայ քեզի, հազար մեղայ...

—Հա՛, հըմի ես մեղայ ասում, ուրբաթ օրը բա ընչեր էիր ասում:

—Էլ չեմ ասի, հոգուդ դուրբան, մըմնջում է Բաղալը, անսովոր գգւանքով փայփայելով իր անգին ամուսնուն, որը նրա համար վերջապէս մի համարին ու հարազատ երեխայ լոյս աշխարհ պէտք է բերէ:

Այդ առաւօտ Բաղալը սովորականից աւելի վաղ է վեր կենում և շտապում դէպի եկեղեցի.

նրա քայլերը աւելի մեծ ու հաստատ են, երեւին անսովոր ուրախութիւն է փայլում, իսկ շըրթունքները անընդհատ շշնշում են.

— Առեալ ածից զքեզ ի տուն մօր իմոյ և ի սենեակ յղացելոյն զիս: Պորտ քո թակոյկ ճախարակեայ, որովայն քո՝ որպէս զշեղչ ցորենույ փակեալ շուշանաւ. երկու ստինք քո իբրև ուլս երկւորիս այծեման...

— Զի եթէ ննջեսցեն երկուք՝ ջեռուցանեն զմիմեանս. իսկ մին՝ զիարդ ջեռնուցու...

— Մեղայ Տէր, մեղայ, մեղայ... Դիր Տէր պահպան բերանոյ իմոյ և զգուռն ամուրջը թանց իմոց...

Նոյն օրւայ կէսօրին՝ Բաղալը նստած էր իր պարտէզում, կլոր սեղանի առաջ, փայտէ նրստարանի վրայ: Աջ կողմում՝ թթենու ճիւղերից սև մետաքսեայ փողկապն էր կախ արել. ակնոցը քթի ծայրին դրած՝ մատները անդադար շըրթունքներին տանելով՝ թացացնում էր և նրանցով էֆիմերդէի թերթերը շուռ տալիս. նա ինչ որ փնտրտում էր և միևնոյն ժամանակ, զլուխը յաճախակի դէպի տան դուռը դարձնելով, անհամբերութեան նշաններ էր ցոյց տալիս դէմքի վրայ, որովհետև տատմէր Մրօն ու Եղսին բաւական ժամանակ է առանձնացել էին սենեակում ու դուրս չէին գալիս. Բաղալը սաստիկ

մտատանջութեան մէջ էր. անպատճառ հիմակաւնից էր նա կամենում իմանալ՝ Եղսին մանչ տղայ է ծնելու թէ աղջիկ. այդ նպատակով էլ հէնց ինքն էր եկեղեցուց ուղղակի գնացել ու տատմէր Մրօյին վեր առել իր մօտ բերել, որպէս զի խկութիւնը նրա բերնից էլ լսի ու հանգստանայ:

— Լուռ ոռճիկ է, մարդոյ լեարդ ուտել՝ գանձ տեսանէ, մարդոյ ոսկը ուտել՝ ի բանտ մտանէ, կարդում է նա լսելի ձայնով. զլուխը աջ ու ձախ շարժելով՝ թերթերը կրկին դէս ու դէն է շուռ տալիս ու կարդում.

— Ուղտ տեսանես՝ պարոն է. օձն թէ ի մահճի տեսանես՝ կին առնես. թէ ոտից մէջն խաղայ՝ մարդ վիճի ընդ ինքն և ծեծւի... ո՛ր ա ախար, մրթմրթում է Բաղալը, մի քանի թերթ կս շուռ է տալիս ու դէսից-դէնից կարդում.

— Թէ վերի շըթանց մէջն խաղայ՝ համբուրէ զո և կամի. թէ ամեն փորն խաղայ՝ զինչ խնդրէ յԱստուծոյ՝ տայ նմա Աստուած: Թթու մածուն ուտելն հարամ ոռճիկ է... Գա... գա...

— Ի՞նչ ես էդտեղ կարդում, դու ի՞նձ լսիր, ես քեզ աւելի լաւ բան կասեմ, լսում է յանկարծ Բաղալը իր ականջի մօտ ու տեղից վեր թըռչում: Տատմէր Մրօն ու Եղսին կանգնած էին նրա քամակին. Եղսին լուռ էր, իսկ տատմէրի դէմքին ինչ որ հեզնական ժպիտ էր փայլում.

«վայ, աղջիկ ա լինելու» ասում ա Բաղալը մըտքումը և ինչ որ մի թեղ է, կարծես, կտրուում նրա սրտից...

—Մի վախի՛ր, Բաղալ, աչքալոյս եմ քեզ տալիս, ասում է տատմէր Մրօն, աչ ձեռը նրա ուսին դնելով. խորհրդաւոր ձայնով նա աւելացնում է.

—Մանչ տղայ ա բերելու քո Եղսին, Բաղալ, լաւ իմանաս հա... մսխալով կշռած, կանգունով էլ չափած են իմ խօսքերը, էդ հօ դու գիտես...

—Դիտեմ, գիտեմ, ինչպէս չէ, սաղ ըլես, Աստած քեզ կեանք տայ, ա քիւր, ախար հոգիս վկայում ա որ մանչ տղայ պըտի ըլի, չունքի էրկու անգամ գաւազան եմ տեսել երազումս. էֆիմերդէն հրէս ասում ա քիւր... Բաղալը խտապով վեր է առնում սեղանի վրայից էֆիմերդէն և քրաց արած երեսում փնտրտում ու կարդում.

—Հրէս, ա՛յ... գա... գայլի միս թէ ուտես, չէ, սա չի... գաւա... ա՛յ, ա՛յ, գաւազան ի ձեռին՝ որդի է, տեսնում ես, ա քիւր, կարդա, հրէս, գրած ա քի՛ գաւազան ի ձեռին որդի ա... ախար էրկու անգամ երազ եմ տեսել, գաւազանը ձեռիս եկեղեցի էի գնում...

—Հողեմ ես քու էֆիմերդէնի գլոխը, եանի նա ինձանից լաւ է հասկանում, բացազանչում է տատմէր Մրօն վիրաւորած ձայնով:

—2է, ընչի... դու էլ, դու ի հարկէ, ա քիւր, քու բանը ուրիշ ա, հոգուդ դուրբան, մի բարկանալ, քեզ ով ա ինչ ասում, հալբաթ որ...

—Դէ լաւ, լաւ, ետոյ կիմանաս, թէ ես ինչ կնիկ եմ. քեզ մի անգամ ասացի որ իմ խօսքը մըսխալով կշռած, կանգունով էլ չափած ա, չմոռանաս, մնաք բարև, պէտք ըլի՛ էլի կըգամ:

Տատմէր Մրօն Եղսիի ուղեկցութեամբ գնում է դէպի փողոցի դուռը. Բաղալն էլ մըթմըթալով հետևում է նրանց: Փողոցի դրան մօտ՝ տատմէր Մրօն Եղսիին ինչ որ ծածուկ խրատներ է տալիս, Բաղալին էլ մի լաւ շանչ է անում ու դուրս գալիս փողոց:

Ս. Աստածածանի վերափոխումից մօտ երկու շաբաթ առաջ՝ մի կիրակի օր՝ առաւօտեան ժամից յետոյ Բաղալի տանը հիւրեր են հաւաքուում. սեղանի գլխին նստել է ծերունի Տէր Բարսամը. նրանից աչ ու ձախ նստել են՝ կլեկչի Նազարը-Բաղալի քաւորը, Խունդուզենց Սըաբը, Արթին բիծան, ուստա Օվակը և մի քանի ուրիշ պատւաւոր ծերունիներ. տիրացու Մինասն էլ սեղանի միւս ծայրին է նստել. նրանք արդէն թէյի վերջին բաժակներն են դատարկում: Երկու ժամից աւելի է ինչ որ նրանք Բաղալի նորածին որդուն տեսութեան են եկել. երեխան կայտառ է և սիրուն դէմք ունի. Բաղալը մի քանի ան-

դամ պատմում է հիւրերին երեխայի աշխարհ
գալու մանրամասնութիւնները. ուրախութիւնից
նա չի կարողանում երկար ժամանակ մի տե-
ղում նստել. իսկ երբ նորածնի լացի ձայնն է
լսում, իսկոյն ծննդկանի սենեակն է վազում և
Նզարին նկատողութիւն անում, որպէս զի երե-
խային չլացացնի, այլ ծիծ տայ ու քնացնի:

— Բաղալ, էստեղ արի, ասում է վերջապէս
Տէր Բարսամբ.

— Տէրտէր ջան, կարգիդ դուրբան, հրամայիր,
ասում է նա մօտենալով:

— Նստիր, որդի:

Բաղալը նստում է. սեղանի շուրջը բազմած
ծերունիները իրանց միրուքների ծայրերը տէր-
հօրն են դարձնում ու սպասում թէ ինչ կասի:

— Ե՞րբ ես ուզում որ տղէդ մկրտենք, որդի,
հարցնում է Տէր Բարսամբ.

— Տէրտէր ջան, ուխտ եմ արել որ Ս. Աստ-
ւածածնի վերափոխման օրը մկրտել տամ:

— Մի քիչ անյարմար օր ես ընտրել, Բա-
ղալ, պատարագը երկար կը քաշի:

— Տէրտէր ջան, միրուքիդ դուրբան, սուրբ ուխտ
եմ արել, ոնց անենք, ուզում ես որ ուխտս քանդեմ:

— Աստուած ոչ անի, որդի, ընչի ես ուխտդ
քանդում. թող էդպէս ըլի. էդ լա՛ւ... անունը բա-
ի՛նչ ես դնելու.

— Անունը.

— Հա, անունը, մէջ է մտնում կլեկչի նա-
զարը.

— Անունը... ետոյ կասեմ.

— Հը՛մի ասա, էլի, նկատում է Տէր Բար-
սամբ:

Բաղալը լուռ է մնում. տէրհայրը շարունա-
կում է.

— Ուզում ես, թող տիրացու Մինասը՝ անուն-
ների ցանկը կարդայ, դու էլ ջոկիր, որը քէֆդ ա
ուզում. տիրացու, կարդա՛:

Տիրացու Մինասը շորս ծալած մի թուղթ
է ծոցիցը հանում և սկսում շուտ-շուտ կար-
դալ.

— Սողոմոն և Դաւիթ, Զաքարիա և Զմաւոն,
Մաթոս և Մաղաքիէլ, Երեմիա և Աբիմէլէք...

— 2է, չէ, էդ չէլաւ, լրջութեամբ նկատում
է Բաղալը:

— Ընչի՞ չէլաւ, որդի, թող կարդայ, վերջումը
ախար ուրիշ անուններ էլ ա գրած:

— Որ էդպէս ա, թող վերջիցը կարդայ.

— Վերջիցը կարդա, տիրացու.

— Կուռնելիոս և Սեղրեստրոս, Ղունկիանոս
և Կիպրիանոս, կոտրատիոս և...

— Տօ, միւս երեսի վերջիցը կարդա, հրա-
մայում է Տէր Բարսամբ.

—Հայկ և Արամ, Աշոտ և Աբգար, Արտաշէս և Արտաւազդ, Տիգրան և Վարդան, Սանդուխտ և Զարուհի...

—Ո՛ւր ես կնկայ անուններ կարդում, բղաւում է Բաղալը սաստիկ բարկացած և ցատքում տեղից:

—Նստիր, որդի, նստիր, հանգստացնում է նրան Տէր Բարսամբ: Տիրացուն ուզում է կարգալը շարունակել, բայց տէրհայրը նրան նշան է տալիս որ լռի և դառնում է Բաղալին.

—Հը՛, Բաղալ, ջոկեցիր...

—Ըսկի մի բան...

—Ոնց թէ մի բան... բա երեխան անուն չպէտք է ունենայ:

—Ան թ ա ո ա մ պըտի՛ ըլի իմ: Երեխի անունը, տէրտէր ջան:

—Ան թ ա ո ա մ... էդ հօ կնկայ անուն ա, Բաղալ.

—Կնիկը ինչ ա որ նրա անունը Ան թ ա ո ա մ ըլի, բղաւում է Բաղալը սաստիկ կարմրելով:

—Էդ անունը մանչին սազ չի գալ, վախ վրխելով նկատում է կլեկչի նազարը և աչքերը տնկում Տէր Բարսամի միրուքին.

—Էդ կարելի բան չի, նկատում են միւս ծերունիները մինը միւսի ետեից:

—Ընչի սազ չի գալ ախար, աւելի պինդ է բղաւում Բաղալը, ինքնիրան մոռանալով.—Քաւոր, բեզ եմ հարցնում, աղջիկն ա լաւ թէ մանչ տղէն, հը՛...

—Հալբաթ մանչ տղէն ա լաւը, մըթմըթում է կլեկչի նազարը:

—Քաւոր ջան, գլուխս ջարդիր, խօսքս մի կոտրիր էս անգամ, թող Ան թ ա ո ա մ ըլի իմ որդու անունը. Աստծու ողորմութեամբ՝ իմ որդին, տէրտէր ջան, իմ որդու որդին, թողան թողը, դիփ-դիփ ա ն թ ա ո ա մ պէտք ա ըլեն իրանց սուրբ յիշատակներովը. յոյս իմ և Աստած իմ... Դաւիթ մարգարէն ոնց ա ասում, տէրտէր ջան...

—Ո՛նց ա ասում...

—Ասում ա. «Օգնեսցէ նոցա Տէր, և փրկեսցէ զնոսա. ապրեսցուցէ զնոսա ի մեղաւորաց և կեցուցէ զնոսա և նորա ժառանգեսցեն զերկիր»:

—Օրհնեալ է Աստած, ասում է կլեկչի նազարը, բոլորովին փափկանալով:

Աւդ միջոցին «վնվ, վնվ» ձայնում է օրօրոցի միջից անանուն հողածինը:

—Հրէս, անմեղ հրեշտակն էլ ա վկայում, տէրտէր ջան, բացազանչում է Բաղալն ու վազում օրօրոցի մօտ:

Երեխայի «վնվը» լսելուց յետոյ՝ կլեկչի նազարը ինչ որ անյայտ գորութիւնից կաշկանդուում

է և մնում սառած: Տէր Բարսամբ, որ բոլոր ժամանակը միրուքը շոյելով լուռ նստել էր, վերջապէս սթափուում է և աջ ձեռի մի քանի մատները առաջ պարզում. մի քանի ձեռներ իսկոյն նրան բուրնոթու ամաններ են մօտեցնում: Բուրնոթին ծանր ու բարակ քաշելուց յետոյ՝ նա մատները վերարկուի աստառին է քսում և բարձրանում տեղից. նրա հետ բարձրանում են և միւսները ու գնում երեխայի օրօրոցի մօտ. Տէր Բարսամբ խաչակնքում է նորածնին և ասում.

— Բաղալ, Ան թ ա ո ա մ ես ուզում, թող Ան թ ա ո ա մ ըլի սրա անունը. քաւեալ եմ ես յանւանէ քումմէ, որդի մարդոյ:

— Ամեն, ասում են բոլորը միաձայն:

Կէս ժամ անցած, երբ հիւրերը արդէն հեռացել էին, Բաղալը մի գիրք ձեռին մտախոհման էր գալիս սենեակում. գիրքը, իհարկէ, էֆիմերդէն էր. աջ ձեռի ցուցամատը երկու թերթերի մէջտեղը մտցրած՝ նա մերթ օրօրոցին էր մօտենում, ուշիուշով գննում էր նորածնի մագն ու աչքունքը և մերթ գիրքը բաց անում ու կարդում. այնտեղ հետեւեալն էր գրած.

Լ Ո Ւ Ս Ն Ի 25.

Օրն պահպանութիւն է ամենայն իրաց. մի երդնուլ, մի երդումն տալ, և մի ուրեք գնալ, զի

չար է և յայն օրն ծնանի նեռն. որ ծնանի շ է կ լինի, շատամօրուս և ցանկացող. փախուցեալն դառնայ, հիւանդն մեռանի, երազն սուտ է:

Բանը նրանումն է որ երեխան լուսնի 25-ին է ծնւած և Բաղալը ամեն անգամ, երբ վերևի տողերն է կարդում, մտատանջութիւնների մէջ է ընկնում, որովհետև նրա երեխայի մագերն ու աչքունքը սև են, մինչդեռ էֆիմերդէն գրում է, թէ լուսնի 25-ին ծնւածը շէկ կըլինի. Բաղալը այս անգամ պարզ տեսնում էր, որ իր աչքով տեսածը և գրքում կարդացածը միմեանց չէին բռնում: Երկար մտատանջելուց յետոյ վերջապէս այս անգամ էլ նա «տ ե ս ն ե ն ք վ ե ը ջ ը ի ն շ կ լ ի ն ի» ասելով գիրքը դնում է տեղը և գնում ծննդկանի մօտ: Ս. Աստուածածնի Վերափոխման օրը երեխային մկրտում են և անունը դնում Ան թ ա ո ա մ: Երկու շաբաթ շարունակ Ան թ ա ո ա մ ը մեծ ախորժակով մօր կաթն էր ծծում ու քնում: Բաղալը նրա մօտից համարեա չէր հեռանում. երկար ու բարակ դէմքին էր մտիկ տալիս, իր դէմքի հետ շատ նման էր գտնում, համբուրում էր, հանաքներ էր անում և երկու ձեռներովը պինդ գրկախառնած՝ յաճախ դուրս էր գալիս փողոցի դուռը, որպէս զի անցորդներն էլ տեսնեն նրա սիրունիկ Անթառամին ու հիանան: Երբորդ շաբաթուայ կիսից երեխայի խաղաղ քունը խան-

գարւում է, փորն էլ լուծել է սկսում. զնալով հետզհետէ նա թուլանում է ու դեղնում. մի գիշեր էլ փչում է հոգին և մեռնում, 35 օր միայն աշխարհիս երեսին ապրելով: Ո՞վ կարող էր նկարագրել Բաղալի և նրա ամուսնու կսկիծները. այն սրտաճմլիկ տեսարանները, յորոնք տեղի ունեցան նրանց տանը՝ տեսնողների աղիքներն էին գալարում: Մօտ վեց ամիս Բաղալը խելագարներից ոչնչով համարեա չէր զանազանում: Վերջիվերջոյ՝ Եղսիի՝ աղերսանքը, տէրտէրների խրատներն ու մխիթարանքը, ծանօթների և տատմէր Մրօյի տւած յոյսերը նրան մի փոքր հանգստացնում են: Այժմ նա գիշեր-ցերեկ ծնկաչոք աղօթք է անում, աղքատներին փող է բաժանում և յոյս ունի, որ Աստուած նրան նորից կըլսի և կըկին մի մանչ տղայ կընծայի... Բաղալը հաւատում է, և նրա հաւատը անսասան է...

IV

Տիրացու Գասպարն ու տիրացու Մինասը, աշտանակները իրանց տեղերը դնելուց յետոյ, մտնում են այն սենեակը, որտեղ տէրտէրներն ու տիրացուներն են հաւաքւում, ու սուսիկ-փուսիկ իրանց համար մասլահաթի բռնւում: Չուտով

նրանց ընկերանում են և տիրացու Դաւիթն ու Մելքոնը: Դրանք 15-20 տարեկան երիտասարդներ են, աշխարհականի շորեր են հագնում դեռ ևս, աղքատ ծնողների զաւակներ են. դէսից-դէսից շարականն ու ժամագիրքը մի կերպ կարգալ են սովորել, սրան-նրան աղաչելով եկեղեցու սպասաւոր են ընդունւել, սև փող են աշխատում ու պահում իրանց չքաւոր ծնողներին: Դաւիթն ու Մինասը տէրտէրների հետ են ման գալիս, նրանց աշխատանքը լաւ է. բայց Գասպարի ու Մելքոնի եկամուտները դեռ ևս աննախանձելի են ու պատահական: Այդ չորս տիրացուներն էլ զարմանալի համբերութեամբ են զինւած և սրտերի խորքերում օրօրում են այն յոյսը, թէ մի օր հալբաթ նրանց համար էլ մի-մի՜ւ աղաբար էր դուրս կըգայ, նրանք էլ կըդառնան մի-մի ծխատէր քահանայ և հասարակական գործերի առաջնորդ...

Նոյն սենեակը միմեանց ետեից մտնում են՝ Սահակ սարկաւազն ու տիրացու Սիմօնը: Նրանց տեսնելիս՝ ջահիլները իսկոյն վեր են կենում տեղներից, շապիկներն են հագնում ու գնում եկեղեցի:

Սահակ սարկաւազը 60-ը անցկացրած բարձրահասակ ծերունի է. շարժողութիւնները ծանր ու դանդաղ. երեսը մագաղաթի գոյն ունի. մագն

ու միջուկը ձիւնի նման սպիտակ են. միջուկի
և բեխերի միջին մասերը բուրնոթի շատ քաշե-
լուց դեղձանիկի գոյն են ստացել. բերնումը ա-
տամ չունի, արծաթիթը մեծ ու կապտագոյն է,
սպունգի նման ծակոտիկներով պատած. ականջ-
ները ծանր են լսում: Չարական, աւետարան,
քարոզ բոլորը անգիր է իմանում Սահակ սար-
կաւազը. 40 տարի շարունակ միևնոյն բանը ա-
ռանց հասկանալու և զարմանալի արագութեամբ
կրկնելով՝ նրա լեզուն այլ ևս ոչ մի բան չի կարող
ծանր ասել. ընդհակառակը, սարսափելի թռիչք-
ներ է անում և ամեն ինչ մի քանի րոպէսում ասում
ու վերջացնում. ոչ մի որոշ բառ չի կարելի ջո-
կել նրա ընթերցանութեան ժամանակ. և ամեն
ինչ հոմերական անտարբերութեամբ է նա կար-
դում և երգում եկեղեցու մէջ:

Թէև Սահակ սարկաւազը արագ շատ է սի-
րում, բայց հեզ ու հանդարտ բնաւորութիւն ու-
նի. բարկանալը ինչ բան է՝ չի իմանում. ով ինչ
է ասում, նրան էլ հաւատում է. ամենի հետ ըն-
կերաբար է վարում, այդ պատճառով ոչ ոք
նրանից չի քաշում: Իր տանը նա մենակ է ապ-
րում. սիրում է ուտել, խմել, մանաւանդ քնել:
Հէնց որ առաւօտեան պատարագից յետոյ տուն
է վերադառնում՝ արագ խմում-հաց է ուտում և
իսկոյն պառկում-քնում. 4-5 ժամից վեր է կե-

նում, թէյ է խմում, տաք եղանակներին պատը-
զամբն է դուրս գալիս, շան հետ է մի փոքր խա-
ղում, աստղերին է մտիկ տալիս, գկրտում ու մի-
րութն է շոյում, թեւերի միջից լու է բռնում, յե-
տոյ նորից նստում-արագ է խմում, իրիկնահաց
է ուտում և իսկոյն քնում: Քնի մէջ Սահակ սար-
կաւազը սարսափելի ձայներ է հանում կոկորդից,
խորթում է, տնքում է, քիչ է մնում որ խեղդւի,
մի քանի անգամ գիշերը զարթնում է, քափ ու
քրտինքն է սրբում, բուրնոթի է քաշում ու նո-
րից գլուխը դնում բարձին. նրա ասելովը՝ երա-
զումը վիշապների և սատանաների հետ է միշտ
կռիւներ մղում:

Տարին մի անգամ՝ Սահակ սարկաւազի ծնըն-
դեան տարեդարձին՝ նրա մօտ մարդիկ են հա-
ւաքում, տօնն են շնորհաւորում, ուտում և
խմում: Այդտեղ հիւրերը ամեն ջանք են գործ
դնում, որպէս զի սարկաւազին ինչքան կարելի
է շատ խմացնեն. և երբ այդ նրանց աջողում
է, այն ժամանակ խնդրում են նրանից, որպէս զի
արբեցողութեան վրայ յօրինած այն տաղը երգէ,
որը «Վուռնկ» ամսագրիցն է մի ժամանակ ար-
տագրել, իրանից էլ եղանակ է յարմարացրել և
երգում է միայն այն ժամանակ, երբ շատ խմած
է լինում: Վիզը ճուկ, ձեռի ափը քրտնախառ

երեսին դրած, կիսաբաց աչքերը բլբլացնելով նա երգում է:

«Փսխէ, գերեսն ի վերայ դնէ,

«Շունն գայ, գրեբանն լիզէ.

«Նա հանց գիտէ թէ գիւր կինն է.

«Տկեալ գրեբանըն կու սրբէ...

—Ը՛ր՛ը՛... ձայն են բռնում խողները. սարկաւազը սկսում է հաղալ, կոկորդում հաւաքւած լորձունքը զօրով կուլ է տալիս, ճանապարհ է բաց անում և նորից, գլուխը դէպի վեր ցցած, աւելի բարձր և յուսահատ ձայնով երգում.

«Ինին շնութեան է օգնական,

«Սողոմական ախտն շարժէ.

«Պօղոս առ մեզ կու հրամայէ,

«Հարբեցութիւնն խիստ չորէ.

«Ով գարբենայն հալալ է ասէ,

«Զերդ շունն ի տէրն կու հաչէ.

«Ո՛վ որ խրատիս համն ճաշէ,

«Զարքայութիւնն ժառանգէ...

Վերջին տողերը հեկեկալով է նա երգում և արցունքի շիթեր են դուրս ցայտում նրա աչքերից. սենեակում լուսթիւն է տիրում. սարկաւազը, երկու արմուկները սեղանի վրայ դրած, գլուխն էլ արմուկների վրայ՝ մի քանի ըոպէ մնում է անշարժ և անխօս. բայց ահա քթածա-

կերը ուռցնելով նա սկսում է խորը շունչ առնել ու խումփալ... այդտեղ արդէն հիւրերը թողնում են նրան այդ դրութեան մէջ և ցրւում իրանց տները:

V

Ուրիշ մարդ է բոլորովին տիրացու Սիմօնը: Նա կըլինի 35 տարեկան. թխադէմ է և բարձրահասակ. գանգն էլ, կզակն էլ սրածայր են. առաջինը—դէպի վեր, երկրորդը—դէպի ցած. բիթը մեծ է և սերգեկիւծակ. ականջները—խոշոր, առագաստների նման առաջ պարզւած. ճակատը նեղ ու փոս ընկած. գլուխն ու երեսը սեւազոյն հարուստ բուսականութեամբ է ծածկւած. աչքերի արտայայտութիւնը սարսափ է ազդում առաջին անգամից. բիբերը—սաստիկ սև, իսկ սպիտակուցները փայլուն ու խոշոր. և երբ աչքերի խնձորիկները աջ ու ձախ է նա շարժում, Չէկսպիբի Օտէլլոյի կատաղի աչքերը ուղղակի գալիս են ու ձեր առաջ պատկերանում: Բայց խաբուսիկ է այդ կերպարանքը, որովհետև հէնց որ տիրացու Սիմօնը խօսել է սկսում՝ խողի երկիւղն էլ, սարսափն էլ անհետանում են իսկոյն: Հէնց որ նա բերանը բաց է անում որ խօսի՝

նոյն բուսական նրա փոս ընկած ճակատի վրայ՝ վերևից-ներքև մի քանի կնճիռներ են կազմուում և դէմքին տառապեալի արտայայտութիւն տալիս: Նրա ձայնը թոյլ է և բարակ, բարձր շեշտերը ոչխարի բառաչն են յիշեցնում: Երբ նա բերանն է բաց անում որ խօսի՝ նրա անագին մտալի լեզուն, չկարողանալով բերնի մէջ ազատ շարժել, սպիտակ ատամների միջով անդադար դուրս է սողում և տիրացու Սիմօնին թոյլ չի տալիս ազատ ու արձակ խօսել: Իսկ երբ նա որևէ պատճառով տաքանում է և աշխատում շատ ու շուտ խօսել, այն ժամանակ լեզւի մտալի ծայրն էլ արագ-արագ սկսում է դուրս սողալ շրթունքների միջից և թուր ու լորձունքի անձրևներ ցօղել խօսակցի երեսին: Թէև այդ կերպով տիրացու Սիմօնին աջողում է արտայայտել իր մտքերն ու զգացմունքները, բայց դրա հետ միասին նա պարզ ցոյց է տալիս, որ, թրւատ լինելով, սաստիկ է կակազում. մի բան՝ որը ուրիշ ժամանակ նա մեծ ճարպիկութեամբ է աշխատում սքօղել: Բայց և այնպէս՝ Սիմօնը քահանայական թեկնածու է համարւում, թէ տիրացութիւն է անում և թէ վարժապետութիւն. մի ժամանակ բժշկութիւնով էլ էր պարապում, բայց շուտով է թողնում այդ փէշակը, զանազան անախորժութիւնների պատճառով: Տէր Խա-

չատրի տիրացուն է նա և մտերիմը. հոգևոր կոչումը վաղուց է ստացել, սև վերարկու է հագնում ու ցիլինդր դնում գլխին. շատ հպարտ է և բարկացող. փոքրներին սիրում է հրամայել, ծաղրել, իսկ մեծերի առաջ քծնում է առանց ամաչելու: Ս. գաւառիցն է նա եկած. Գ. քաղաքում այնտեղից եկած մարդիկ շատ կան. չարքաշ են նրանք և տաղանդաւոր. նրանք իրանց դիւզերից տրեխներով են դուրս գալիս և ցիլինդրը գլխին վերադառնում, ինչպէս, օրինակ, Փանոս աղան: Հարստութիւն դիւզելուց յետոյ նա գնում է որ տեսնի իր հայրենի դիւղը և քրոջ որդուն-Սիմօնին հետն առած նորից վերադառնում է Գ. քաղաքը. և որովհետև Փանոս աղան ու Տէր Խաչատուրը շատ մօտիկ ու սրտակից ընկերներ են, ուստի Սիմօնն էլ շատ հեշտութեամբ Տէր Խաչատրի տիրացուն է դառնում և մտերիմը, որովհետև ուրիշների բերանից գաղտնիքներ կորզելու ու Տէր Խաչատրի ականջին հասցնելու գործում նա արտակարգ ընդունակութիւն է ցոյց տալիս: Ո՞րտեղ է ուսումը վերջացրել տիրացու Սիմօնը, յայտնի չէ, բայց ասում են թէ շատ տեղեր է ման եկած և շատ բաներ է կարդացած: Նրա տունը քաղաքի համարեա ծայրումն է գտնւում, կնկայ վրայ իբրև օժիտ է

ստացել. նրա կինը մրգավաճառ Եփրեմի աղջիկն է և արդէն 4 երեխաների մայր:

Փանոս աղան հայրենիքից վերադառնալուց յետոյ Տէր Խաչատրի հետ առաջուց ինչ որ խօսակցութիւն է ունենում Սիմօնի մասին և միւս օրը նրան ուղարկում է Տէր Խաչատրի մօտ, որպէսզի տեսնէ, հարցաքննէ և իմանայ, թէ ինչ ընդունակութիւններ ունի:

—Քանի տարեկան ես, այ տղայ, հարցնում է Տէր Խաչատուրը:

—Քսան երեք տարեկան եմ, տէրհայր, պատասխանում է Սիմօնը.

—Ուսում ունիս.

—Հրամներես, ունիմ, տէրհայր.

—Ի՞նչ ես կարդացել.

—Նոր կտակարանը, հին կտակարանը, Գործք Առաքելոցը, Ոսկերերանը... դիփ կարդացել եմ, տէրհայր... Չամչեանն էլ եմ կարդացել.

—Չամչեանի քերականութիւնն էլ զիտես.

—Հրամներես, տէրհայր, մինչև վերջը կարդացել եմ:

Տէր Խաչատուրը մի ըռպէ լռում է. նրա դէմքը թէև ոչինչ չի արտայայտում, բայց մըտքումը նա ինքնիրան խոստովանում է, որ Չամչեանից ինքը մի-երկու գլուխ է միայն կարդա-

ցել ջահիլ ժամանակը ու թողել սաստիկ խրթին լինելուն համար:

—Էլի ի՞նչ ես կարդացել, հարցնում է նա խրոխտաբար, աշխատելով խեղդել սրտի պատճառած անհանգստութիւնը:

—Պղնձէ քաղաքը, էֆիմերդէն ու վեցհազարեակն եմ կարդացել.

—Վեցհազարեակը...

—Հրամներես, տէրհայր, բոլոր սատանաներին կարող եմ գլխիս հաւաքել, աղօթքները ունիմ... սև կատու է հարկաւոր, բոլորովին սև պէտք է լինի, մին էլ՝ ամայի տուն է հարկաւոր...

—Այ տղայ, դա հօ անհաւատութիւն է, նկատում է Տէր Խաչատուրը լրջօրէն.

—Հրամներես, տէրհայր. բայց ես քրիստոնեայ եմ և հաւատում եմ Աստծու զօրութեանը:

Տէր Խաչատուրը զգուշութեամբ ծածկում է դէպի միւս սենեակը տանող դուռը, որովհետև տէրտէրակինը սատանաներից սաստիկ է վախենում, և կրկին գալիս ու նստում է իր տեղը. սենեակում մի քանի ըռպէ լռութիւն է տիրում. Տէր Խաչատուրը պարզ տեսնում է որ առաջը կանգնած ջահիլ տղէն նրանից աւելի գիտութիւն ունի. եթէ նա խոնարհ լինի ու հնազանդ, իհարկէ, նրա գիտութիւնից Տէր Խաչատուրը վնաս չի ստանալ. գուցէ մի բան էլ ինքը սովորի ու ծխա-

կաններին զարմացնի: Տէր Խաչատրի լռութիւնը Սիմօնի սրտին թրթռոց է պատճառում.— մի գուցէ նրա ունեցած գիտութիւնը տէրհօր աչքին փոքր լիւայ. և ահա այս անգամ նա է համարձակում կտրել լռութեան թելը.

— Նարեկից քաղած ու անգիր արած աղօթքներ եմ իմանում, տէրհայր. հիւանդին կրթչկեմ, փակ դուռը բաց կանեմ, բաց դուռը կըփակեմ...

— Եօթը տուն առանց այբի սաղմոսներովը չար նազարից կազատեմ, կոկորդում խրլած ոսկորը դուրս կըհանեմ...

— Այ տղայ, էդքան բան ձրտեղ ես սովորել, նկատում է վերջապէս Տէր Խաչատուրը կոտրւած ձայնով.

— Տօնացոյցն ու Մաշտոցը, շարականն ու Այսմաուրբը հազար անգամ ձեռովս եմ անցկացրել, շարունակում է Սիմօնը աւելի համարձակ ձայնով:

— Նստիր, այ տղայ, էլ ո՛ր ես կանգնել, ասում է Տէր Խաչատուրը և ինքն իրան զարմանում, թէ ինչ է ասում: Սիմօնը մնում է կանգնած. Տէր Խաչատուրը նորից մտքերի մէջ է խորասուզում. գիտնական տիրացու ունենալը հեշտ բան չի. մի սխալ քայլ արեցիր, մի սխալ խօսք արտասանեցիր՝ յանկարծ, մին էլ տեսնես, խելքիդ տոպրակի կապը քանդուեց, էն անախտան

գիտնականն էլ տեսաւ, որ տոպրակի միջումը խելքի տեղ միայն թրիք ու զարման է ածած... դէ, զնա դու այնուհետեւ հաւատացրու ժողովըրդին՝ թէ դա թրիք չի, այլ գուտ խելք ա...

— Ես քո խոնարհ ծառան կըլինեմ, տէրհայր, յանկարծ բացագանչում է Սիմօնը, մտաբերելով Փանոս ամիի տւած խրատը. նա չորքում է և Տէր Խաչատրի վերաբերուի քղանցքը համբուրելով ասում.

— Քո խօսքը ու հրամանը ինձ համար սրբբազան օրէնք կըլինեն, տէրհայր, թող Աստուած անիծի ինձ, դժոխքի բաժին դառնամ, եթէ խօսքերիս մէջ մազի չափ սուտ լինի...

Տէր Խաչատուրը գիտնական Սիմօնին այդ դրութեան մէջ տեսնելով՝ միանգամից փոխում է. կասկածները անհետանում են. տէրհօր սիրտը քնքոյշ ու վեհանձն զգացմունքներով է լեցում: Սիմօնի ճակատից համբուրելով՝ բարձրացնում է գետնից և աթոռի վրայ նստացնում. երկար ու բարակ բացատրում է նրան՝ թէ ինչպիսի մարդ և ինչպիսի տիրացու է ուզում տեսնել նրա մէջ: Սիմօնը ամեն բանի յօժարութիւն է ցոյց տալիս և միւս օրից դառնում Տէր Խաչատրի տիրացուն, մտերիմը և լրտեսը: Փանոս աղան այդ առիթով նրանց փառաւոր ճաշ է տալիս և 100 մանէթ-

փող ընծայում Տէր Խաչատրին՝ իր ծնողների հոգիների փրկութեան համար:

Տիրացու Սիմօնը վեց ամսի չափ իրան լաւ է պահում. բայց տեսնելով որ ամեն կողմից նրան պատում ու մեծարում են, փողն էլ առատութեամբ է հաւաքում, երեսայի նման երես է առնում և սկսում է այնպիսի բաներ անել, որոնք գուցէ Ս. գաւառի գիւղերում կարող էին աննկատելի մնալ, բայց Գ. քաղաքում դժւար էր ծածուկ պահել: Էֆիմերդէն և մի ձեռագիր տետրակ առաջին դրած՝ նա սկսում է ղեղատոմսեր գրել ու հիւանդներ բժշկել. գուցէ այդ բոլորը աննկատելի կրմնար, բայց տիրացու Սիմօնը իր թշնամիների թւին մի հատ նորն էլ է աւելացնում, որը, նրան բաւական անախորժութիւններ պատճառելուց ջոկ, կողմնակի արգելք ևս է հանդիսանում և վերջ է տալիս նրա բժշկական գործունէութեան: Տիրացու Նիկողոսը 12 տարի շարունակ Տիրամօր եկեղեցումն էր ծառայում. ունէր ընտանիք և երեխաներ. տիրացու Սիմօնը և նա պէտք է փոխ-փոխ ման գային Տէր Խաչատրի հետ և եկամուտը կիսէին: Տիրացու Սիմօնը ինչ որ գողութեան պատճառով տիրացու Նիկողոսին Տէր Խաչատրի առաջ գրպարտում է. վերջինն էլ նրան դուրս է անում եկեղեցուց: Ահա, այդ տիրացու Նիկողոսը, վրէժխնդրութեան ծարաւովը

վառւած, հետամուտ է լինում, տիրացու Սիմօնի հիւանդներին հարց ու փորձ է անում, խայտառակ բաներ է լսում և մի օր էլ, 10-15 մարդու գլուխը անցած՝ ուղղակի հայ ոստիկանապետի տունն է գնում և ամեն ինչ պատմում: Ոստիկանապետը այդ մասին մասնաւորապէս տեղեկութիւն է տալիս Փանոս աղային, որի հետ մտերմութեան կապերով էր կապւած: Մի ժամ շանցած՝ Տէր Խաչատուրը, Փանոս աղան և տիրացու Սիմօնը ոստիկանապետի տունն են գալիս: Տիրացու Նիկողոսը գրպանից մի դաստա թղթիկներ է հանում ու դնում սեղանի վրայ.

— Էս ինչ է, հարցնում է ոստիկանապետը.

— Հաքիմ Սիմօնի տւած ղեղատոմսերն է, պատասխանում է տիրացու Նիկողոսը լըրջօրէն:

Ոստիկանապետը թղթիկներէից մինը վեր է առնում և կարդում է հետեւալը.

«Հրեշտակակուխը որ անց կենայ,

«Մալաքէ-Տաուզը կըգայ,

«Նոյեան տապանի լուն կըբերէ.

«Կրտապկես, կուտես,

«Անհար կըդնջանաս.

«Ամեն:

Կարգացածից ոչինչ չհասկանալով նա վարմացական հայեացք է գցում Տէր Խաչատրի վրայ.

վերջինը մնում է լուռ. Փանոս աղան քթի տակովը թէև ժպտում է, բայց նա էլ ոչինչ չի ասում:

— Էս ի՞նչ ես գրել, հարցնում է ոստիկանապետը տիրացու Միմօնին.

— Ա՛յ, սրան հարցրէք, մէջ է մտնում տիրացու Նիկողոսը, մի գիւղացի առաջ գցելով. — Թղթիկը սրան է տւել, չեմ իմանում ինչքան էլ փող է առել:

— Ասա, տեսնեմ, ինչի համար ես ստացել էս թուղթը, հարցնում է ոստիկանապետը գիւղացուն:

— Աղա ջան, սարիցը ոչխար էի քշում, հիւանդացայ, ջանս դողում էր, հալս հալ չէր, եկայ քաղաք, ժամկոչ Մաթոսին պատահեցի, լաւ տղայ ա, ափսոս ես, ասաւ, արի, քեզ հաքիմի կուշտը տանեմ, ասաւ...

— Յետոյ...

— Ետոյ... հրէս էս հաքիմի կուշտը տարաւ:

— Յետոյ...

— Ետոյ... նա էլ էդ թուղթը տւաւ, մի լիտը ջրի մէջ թրջիր, ասաւ, թղթից կծիր, ջրից խմիր, ասաւ, երեք օրումը կըպըծնես, ասաւ. էն ժամանակ սատանան փորիցդ դուրս կըգայ ու սև դոչի փորը կըմտնի, ասաւ, դոչին կըբռնես ու ինձ կըբերես, ասաւ...

— Էդպէս էլ արեցիր.

— Ոչ.

— Ինչո՞ւ.

— Ղոչիս մեղքը եկայ, աղա ջան.

— Բա դու ո՞նց առողջացար.

— Չեմ գիտում...

— Ո՞նց թէ չես գիտում.

— Ասենք, աղա ջան, հէնց որ էս հաքիմի տնից դուրս եկայ, դոդս էլ ձեռաց կտրւեց:

— Ինչքան փող տւեցիր.

— Չատ փող առեց, աղա ջան, 14 արասին համբարեցի ու դրի առաջը...

Այդ միջոցին Տէր Խաչատուրը Փանոս աղային աչքով է անում, նա էլ-ոստիկանապետին. երեքով դուրս են գալիս միւս սենեակը և իրանց մէջ քչփչում. մի քիչ անցած՝ ոստիկանապետը վերադառնում է նախկին սենեակը և հրամայում, որպէս զի մարդիկ ցրւեն իրանց տները, իսկ ինքը յետոյ ամեն բան կիմանայ և կըկարգադրէ:

Մարդիկ ցրւում են. ամենից վերջը դուրս է գալիս տիրացու Նիկողոսը՝ սպըղնած երեսով, գլխիկոր և գայրացած: Վերջապէս, սուրճ խմելուց յետոյ, դուրս են գալիս նոյնպէս՝ Տէր Խաչատուրը, Փանոս աղան և սևերես տիրացու Միմօնը: Փանոս աղան նրանց իր մօտ հացի է տանում: Երկար ժամանակ ոչ ոք սիրտ չէր անում

տիրացու Սիմօնի հետ խօսել. նա էլ սուս ու փուս գինի էր խմում և բեխերի ծայրերը ոլրում: Վերջապէս, Փանոս աղան, հացի սեղանից վերկենալով, հինգ մատներովը Սիմօնի թիկունքն է թափ տալիս ու բացագանչում.

—Այ դու օյինբազ, էդ ինչեր ես անում, այ տղայ.

—Լաւ բան չի, լաւ բան չի, մըթմըթում է Տէր Խաչատուրը:

—Ասե՛ք՝ օյինը յիմարների գլխին ա դրել, հախն ա, թղթիկները քեզ մօտ ա, տէրտէր...

—Հրէս, սրանք են էլի, ասում է Տէր Խաչատուրը և թղթիկների դաստան դնում սեղանի վրայ. ոստիկանապետի ձեռիցն էր նա առել. Տիրացու Սիմօնը իսկոյն վեր է կենում տեղից ու փախչում միւս սենեակը: Տէր Խաչատուրը թղթիկներից մի-մի հատ վեր է առնում, կարդում է ու մի կողմ դնում.

«Քամին զարնէ, փէշդ բանայ,

«Քօռը տեսնէ ու ծիծաղայ:

—Այ դու անպիտան, տես, ինչ ա գրել, նկատում է Փանոս աղան:

«Աչքերդ սև ա,

«Դօշդ կերևայ,

«Տէր, դո՛ւ ողորմեա:

—Ի՞նչ լաւ ա գրում, տէրտէր, հր՛... 11

—Ի՞նչն ա լաւը, օրհնած, դա դեղ ա որ տալիս ա հիւանդին... տես, տես, էս թղթի վրայ ինչ ա գրել... սատանի խելք ունի էդ անպիտանը. «Վամենում ես որ դատաստան չտեսնես՝ Վանք սիրէ, ժամ սիրէ, թաբախ սիրէ»:

—Հա, հա, հա... դրուստ ա ասում, էլի... «Թէ շան հետ գործ ունենաս՝

«Լուռ քեզանից կըլի անպակաս:

—Վայ քու գլուխը շմեռնի, Սիմօն, հա, հա, հա...

—Սպասիր, էստեղ զրաբառ ա գրած. «Եւ առաքեաց Դաւիթ ընդ առաջ նոցա, զի էին արքն անարգեալք յոյժ և ասէ. «նստարուք յերիքով, մինչև անեսցեն մօրուք ձեր»:

—Դա ինչ ա ասում, տէրտէր.

—Միրուքի վրայ ա ծիծաղում, Փանոս... այ, էլի զրաբառ ա գրած. «Եւ արար Աստուած զգազանս և ետես, զի բարի են.

«Յետ այնորիկ մուկն ծնաւ զթաւշան,

«Թաւշան ծնաւ զաւանակ,

«Աւանակ ծնաւ զփաշա

«Եւ զամենայն զհարէմ նորա.

«Յիշատակ նոցա անիծեալ եղիցի

«Ի պերճութիւն փորին Սիմէօնի»:

—Ի՞նչ ա ասում, տէրտէր.

—Ո՛վ ա իմանում, շատ խրթին ա գրած... 11

—Տէրտէր, ինչ ուզում ես, ասա, խելօք գլուխ ունի Միմօնը. եպիսկոպոսի գլուխ ունի, էն առէք-կերէքը վկայ, դրուստ եմ ասում:

—Եպիսկոպոս չէ... բայց խելքումը զատմատ կայ... տես, տես, դեղերի անուկներ էլ կայ գրած... Ըհ, հողեմ էն հիւանդի գլուխը, որ սրանցով առողջանայ պրտի...

—Ի՞նչ դեղեր են, սինամաքի հօ կայ...

—էլ ինչ ասես որ չկայ էստեղ. «ածուխի փոշի, ձիան թրիք, հանքային աղ, ներկած ջուր, ծեծած սիսեռ, հաշիշախառն օղի, սպիտակ ագռաւի ծիրտը, չալ աղէսի վզաքոքի բուրդը, չղջիկի լեարդը, պառաւ յոպոպի լեզւի իւղը»... վայ քո տունը չքանդւի, թուքը բերնումս չորացաւ...

—Հա, հա, հա... տէրտէր, էդքան բան որ գրել ա, հալբաթ մարդը մի բան իմանում ա, հը, ո՞նց ես կարծում...

—Իհարկէ իմանում ա, ո՞վ ա ասում թէ չի իմանում. բայց ախար էդպէս չի կարելի թղթեր բաժանել...

—Իհարկէ, չի կարելի. Միմօն, Միմօն, կանչում է Փանոս աղան: Դուրս է գալիս որ Միմօնը վաղուց է փախել: Հետեւեալ օրը Տէր Խաչատուրը հայրաբար նրան խրատում է և այն օրից տիրացու Միմօնը դեղատոմսեր ծախելը վերջ է անում:

Ասենք այդ չարութիւնները տիրացու Միմօնը անում էր միայն առաջին տարիները, երբ դեռ ևս շատ ջահիլ էր, անփորձ և քաղաքի բարք ու վարքին անտեղեակ. իսկ այժմ, երբ տասնեակ տարի է անցել, նա բոլորովին փոխել է, դառել է թէ փորձառու և թէ հեռատես:

Տիրացու Միմօնի տունը բակի կողմից նեղ ու երկար պատշգամբ ունի, երկու փոքրիկ լուսամուտներով. ահա, այդ պատշգամբում նա երեխաներ է կարդացնում: Առաւօտեան՝ աղջիկ ու տղայ գիրքն ու փալասը գրկախառնած գալիս են այնտեղ, փալասը պարզում են յատակի վրայ, նստում են վրան, գրքերն էլ բաց են անում ու դնում ծնկների վրայ: Պատշգամբի մէջտեղում գրած է մի հասարակ սեղան, վրան-մի երկար ու բարակ ճիւղոտ: Մինչև տիրացու Միմօնի տուն գալը՝ նրա կինը—Բերսաբէ խանումն է դաստիարակում աշակերտներին: Գետնախնձորով լիքը դաշտը ձեռին նա նստում է սեղանի առաջ, ճիւղոտը դնում մօտին և հրամայում, որպէս զի աշակերտները բարձրաձայն երգելով կարդան իրանց դասերը և այնպէս սովորեն: Եւ ահա բարձրանում է սարսափելի ճղաւոց. բասօն դիսկանտի մօտ նստած, բարիտօնն էլ սոպրանօյի մօտ՝ միմեանց հետ մրցել են ճգնում: Այդ միջոցին մի չարաճճի երեխայ ձեռը տանում է և հարևանի փա-

փուկ մտից յանկարծակի կմշտում. «վ ան յ» բղա-
տում է վերջինը. «ս ու ս ա ը ա» բղալում է նոյն-
պէս Բերսաբէ խանումը և ճիպոտը իջեցնում
խեղճի վզին. վերջինը թէև լուում է, բայց դէմքը
կնճռած՝ երկար ժամանակ համ վիզն է քորում,
համ էլ կմշտած տեղը: Մի ուրիշ երեխայ ձեռը
պարզում է և հարևանի պատառոտուն շորի ծա-
կերից մի կտոր բամբակ է դուրս քաշում, փշում
է նրա վրայ ու բաց թողում օդի մէջ. տեսնող-
ները համ բարձր ձայնով կարդում են, համ էլ
ժպտուն աչքերով բամբակի թուիչքը գննում. վեր-
ջինը թառսի նման գնում Բերսաբէ խանումի
քթածակի մօտ է նստում ու խտտոց պատճա-
ռում. Բերսաբէ խանումը առանց բան հասկա-
նալու քիթն է քորում. երեխաներն էլ, չկարո-
ղանալով այլ ևս իրանց զսպել, բարձրաձայն ծի-
ծաղում են. ճիպոտը այդտեղ էլ նրանց կարգի
է բերում: Երեխաներից մինը աւետարան է կար-
դում, միւսը նարեկ, երրորդը Վարք Սրբոց, չոր-
րորդը Տելեմաք: Օր չի անցկենում, որպէս զի
աշակերտներից մէկն ու միւսը առանց ծեծ ու-
տելու կամ ծնկաչոք պատժելու տուն գնայ.
դա նրանց համար ուսումնական անհրաժեշտ պի-
տոյքներից մինն է դառել. իսկ չքաւորների որ-
դիքը տիրացու Միմօնի համար համ բազար են
գնում, համ բակն են մաքրում, համ հաւերին

կուտ են տալիս և կովերին դաշտ քշում արա-
ծացնելու, համ էլ չարաչար ծեծում:

Տիրացու Միմօնի աշակերտները տարւայ ըն-
թացքում մի շաբաթ միայն համարեա անծեծ են
մնում. դա՛ Ս. Յակոբայ տօնին յաջորդող շա-
բաթն է: Չեմ իմանում ինչ աւանդութեան վրայ
հիմնելով՝ աշակերտներից ամեն մինը Ս. Յա-
կոբայ տօնին մի-մի ողջ աքաղաղ է ընծայ բե-
րում վարժապետին: Տիրացու Միմօնի ներքնա-
տունը լեցում է աքաղաղներով. նրանց կրկուցն
ու ծուղրուղուն անկարելի է դարձնում աշակերտ-
ների հետ պարապելը և կամ քնելը. իսկ լուսա-
դէմին՝ երբ առանց հաւ մնացած աքաղաղները
մինը միւսի ետեից սկսում են ծուղրուղու կան-
չել, թեքը թափահարել, կրկուալ ու միմեանց
հետ կուել, տիրացու Միմօնի տունը Սողոմ-Գո-
մոր է դառնում. բայց նա շատ շուտով է դրա
առաջը առնում. աքաղաղների մի մասը սրա-
նրա վրայ ծախում է. պատահում է՝ որ աշա-
կերտի մայրը իր ընծայած աքաղաղին նորից
փող է տալիս ու ետ առնում, որպէս զի Բեր-
սաբէ խանումի աչքը որդու վրայ քաղցր լինի:
Աքաղաղների միւս մասը տիրացու Միմօնը օր-
օրի վրայ իր ձեռովը մորթում է և ուտում՝ որը
խաշած, որը տապկած, որը խորոված, որն էլ
ծուխի մէջ բռնած: Քանի աքաղաղները ողջ են

և իրանց ծուղրուղուններովը յիշեցնում են տիրացու Սիմօնին, որ նա իր ընտանիքի հետ միասին աշակերտների բերած աքաղաղների մտովն են կերակրում, նա նրանց ոչ ծեծում է և ոչ դասերը խստութեամբ հարցնում. բայց հէնց որ աքաղաղների ձայները կտրուում են, միսն էլ ուտուում-վերջանում, ճիպոտն ու ծեծն էլ նորից վերանորոգում են իրանց քմահաճ բռնակալութիւնը:

Տիրացու Սիմօնը լաւ կօնծած ժամանակը շատ զւարճասէր է դառնում. իսկ զւարճութեան առարկան բացառապէս լինում է կատուն: Երբ որևէ խնջոյքից և կամ մեռելահաց ուտելուց յետոյ տուն է գալիս՝ աշակերտներին դուրս է կանչում բակը և հրամայում, որպէս զի կատու բռնեն. մի քանի ըոպէ շանցած՝ երեխաները երկու-երեք կատու են բերում, ձեռների մէջ խտրտած. տիրացու Սիմօնը ամեն մինի պոչի արմատից կարճ թել է կապում ու բաց թողում: Կատուները մի ըոպէ մնում են անշարժ և աշխատում են պարզել այն հարցը, թէ արդեօք ինչ օտարոտի փոփոխութեան է ենթարկել նրանց կազմը. յետոյ, գլխները աջ ու ձախ դարձնելով, պոչերին են մտիկ տալիս, բայց նրա վրայ ոչինչ օտարոտի բան չեն նշմարում: Խեղճ կենդանիների ղէմքերից, ասենք, պարզ երևում է, որ

նրանց ինչ որ մի անախորժ բան անհանգիստ է անում և թէ այդ զգում են նրանք յատկապէս պոչերի արմատների մօտ. դրանից ազատելու համար կանգնած տեղում նրանք մի քանի անկանոն թռիչքներ են անում, բայց իզուր: Իսկ աշակերտները ծափ են տալիս, դէս ու դէն են վազում, կատուներին են մտիկ տալիս, ծիծաղում են, թռչկոտում և կրկին մտիկ տալիս: Կատուները վճռական քայլեր են անում և սկսում բակի մի անկիւնից դէպի միւսը վազվզել ու պոչերին մտիկ տալ: Երեխաները ծափ տալով հետևում են նրանց, իսկ տիրացու Սիմօնը բոլոր ժամանակը լուռ ու մունջ ծխախոտի չիբուխը բերնին թամաշա է անում և անձայն ծիծաղում: Կատուները գնալով կորցնում են իրանց համբերութիւնը, որովհետև անախորժութիւնից ջոկ ինչ որ ցաւ էլ են զգում. և ահա, գլուխը կորցրածի պէս, սաստիկ թռիչքներ են անում, իրանք-իրանց պատերին են խփում, հողի կամ կանաչի վրայ թաւալ-թաւալ են դալիս և վերջապէս, բոլորովին անճարացած ու շնչասպառ, սկսում են թունդ ձայնով մլաւել, խղճուկ ղնչիկները երեխաներին դարձնելով:

— Խռիկ տէք, բացազանչում է տիրացու Սիմօնը: Աշակերտները գոռում-գոչումով վրայ են պրծնում, իսկ թշուառ չորքոտանիները, աղմու-

կից սարսափահար եղած, իրանց վերջին ոյժն են հաւաքում, թռչում են պատովը և իրանք իրանց գցում՝ կամ դէպի փողոց և կամ հարեանի բակը: Այդպէս էր զւարճանում առաջին տարիները տիրացու Սիմօնը, երբ գինովցած էր լինում: Բայց այժմ այդ զւարճութիւնն ևս նա մոռացել է, որովհետև քահանայական թեկնածու է համարւում, թշնամիներ շատ ունի և իրան պէտք է չգաստ պահէ, որպէս զի անսպասելի խոչնդոտների չհանդիպի:

VI

— Սարկաւագ, քիթդ էլի է կարմրել, հարցնում է տիրացու Սիմօնը, պահարանից իր շապիկը դուրս բերելով:

— Սպասիր, քո քիթն էլ կրկարմրի շուտով, պատասխանում է Սահակ սարկաւագը անվրդով ձայնով ու նոյնպէս իր շապիկը դուրս բերում պահարանից:

— Մինչև իմ քիթը կարմրի, քո կարմրած քիթի արմատից նոր քիթ կըծլի, ասում է Սիմօնը և ժպտալով սենեակից դուրս գալիս. սարկաւագը ոչինչ չի պատասխանում. միայն երկու-երեք անգամ կանգնած տեղումը շուռումուռ է գալիս

և յուշիկ քայլերով գնում-մտնում ժամկոչ Մաթոսի խցիկը:

— Այ քեզ ըարով, ասում է Մաթոսը, բարձրանալով տեղից և նրա մագոտ ձեռք սեղմելով:

— Հը՛, ո՛նց ես, մեր տղայ, մէ տուր տեսնեմ, մշմշում է սարկաւագը սիրտ մտնող ձայնով և այ ձեռի բուժ ու ցուցամատը առաջ պարզում: Մաթոսը նրան բուրնոթի է տալիս. նա համ քաշում է բուրնոթին, համ էլ շուրջը հոտոտում:

— Ի՞նչ ես հոտոտում, թագի հօ չես, նկատում է Մաթոսը քմծիծաղ տալով:

— Ասլանի պտուկը ո՞րտեղ ես դրել, Մաթոս, վերջը հաշիւ կանենք, շշնշում է սարկաւագը վախվխելով ու ժպտալով:

— Ուշացար, սարկաւագ ջան, ասում է Մաթոսը, արողի դատարկ շիշը ցոյց տալով:

— Ըսկի չկայ...

— Տեսնում ես, էլի... փող տուր, գնամբերեմ:

Սարկաւագի դէմքից ժպիտը անհետանում է. սուս ու փուս, գլուխը աջ ու ձախ շարժելով, համը քայլերը նա դէպի դուռն է ուղղում:

— Պօղոս առ մեզ զի՛նչ հրամայէ, կանչում է նրա ետևից Մաթոսը: Սարկաւագը կիսով չափ նրան է դառնում, ձեռներովը և գլխովը յուսա-

հատական շարժումներ է անում ու զնում եկեղեցի: Այնտեղ արդէն աղօթողներ են հաւաքել. ծանր քայլերով Մահակ սարկաւազը անցնում է նրանց միջով, երեսը խաչակնքելով Տիրամօր պատկերն է համբուրում, բարձրանում է ձախակողմեան դասը և երկու ձեռների փեղքը քունքերին մօտեցնելով՝ երկար ու բարակ լուսամտից դուրս նայում... մթնշաղը համարեա ցրել է. մարդիկ սոււերների նման անց ու դարձ են անում փողոցում...

— Հնա տիրացու Միմօնի ձայնը լսես, հնա մի արշին էժանագին չիթ պատռես, ողջ մէկ է, քաւոր ջան, ասում է Տէր Մարուքէն հեգնական ձայնով ու բարձրանում դասը. քաւորը մնում է ցածում. տիրացուն փիլոն է տալիս. Տէր Մարուքէն այդ օրը պատարագիչ է. նա երեսը խաչակնքում է և ժամը օրհնում. ժամասացութիւնը սկսում է:

Տէր Մարուքէն քահանաների մէջ ամենից ջահիլն է. 45 տարեկան հազիւ լինի. ամրակազմ է և հաստափոր. վիթխարի կերպարանք ունի. երկար մազերը առիւծի բաշի նման ծածանում են նրա ուսերի վրայ. իւղալի աչքերը արևածագիկ յատկութիւն ունին. վերջինը կլորիկ երեսը արեգակին է դարձնում, իսկ Տէր Մարուքէի աչքերը, նրա կամքին բոլորովին հակառակ, շուռ

են գալիս միշտ դէպի այն կողմը, որտեղ գեղեցիկ սեռի ներկայացուցիչներն են կանգնած կամ նստած: Ասում են, թէ Տէր Մարուքէն մանկութիւնը զաւմուխների մէջ է անցկացրել և հմուտ ձիարածի հուշակ է վայելելիս եղել նրանց մօտ. այնպիսի ճարպիկութեամբ էր, ասում են, հեռւից օղակը գցում ձիան վզին ու բռնում, որ նոյն իսկ աւագակները մնում էին բոլորովին հիացած և միայն բացազանչում էին. «բ ան ան լի, բ ան ան լի, չ օ խ ե ա խ շ ի»: Բայց Գէւօն (այդպէս էր Տէր Մարուքէի աշխարհիկ անունը) այդ քանքարը գետնի մէջ է թաղում և, իր կեանքի 18-րդ գարունը հազիւ բոլորած, գալիս է Գ. քաղաքը: Գալու գլխաւոր պատճառը ձայնն է լինում, բարձր, ուժեղ ու զիլ ձայնը. բոլոր լսողները հիանում էին նրա ձայնովը և խորհուրդ տալիս անպատճառ տէրտէր դառնալ: Նա էլ վերջապէս համոզում է որ աւելի լաւ է տէրտէր լինել, քան ձիարած մնալ, թէկուզ լաւ ձիարած. այդ պատճառով Գ. քաղաքն է գալիս և Մարգիս եպիսկոպոսի ընծայարանում սկսում ուսում առնել: Հինգ տարի շարունակ նա թէ ուսում է առնում և թէ եկեղեցում տիրացութիւն անում. վեցերորդ տարւայ սկզբում՝ մարդիկ մի գեղեցիկ օր իմանում են, որ Գէւօն իր վարժապետներից մի-նին փառաւորապէս ծեծել է ու քաղաքից փա-

խել. Ինչո՞ւ համար է նա ծեծել՝ այդ մնում է
զաղտնիք. նոյն իսկ ծեծւած վարժապետը—Բիւլ-
բիւլենց Կոտրատիոսը, երբ նրան այդ մասին
հարց էին տալիս, այնպիսի անորոշ պատասխան
էր տալիս, որ լսողը, գիտեցածն էլ մոռանալով,
թքում էր ու հեռանում:

Գէւօն մի քանի տարի ամբողջ Անդրկովկասը
ոտի տակ է տալիս. որտեղ նա գնում է, իսկոյն
ձայնն է ցոյց տալիս, երգեր է երգում, գինե-
վաճառների ուշադրութիւնն է իր վրայ դարձնում,
սազանդարների հետ է մրցում. միևնոյն ժամա-
նակ ուտում է, խմում է, փող էլ է աշխատում:
Կարճ միջոցում՝ քօռ աշուղների, չօնգուր ածող
լօռեցիների, թառ ածող նուխեցիների, գլխնե-
րին ջրով լիքը գուժեր դնող ու վազվզող փէհլէ-
վանների հետ դառնում է սրտակից ընկեր: Եթէ
մայիս ամսում գնայիք Թիֆլիս և Օրթաճալայի
բաղերում զբօսնելիս ձեր ականջին հասնէ՛ր մի
զիւ ձայն, որը երգելիս լինէր՝

«Ջան ենք ասում,

«Ջան ենք լսում.

«Ուտում ենք գեղարքունին,

«Կօնծում ենք կարմիր գինին՝

կարող էիք համարձակ մօտենալ այն խմբին,
որտեղից այդ ձայնն էր գալիս ու հարցնել.
«Ջ ու ն Գ է ւ օ ն է ս տ ե ղ ա»: Իսկոյն մի յաղ-

թանդամ մարդ գինու թասը աջ ձեռին կրցատ-
քէր տեղից, ձախ ձեռի բռնթ ու միջամատը
չփշփացնելով, փորովն էլ ծիծաղաշարժ շար-
ժումներ անելով, կրպատասխանէր ձեզ երգելով.

«Արի, գնանք դամճօնեն,

«Ուտենք սնխրի մարճօնեն...

Այդտեղ արդէն նրա երեսին նայելով՝ դուք
իսկոյն կըճանաչէիք ձեր ծանօթ հոշակաւոր ձիա-
րած Գէւօյին և, իհարկէ, շատ... կ ու ը ա խ ա-
ն ա յ ի ք:

Գէւօն մի օր էջմիածին ուխտ է գնում, իրան
է ցոյց տալիս, ուրիշներին է տեսնում. նրա ձայ-
նին այնտեղ էլ են հաւանում: Գէւօն սկսում է
ք ա հ ա ն ա յ ա կ ա ն խ ն դ ի ը ը շօշափել, բայց
երբ նկատում է, որ ուրիշներն էլ նրա գ ը պ ա ն ն
են կամենում շօշափել, սաստիկ է վիրաւորում,
ուխտը կիսատ թողնելով դուրս է գալիս էջմիա-
ծնից և անցնում դէպի հիւսիսային Ռուսաստան
բաղդ որոնելու: Ճանապարհին ինչ որ եկեղեցա-
կանների հետ ասուածաբանական խնդիրների
վերաբերմամբ վէճի է բռնում և տեսնելով որ
հակառակորդը յօժար կամքով չի կամենում հա-
մաձայնել նրա կարծիքների հետ, բռնում նրան
կարգին ծեծում է, հակառակորդն էլ նրան է ծե-
ծում. հետևանքը լինում է այն՝ որ Գէւօն ութը
ամիս բանտն է նստում, մի կտոր սև հաց և մի

աման ջուր միայն օրական ստանալով: Բանտից հէնց որ դուրս է գալիս, իսկոյն վագոն է նըստում և շտապում ն. քաղաքը, որտեղ ամեն տարի համաշխարհային մեծ տօնավաճառ է լինում, հայ վաճառականներ էլ ամեն կողմերից հաւաքւում են այնտեղ:

Գէւօն հոտոտելով—հոտոտելով փնտրում—գտնում է նրանց, ամեն մինի հետ նստում հաց է ուտում, ձայնն է ցոյց տալիս, երգեր է երգում և այդպիսով բոլորի քէֆը բերում:

Գուցէ ձեզ յայտնի է թէ 80-ական թւականներին հայ վաճառականին դուր գալու համար ինչ էր հարկաւոր.—առանց ամաչելու շողոքորթիւր նրան, ինչքան լեզուդ զօրում է. աղա տիտղոսը ինչքան կարող ես շուտ-շուտ արտասանիր. քեզ խեղճ ձևացուր, նրան երջանիկ. հիւրանոցի սպասաւորի անելիքը դո՛ւ արա և միևնոյն ժամանակ դէմքիդ վրայ հրճւանք ցոյց տուր: Եթէ աղան իր հետ հաց ուտելու քեզ արժանացնէ՝ ամենից առաջ նրա կենացը խմիր. այդ առիթով ոգևորւիր ու ճառ ասա. եթէ աղան ազգին կոտրած ասեղ և կամ հոտած ձու է նւիրել, ասեղից ուղտ շինիր, ձուից-ձի և փառաբանիր նրա անունը. իսկ եթէ ուժեղ էլ ձայն ունիս և աղայի ստամոքսի մարսողութեան օգնած լինելու համար ազգային երգեր էլ ես երգում՝ այն ժամա-

նակ երանի տուր իննը ամիս քեզ փորումը պահողին, որովհետև աղան արդէն յաղթւած է. փող էլ կրտայ քեզ, ուզում ես՝ տէրտէր էլ ձեռնադրել կրտայ, բարեբարդ ու պաշտպան դ էլ կըլինի. իսկ երբ հասարակութեան մէջ այդ մասին խօսք լինի՝ աղան մեծահոգութեամբ կարտասանէ.

—Է՛հ, խեղճ մարդ ա, մի փոր հաց ա՛ թող գնա ինձանով ուտի, հալբաթ մի օր հոգուս ողորմիս կրտայ:

—Ախար վնաս ես տալիս հասարակութեան, այ՛մարդ, տղէտ, խաբերայ և անառակ մարդ է, ո՛ր ես նրան քահանայ ձեռնադրել տալիս:

—Ինչ ուզում ա թող ըլի, շնչում է աղան ականջիդ.—գիտես ինչ կայ... ես իմ քէֆին եմ հարցնում. քէֆս ուզում ա, կանեմ, չի ուզում, չեմ անիլ. դրուստն ասած՝ ես շատ եմ սիրում իմ բակի շանը-Փամանին. լաւ շուն ա... ինչո՛ւ... նրա համար որ՝ ինչ ժամանակ էլ տուն եմ գալիս, գիշերով թէ ցերեկով, Փամանը հէնց որ ինձ տեսնում ա թէ չէ՝ իսկոյն ցատքում ա տեղից, պոչը բուլղի-բուլղի անելով առաջ ա վագում ու ոտներս լիզում... քէֆս ա գալիս. խօսքը մեր մէջ թող մնայ, միայն իմ Օսմանի նման ոտներս լիզողներին կանեմ ես լաւութիւն, հասկացար...: Երկու տարի առաջ մի ու-

ըիշ շուն էի պահում, Մաշաղի էր անունը. տօճ, մի օր էդ շուն շան որդուն լաւ ուտացրի, քէֆիս համար էլ հանարով ռոտներա պոչի վրայ դրի ու հուպ տւի. ինչ ես կարծում... վրէս յարձակւեց ու վարտիքս երեք-չորս տեղից ճղրտոտեց. հրամայեցի, էնքան ծեծեցին՝ մինչև որ տեղնուտեղը սատկեց. իսկ Օսմանս չի կծում. մի քանի անգամ փորձեցի, տեսայ որ չէ... իրան հաց տւողին ճանաչում ա. շատ որ պոչը հուպ չեմ տալի՝ խղճուկ ձայնով լաց է լինում միայն ու կօշիկիս կաշին լիզում... ախար ո՞նց չպահպանեմ էդպիսի շանը, հը՞, հոգուս էլ մեղք ա... հըմի հասկացանք....

Դու մի ասա, Գէւօն այդ բանը լաւ է հասկացած եղել, որովհետև տօնավաճառի ամենաթունդ ժամանակը նա իր համար ս ե փ ա կ ա ն բ ա ռ ե ռ ա ռ է ճանկում. Մինաս աղան է լինում նրա բարերարը: Մի օր՝ լաւ ուտելուց, լաւ էլ խմելուց յետոյ՝ Մինաս աղան Գէւօյին հետն առած բաղանիս է գնում. երկար ու բարակ նրանք այնտեղ լացւում են. Գէւօն այնտեղ էլ է երգում. ինչպէս է լինում քիսաչին դուրս է գալիս. իսկ Մինաս աղան պահանջում է Գէւօյից, որպէս զի մի աման սառը ջուր ձեռին բռնած՝ մի լաւ ճառ խօսի ու յետոյ ջուրը ածի նրա գլխին: Գէւօն իսկոյն յօժարում է. ամանով ջուրը ձեռին

բարձրանում է գոլորշիանոցի եօթներորդ աստիճանի վրայ ու Մինաս աղայի համար արտասանում հետեւեալ ճառը.

—Ո՛վ դու, աղաների աղա-Մինաս աղա. դո՛ւ, որ երկնքի ցօլքն ես, Մինաս աղա. դո՛ւ, որ արեգակի ամենաթափանցիկ եղբայրն ես, Մինաս աղա, թոյլ տուր ինձ... ինձ, որ գարշելի գեռուն եմ, Մինաս աղա, ինձ, որ քո ոտների աննման տապաններից պոկ եկած ցեխ եմ, Մինաս աղա, այն, թոյլ տուր ինձ-սառը ջուր ածեմ քո թարմ ճակատի վրայ, Մինաս աղա, և թող ծովը ցնծայ՝ որ ջուրը բաղդ ունի թարմացնելու այն պատկառելի մորթը, որով, ով Մինաս աղա, ծածկւած է քո աղայական գանգի սպիտակ ոսկորը...

—Թոյլ եմ տալիս, ածիր, հոգիս, ածիր, Գէւօ ջան, ձեռներդ յոգնեցին, մշմշում է Մինաս աղան մի այնպիսի ձայնով, կարծես, խիստ շատ համեղ բան էր կերած: Գէւօն ջուրը ածում է, Մինաս աղան էլ նրա շրթունքներից է համբուրում. ճառը նրա վրայ մեծ ազդեցութիւն էր արել. նրա սիրտը եկուն խմորի նման հա՛ բարձրանում էր, հա՛ ծաւալւում: Մի ժամ անցած՝ նրանք երկսով թէյ էին խմում Մինաս աղայի սենեակում. Գէւօն քիշ էր խօսում, իսկ Մինաս աղան ստէպ-ստէպ նրա բաժակի մէջ կոնեակ էր ածում և ասում.

—Խմիր, այ տղայ, դարդ մի արա, Աստուած ողորմած ա. քո խօսքերը ես մինչև մահս էլ չեմ մոռանայ. եթէ մինը հարցնի թէ աշխարհումս մեղրից աւելի քաղցրը ինչն ա՛ Գէւոյի լեզուն ա ես նրան կը պատասխանեմ:

—Սաղ ըլես, Մինաս աղա. իմ յոյսը դո՛ւ ես ու կաս. ուզես՝ մարդ կը շինես. ուզես՝—շուն. քո կամքն ա:

—Տէրտէր, տէրտէր պէտք ա քեզ ձեռնադրել տամ, այ տղայ, էդպէս քեզ ես չեմ թողալ. մեր հասարակութեան համար քեզ նման մարդիկ են հարկաւոր. սպասիր, թէ ողջ մնացինք՝ Գ. քաղաքը հէնց որ վերադառնամ՝ ամեն բան կարգի կը գցեմ:

Մի քանի օրից Մինաս աղան Գէւոյին փող է տալիս և ուղարկում Գ. քաղաքը, խոստանալով, որ վեց ամսից, երբ նա նոյնպէս կը գայ այնտեղ, միմեանց հետ կը տեսնեն: Գէւոն ն. քաղաքից դուրս է գալիս, որպէս զի Գ. քաղաքը գնայ. բայց ճանապարհին կասկածանքների մէջ է ընկնում... մի գուցէ Մինաս աղան իր խոստումը չկատարէ. փորձը նրան ցոյց էր տւել, որ աղաները զինին ինչքան շատ էին խմած լինում, այնքան էլ խոստումներ շատ էին անում. բայց հէնց որ զինու գոլորշին նրանց գլխներից դուրս էր թռչում, տւած խոստումներն էլ գոլորշու հետ թռչում—անհետանում էին: Բացի դրա-

նից՝ մինչև Մինաս աղայի Գ. քաղաքը վերադառնալը վեց ամիս ժամանակ կար. ուրիշ տեղերում էլ կարելի էր բաղդ որոնել. այդ բոլորը աչքի առաջ ունենալով՝ Գէւոն փոխում է ճանապարհը և գնում Զ. քաղաքը: Այնտեղ իմանում է, որ մարդիկ ինչքան հարուստ են, այնքան էլ յիմար են: «Ինձ էլ էդ ա պէտք» ասում է Գէւոն մտքումը, գնում երեցփոխանին է ներկայանում, կիրակի օրն էլ եկեղեցում երգում է ու ձայնը ցոյց տալիս: Աղաները նրա ձայնին հաւանում են և ոտճիկ նշանակում՝ որպէս զի պատարագի ժամանակ եկեղեցում դպրութիւն անէ: Այդ քաղաքում Գէւոն շատ շուտով է ծանօթանում զինեկաճառների հետ և սկսում է կատարի քէֆեր անել. նկատելով, որ փողն էլ առատ է, պատահողից պարտքով փող է վերցնում: Նրա գործերը, կարծես, լաւ էին գնում. բայց յանկարծ մի գիշեր, քէֆի ժամանակ, այդտեղ էլ նա մի մարդու ծեծում է ու մի ամիս բանտը նստում: Բանտից դուրս գալուց յետոյ՝ երեցփոխանը նրան այլ ևս թոյլ չի տալիս եկեղեցում երգել. նա էլ, անճարացած, մի քանի մարդուց ձեռապարտ փող է վերցնում, փախչում-գնում է Մ. քաղաքը և ըստ սովորութեան ուղղակի դիմում այնտեղի աղա երեցփոխանին: Ինչ է խօսում այնտեղ, ինչ չի խօսում, յայտնի չէ, միայն թէ միւս

օրից նրան լաւ ուճիկ են նշանակում՝ որպէս զի եկեղեցու համար երգեցիկ խումբ կազմի: Այդ քաղաքումն էլ Գէօն սրանից-նրանից պարտքով փող է վեր առնում և այդ փողովը աղիւսի գործարան բաց անում. մի աղջկայ հետ էլ պսակում է և մի քանի ամիս շատ լաւ ժամանակ անցկացնում. բայց երբ տեսնում է որ պարտատէրերը արդէն շատ են նեղում, ինչ որ կարելի է՝ ծախում փող է շինում և այդտեղից էլ է փախչում իր ջահիլ կնկայ հետ և գալիս, վերջապէս, Գ. քաղաքը: Վեց ամիսը լրացած լինելով՝ Մինաս աղան արդէն վերադարձել էր տուն: Գէօն երեք անգամ գնում է նրա մօտ, բայց տանը չի գտնում. ժամերով խոհանոցում նստած սպասում է նրան, խոհարարուհու բարեսրտութիւնից օգտուելով հաց էլ է ուտում այնտեղ, սուրճ էլ է անուշ անում. վերջապէս, չորրորդ անգամին Մինաս աղան ընդունում է նրան իր առանձնասենեակում և սուր աչքերովը նկատում է, որ Գէօն առաջւանից աւելի խոնարհ ու թիւն է ցոյց տալիս նրան և մեծ մարդու տեղ է դնում. այո, մեծ բաւականութեամբ նա այդ նկատում է և վճռում՝ անպատճառ նրան քահանայ ձեռնադրել տալ: Մի քանի օրից Գէօն, Մինաս աղայի բարեխօսութեամբը, Տիրամօր եկեղեցում երգիչ է նշանակում: Բացի դրա-

նից՝ Մինաս աղան, իր փառաւոր դուքանում նստած, համախօսականի թուղթն էլ մօտին դրած, սկսում է ստորագրութիւններ որսալ. ինչ մուշտարի ներս է մտնում, Մինաս աղան աշխատում է ստորագրել տալ նրան թղթի տակին, եթէ նա Տիրամօր եկեղեցու ծխականներից է: Բայց գործը այնքան էլ աջող չի գնում. ծխականների մեծ մասը ստորագրելուց հրաժարում է. բացի դրանից գալիս Մինաս աղային իմաց են տալիս, որ Տէր Խաչատուրը, երեցփոխանը և շատերը Գէօյի քահանայ ձեռնադրելուն բոլորովին դէմ են: Մինաս աղան վերջապէս բարկանում է, որովհետեւ նրա պատիւն են շոշափում, նրա կամքին են հակառակում, Գէօն այդտեղ երկրորդական առարկայ է դառնում: Գուքանը թողած՝ Մինաս աղան սկսում է սրա-նրա մօտ գնալ, ահագին աղմուկ է բարձրացնում, բայց, վերջիվերջոյ, հազիւ 20 ստորագրութիւն է կարողանում որսալ. ստորագրողներից մինն էլ արդէն մի տարի առաջ մեռած ու թաղած ոմն է դուրս գալիս վերջը: Գէօն յուսահատում է, բայց Մինաս աղան նրան յոյս է տալիս՝ թէ անպատճառ տէրտէր կը լինի:

Տիրամօր եկեղեցու ծխականները, խռովութիւններին վերջ տալու նպատակով ժողով են կազմում, կանչում են Գէօյին և ասում.

—Աղբէր, թէ դու ինչ պտուղ ես՝ մենք այդ շատ լաւ ենք ճանաչում. այդ պատճառով, ահա, ամբողջ հասարակութիւնը յայտնում է քեզ, որ ոչ թէ քահանայ ձեռնադրել տալ, այլ քո երեսը մինչև անգամ տեսնել չի կամենում, հասկանում ես թէ չէ, ո՞վ պէտք է քեզ առանց մեր յօժարութեան քահանայ ձեռնադրէ...

—Ո՞վ է ձեզ հարցնում՝ կամենում էք թէ չէք կամենում. ես կըլինեմ քահանայ և կըզամ կընստեմ ձեր գլխին, ուրիշ ոչինչ, պատասխանում է Գէլօն հպարտութեամբ ու ժողովից դուրս գալիս:

Եւ ուղիղ որ նա քահանայ է ձեռնադրուում շուտով: Մ. եպիսկոպոսը հրաման է տալիս և Գէլօյին Ա. քաղաքում տէրտէր են ձեռնադրում, անունը դնում են Տէր Մարութէ ու բաց թողում: Տէր Մարութէն գալիս է Գ. քաղաքը և արձակհամարձակ նստում Տիրամօր եկեղեցու այն ծխականների շինքներին, որոնց քահանան քանի տարի է մեռած էր:

Չատ խայտառակ քահանայ է դուրս գալիս Տէր Մարութէն. մանաւանդ առաջին տարիները: Մինաս աղայի և Մ. եպիսկոպոսի նման պաշտպաններ ունենալով՝ նա ոչ ոքից չէր քաշուում, չէր ամաչում. աչ ու ձախ, ո՞վ պատահէր՝ բոլորին էլ վիրաւորում էր և կծոտում, ինչպէս մի

որեւէ դալմուխի ձի: Մինաս աղան Տէր Մարութէին մի հնացած կառք է ընծայում. նա էլ իսկոյն վիճակախաղ է սարքում. և երբ նշանակած գումարը լիովին ստանում է՝ կառքն էլ ուրիշի վրայ է լծախում. ժողովուրդը տեսնում է այդ ցածութիւնը և սկսում է տրտնջալ:

Ե. եպիսկոպոսից նա մատեան է ստանում և սկսում է փող հաւաքել ինչ որ վանք նորոգելու համար. եպիսկոպոսը յանկարծ մեռնում է. Տէր Մարութէից փող կամ մատեան են պահանջում. բայց նա ամեն ինչ ուրանում է և հաւաքած փողերը ուտում. ժողովուրդը կրկին է տըրտընջում: Նրան յանձնւած մետրիքական մատեանը իւզոտ ու կեղտոտ է ամբողջովին. մի տեղում սխալ է գրած ու ջնջած. կամ գրածը քերած և ուրիշ բան գրած. միւս տեղում գրածի վրէն թուղթ է կպցրած և ուրիշ բան գրած. սխալներով լիքն է մատեանը. մի եղբօր միակ որդին յանկարծ միւս եղբօր որդիների շարքն է անցնում ու զինուոր գնում. անէ՛ծք, նզո՞վք... թափում են Տէր Մարութէի գլխին, բայց նա ստում է և յանցանքը ուրիշների վրայ գցում: Տէր Բարսամի անունով ննջեցեալի տնից ծառան ծրարած փող է բերում եկեղեցի. «Տէր Բարսամը ես եմ» ասում է Տէր Մարութէն, խաբելով ծառային, և փողը առնում ծոցն է դնում. ժողո-

վուրդը դարձեալ անգօր տրտունջ և զգւանք է արտայայտում, առանց որևէ գործնական քայլ կարողանալու անել: Տէր Մարութէն յաճախակի ման է գալիս դուքաններում, մի-երկու արասով փող է հաւաքում, իբր թէ աղքատների համար- ժողովուրդը նրան ամենևին չի հաւատում. բայց դարձեալ փողը տալիս է և երեսը զգւանքով միւս կողմը շուռ տալիս: Տէր Մարութէն թէև այդ բո- լորը նկատում է, բայց կոպէկի նշանակութիւն չի տալիս նրանց: Առաւօտեան՝ երբ տէրտէր ու ժողովուրդը եկեղեցի են գնում՝ Տէր Մարութէն եկեղեցու գէմուղէմ գտնւած գինեանից հարբած դուրս է գալիս և փողոցում սաղանդարները քայլ- երգ ածելով նրան կառք են նստացնում ու տուն ճանապարհում: Խեղճ ժողովուրդը սաստիկ ամօ- թից աչքերն է ծածկում ու հեռու փախչում այդ քստմանի տեսարանից: Անցնում են տարիները, Տէր Մարութէն միևնոյն բանը հազար անգամ է կրկնում և ժողովուրդը, վերջապէս, նրան էլ է ընտելանում, ինչպէս ընտելացել է իր մար- մնի խորշերից արիւն ծծող միջատներին:

Այժմ Տէր Մարութէն փոքր բաներով չի սի- բում զբաղել. աւելի մեծ բաների ետևից է նա ընկած. սիրտը սաստիկ փափուկ լինելով՝ որբե- ըին շատ է սիրում մխիթարել, պահել ու պահ- պանել, եթէ միայն այդ որբերը փողաւոր են.

նա շատ է սիրում այդպիսի հարուստ որբերի հա- մար կտակատար նշանակել: Գ. քաղա- քի որ թաղն էլ մտնես՝ մի-երկու տուն անպատ- ճառ ցոյց կըտան, որտեղ փողաւոր որբեր են ապրում և իրանց ապրուստը Տէր Մարութէն են ստանում: Գրանից ջոկ՝ ուրիշ ոչ մի բանով նա այլ ևս չի հետաքրքրում, որովհետև Մինաս ա- դայի և Մ. եպիսկոպոսի մեռնելներուց յետոյ նրա փութը հետզհետէ իջնում է, քթի ծուխն էլ դուրս գալիս և օդի մէջ ցրում: Գինեվաճառ- ներից ու մսավաճառներից ջոկ ոչ ոք նրա հետ ոչ խօսում է և ոչ ընկերութիւն անում: «Մնչ քործ ունի մ» իմաստալից առածին հետևե- լով՝ նա այժմ հանգիստ ապրում է իր համար ե- կեղեցական տան մէջ, որը զօրով է զբաւել, ոչ զրեհ է տալիս և ոչ դուրս գալիս. տարին հինգ անգամ միայն եկեղեցի է գնում, իսկ մնացած օրերը գինեաններում և ուրիշ դրանց համապա- տասխանող հաստատութիւններում է անցկաց- նում: Նրա ծխականների մեծ մասը քաղաքը թո- ղել ու ցրել է շրջակայ գիւղերը. այդ պատճա- ոով Տէր Մարութէն տարին մի քանի անգամ կառք է նստում, գնում-փնտրտում է իր ծխ- կաններին, թէ մեռել կայ՝ մեռելն է թաղում. թէ երեխայ կայ՝ երեխան է մկրտում և կամ տներն է օրհնում ու զրպանները լիքը փողով

վերադառնում քաղաք, որպէս զի երկար չառ-
չառանքն երից յետոյ հանգստանայ ու քէֆ
քաշի...

«Մեռել թաղիր,

«Հացդ կեր.

«Պառկիր, քնիր,

«Ուրախ լեր».

ասում է նա այժմ ամեն օր հաց ուտելիս, քնից
վեր կենալիս... և քը՛ն-քը՛ն ծիծաղում...

VII

Տիրացու Մինասը բէմի առաջ գրքակալն է
բաց անում. ժամկոչ Գաբօն կրակով լիքը բուր-
վառը յանձնում է տիրացու Գալթին. Գասպարն
ու Մելքոնը մի-մի վառած մոմ ձեռներին՝ գրք-
քակալի երկու կողմն են գալիս-կանգնում. Տէր
Մարութէն դառնում է դէպի ժողովուրդը և սկսում
աւետարան կարդալ:

Այդ միջոցին արշալոյսի առաջին ոսկի ճա-
ճանչները բիւզանդական ոճով շինած գմբէթի
լուսամուտներից ներս են թռչում և մի ակըն-
թարթում մուլթ անկիւններն անգամ լուսաւո-
րում: Գմբէթից կախ արած սքանչելի ջահի հա-
րիւրաւոր արծաթեայ մոմկալներն ու բիւրեղեայ

գարդերը ծիածանի վառ գոյներով շարժուն կա-
մարներ են կազմում պատկերազարդ պատերի
վրայ. հրաշալի են նրանք իրանց նուրբ երանգ-
ներովը, բայց մտիկ տուղի աչքերն են խտտում.
խաւարի ծնունդ հողաշէն մարդը չի կարող հա-
մարձակ մտիկ տալ արեւի լոյսին:

Եկեղեցու քարէ յատակի վրայ, որ կողմն էլ
նայես, ծխականների ոտների տակ գոյնզգոյն և
զանազան մեծութեան գորգեր են տարածւած:
Սրբերի պատկերները, որոնցով բոլոր պատերն
էլ զարդարւած են, ոսկէզօծ շրջանակների մէջ
են առնւած. նրանց զգեստները կամ կապոյտ և
կամ վառ-կարմիր գոյներով են նկարւած: Տիրա-
մօր պատկերի շրջանակը հրաշալի է. Ինքը-Տի-
րամայրը ոսկէջրած արծաթով է պատած. մեծ-
մեծ ադամանդներից հիւսած թագը փայլում է
նրա ոսկէ ճաճանչներով շրջապատւած գլխին.
չորս աշտանակներ են դրած առաջը, մոմկալների
մէջ հարիւրաւոր մոմեր են վառւում: Ջրջանակի
ստորին մասում նեղ ու երկայնաձև արկղիկ է
շինած, ապակեայ դռնով. արկղիկի մէջ կողք-
կողքի դարսւած են և կամ մեխերի վրայ կախ
արած՝ արծաթեայ փոքրիկ օրօրոցներ, ոտներ,
ձեռներ, աչքեր ու սրտեր: Ով անգաւակ է, գա-
լիս է եկեղեցի, Տիրամօր պատկերի առաջ ուխտ
է անում, երեցփոխանին փող է տալիս, արծա-

Թեայ օրօրոցը մի քանի օրով վեր առնում իր տունն է տանում, որպէս զի զաւակ ունենայ: Իսկ եթէ մէկի աչքն է ցաւում և կամ սիրտը, այն ժամանակ Տիրամօր աչքը կամ սիրտն է առնում-տուն տանում, որպէս զի առողջանայ:

Գ. քաղաքի ժողովուրդը շատ է հաւատացող. այն օրից, երբ նա, արհեստը թողած, ըսկրսել է գանազան աշխարհներ ման գալ, վաճառականութեամբ պարապել, ինչ տեղ ն ո Ր ք ա ն է տեսնում, իսկոյն փող տալիս-առնում է, իր քաղաքն է բերում ու նւիրում իր հարազատ եկեղեցուն. ինչքան թանկագին խաչեր ու խաչվառներ, բուրվառներ ու սաղաւարտներ, շուրջառներ ու պատարագի զգեստներ նա հեռու տեղերից բերել է և բերում է ու նրանցով զարդարում իր քաղաքի եկեղեցիները... արդեօք դա պարզ ապացոյց չէ՞ որ նրա հաւատը դեռ ևս շատ է վառ, շատ է լայն...

Ժամկոչ Մաթոսը խցիկից դուրս է գալիս, տատմէր Մրօյին է տեսնում հեռւից ու մօտենում.

—Քէֆդ հնց ա, ա քիր.

—Աչքդ լիս, Մաթոս, էլի բաղդդ կտրեց.

—Ի՞նչ ա որ, մեռել ա.

—Ո՛վ.

—Թխմագենց հարսը.

—2է, Մաթոս, առողջացել ա, 50 տարի հալա կրսպասես. թէ դու չուտես նրա քէլէխի հացը, ես քոնը հօ կուտեմ ու կուտեմ: Տատմէր Մրօն մտնում է եկեղեցի:

—Չահրումար ուտես, անպոչ սատանայ, մըթմըթում է Մաթոսը նրա ետեւից և իսկոյն բուրնոթու տուփը փնտրտում:

—Մաթոս, լսում է յանկարծ մի խիստ ու բարակ ձայն.

—Հրամայիր, տէրհայր, բղաւում է Մաթոսը և գժի նման վազում դէպի տէրտէրների սենեակը. կանչողը Տէր Խաչատուրն է, ամենքի սարսափը: Ոտի մատները վրայ միայն կոխելով՝ Մաթոսը մօտենում է, պատկառանքով նրա աջն է համբուրում, ոսկէջրած արծաթեայ գլխով գաւազանը ձեռից առնելով՝ զգուշութեամբ տանում իր սփորական տեղն է դնում և, կրկին վերադառնալով՝ հեռանց կանգնում Տէր Խաչատրի առաջ. ձեռները կրծքի վրայ է խաչել Մաթոսը, շիտակ ու շիւ աչքերն էլ տէրհօր դէմքին բեռեւէ: Տէր Խաչատուրը աջ ձեռով մի քանի անգամ ճաղատ գլուխն է շոյում, յետոյ թևի միջից կարմիր թաշկինակն է դուրս բերում և նրանով սկսում մեծ, հաստածայր և ուռուցիկ քիթը մաքրել:

Տէր Խաչատուրը 62 տարեկան ժիր ծերունի է, կարճահասակ, փոքրիկ սպիտակ միջուքով

ու բլրակաձև փորով. աջ ուսը ձախիցը բարձր է. բերնում միայն մի սևացած ատամ է մնացել- ձախակողմեան ժանիքը. մետաքսեայ թանկագին վերարկու է նա հագել, լանջին երկու ոսկէզօծ խաչեր է կրում. ձախ կրծքի վրայ էլ մի ինչ որ շքանշան է գունաւոր ժապաւէնի ծայրին կախ արել. փոքրիկ գլխին ահագին թաւշեայ կամիլաւկա է դրել, իսկ դէմքի արտայայտութիւնը խոփոք է և անհամբոյր:

— Բաղալը սրտեղ է, յանկարծ նա դառնում է Մաթոսին.

— Եկեղեցումն է, տէրհայր.

— Կանչիր, հրամայում է նա և նորից քիթը կոխում թաշկինակի մէջ: Մի ըոպէ շանցած՝ Մաթոսը մուխսի Բաղալի հետ երևում են սենեակի դրան մօտ:

— Մուխսի, ասում է Տէր Խաչատուրը, ձայնը մեղմացնելով.

— Ծառադ եմ, հրամայիր, տէրտէր ջան, պատասխանում է մուխսին խորը գլուխ տալով և նրա աջը առնելով:

— Քանի անգամ եմ ես քեզ ասել, օրհնած, որ դու էս անիծւածին մի քիչ խրատես. նա ձեռով Մաթոսին է ցոյց տալիս: Բաղալը, ոչինչ չհասկանալով, շժմածի նման մէկ նրան է մտիկ տալիս, մէկ էլ Մաթոսին: Վերջինը, թէև հաս-

կացել է թէ բանը ինչուան է, բայց, միամիտ ձևանալով, ճիգ է թափում, որպէս զի իր շիւ աչքովն ևս երկիւղախառն զարմացք արտայայտէ:

— Այսօր կէնտ զանգը քանի անգամ խփեցիր, հարցնում է նրան Տէր Խաչատուրը:

— 24 անգամ, տէրհայր.

— Սուտ ես ասում, 15 անգամ խփեցիր, ես քեզ ասել եմ որ կիրակի ու տօն օրերը 24 անգամից պակաս չխփես:

— Արևս վկայ, տէրհայր, ես միշտ 24 անգամ եմ խփում. էդ Գաբօն կրլի պակաս խփած.

— Զանգը էսօր դու խփեցիր, հարցնում է Գաբօյին Տէր Խաչատուրը: Վերջինը ուզում է պատասխանել, բայց տեսնելով որ Մաթոսը աչքունքով նրան ինչ որ նշան է տալիս, լուռութիւն է պահում:

— Կորիր աչքիցս, փուշ կենդանի, դուրս կանեմ քեզ, եթէ մի անգամ էլ զանգը պակաս խփես, բղաւում է Տէր Խաչատուրը. Գաբօն ոտների մատների վրայ դուրս է գալիս սենեակից:

— Էլի կրկնում եմ, Մաթոս, կիրակի ու տօն օրերը կէնտ զանգը 24 անգամից պակաս չխփէք:

— Հրամներես, տէրհայր.

— Մուխսի,

— Հրամայիր, տէրտէրջան.

— Բառաշենց Ակոբի կնիկը ազատելի ա, ջուխտակ մանչ տղայ է ծնել. էսօր նրանց տնից երկու մատաղացու ոչխար կըբերեն. լսում ես...

— Լսում եմ, տէրտէր ջան, ոչխար կըբերեն.

— Երկու ոչխար.

— Հրամներես, երկու ոչխար.

— Հա, երկու ոչխար. քու աչքի առաջ երկուսին էլ մորթել կըտաս. մի ոչխարի մորթին ու վլուխը, համ էլ ետևի քառորդամասը մեր տունը կուղարկես, պատարագչի ու միւսների բաժիններն էլ իրանց կըտաս: Մնացածը եկեղեցու մատաղատանը թող եփեն. պատարագից յետոյ մեր ուտելու բաժինը թող այստեղ բերեն, իսկ միւս մասը Գաբօն եկեղեցու զբանը ժողովրդին թիքա-թիքա թող բաժանի. հասկացար...

— Հասկացայ, տէրտէր ջան.

— Ապրիս, դէ, գնա բանիդ:

Բաղալը գնում է. Տէր Խաչատուրը, մի անգամ էլ քիթը թաշկինակի մէջ կոխելուց-հանելուց յետոյ, մտնում է վերջապէս եկեղեցի: Տիրացու Սիմօնը իսկոյն առաջ է գալիս և հանդիսաւոր կերպով ծաղկեայ փիլոնը տարածում նրա ուսերի վրայ. Տէր Խաչատուրը դասն է բարձրանում և սկսում աղօթել:

VIII

Ժամանակով Տիրամօր եկեղեցում լինում է Տէր Թոմաս անունով մի քահանայ: Այդ քահանան ունենում է Ջաքար անունով մի պատանի ծառայ: Մի անգամ Տէր Թոմասը, ուշ գիշերին զարթնելով, ինչ որ խեղդուկ ձայն է լսում. այո, լսում է նա այդ ձայնը և զարգանդում. նրան այնպէս է թւում, իբր ոգիները նրա տանը հաւաքած ժամասացութիւն են անում: Մաստիկ երկիւղից Տէր Թոմասը ականջները խցելով՝ գլուխը երկու բարձերի մէջտեղն է խրում և այդպէս քնում մինչև արշալոյսի բացւելը: Միւս գիշերը նոյն ժամին նա զարթնում է կրկին և լսողութիւնը լարած երկար ու բարակ սպասում... և ահա, խորը տեղից, ինչպէս ջրհորի միջից, էլի նոյն խուլ ձայնն է նա լսում... Ժամանակ-ժամանակ այդ ձայնը ուժեղանում է և Տէր Թոմասը բաւական պարզ արդէն լսում է հետևեալը.

— Գան-ձըդ ող-որ-մու-թե-ան, գան-ձիդ ծածկե-լոյն գտ-ող զիս ա-րա...

Անծանօթ ձայնը տասը անգամ միևնոյնը կրկնում է ու լռում:

Տէր Թոմասը երկար մտածում է, թէ ով պէտք է լինի այդ ասողը. վերջապէս, հանգստանում է այն մտքի վրայ, թէ երևի ներքին յար-

կում մի ջերմեռանդ պառաւ գիշերները զարթնում է և աղօթում: Մի քանի օր ձայնը չի լրսւում. բայց անա մի գիշեր Տէր Թոմասը նորից լսում է միևնոյնը, և աւելի պարզ. ձայնը այժմ աւելի ուժեղ է դառել և վանկերը շուտ-շուտ է արտասանում.

— Գանձդ ողորմութեան՝ գանձիդ ծածկելոյն գտող զիս արա: Գանձդ ողորմութեան՝ գանձիդ ծածկելոյն գտող զիս աբա և այլն և այլն... անդադար միևնոյնը կրկնում է: Յանկարծ Տէր Թոմասի մտքովը Ջաքարն է անցկենում, նրա ծառան, որը տէրհօր կարծիքով անգրագէտ պէտք է լինէր: Իսկոյն նա ցատքում է տեղից, վերարկուն ուսերին է գցում, ոտները մաշիկների մէջ է խրում, յուշիկ քայլերով Ջաքարի սենեակին մօտենալով՝ դրան ճեղքից ներս է նայում. տեսնում է ինչ... Ջաքարը սպիտակեղէնը հագին յատակի վրայ ծնկաչոք աղօթում է. աչքերը անթարթ երկնքին են յառած. երեսին արցունքի հետքեր են նշմարւում, ինքնիրան կորցրածի է նա նմանում... դէմքը՝ մերթ սաստիկ վիշտ կամ բարկութիւն և մերթ կատաղի յոյս կամ յուսահատութիւն է արտայայտում... ձայնը՝ մերթ ոյժ առնումբարձրանում է և մերթ թուլանում ու շնչոցի փոխւում. իսկ շրթունքները անընդհատ և սաստիկ արագութեամբ շարժւում են և արտասանում.

— Գանձդ ողորմութեան՝ գանձիդ ծածկելոյն գտող զիս արա: Գանձդ ողորմութեան՝ գանձիդ ծածկելոյն գտող զիս արա:...

Տէր Թոմասը այս անգամ սաստիկ է զարգանդում. սկսում է դողդողալ և շատ որոշակի զգում է, որ նրա մարմնի վրայ բուսած մագերը՝ վզաքոքից սկսած մինչև մէջքը՝ ցցւեցին ու խըլխըլացին, ինչպէս հարիւրաւոր մըջիւններ: Այնուամենայնիւ նա ինքնիրան հաւաքում է, սուս ու փուս ետ է դառնում և թուլացածի նման ընկնում անկողնի մէջ:

Միւս օրը Տէր Թոմասը Ջաքարին հարց ու փորձ է անում, ուշադրութեամբ մտիկ է տալիս նրա նիհար դէմքին, բերնից հանած խօսքերին և համոզւում է որ նրա առաջ բացառիկ ընդունակութիւնների տէր մարդ է կանգնած: Գուրս է գալիս՝ որ Ջաքարը թէ կարդալ-գրել գիտէ և թէ մանաւանդ շատ պատմութիւններ ու առածներ. կեանքումը ինչ որ լսել է՝ բոլորն էլ վեր առել պինդ պահել է իր հրաշալի յիշողութեան մէջ: Տէր Թոմասի հարցին՝ թէ ինչո՞ւ անդադար կրկնում էր «Գանձդ ողորմութեան, գանձիդ ծածկելոյն գտող զիս արա» նախադասութիւնները՝ Ջաքարը պատասխանում է, թէ աշխարհումս չար սահաթ կայ, բարի սահաթ կայ. եթէ վերոյիշեալ խօսքերը բարի սահաթին

հանդիպեն՝ այն ժամանակ Աստուած մարդու ուզածը իրան կրտայ: Տէր Թոմասը այդ մտքի հետ ես համաձայնում է և մի քանի շաբաթից Չաքարին շինում իր տիրացուն: Կեանքը այն ժամանակներում հրաշալի էր, ամեն ինչ պարզ էր և ամեն ինչ հասարակ. 3 գրւանքայ սոխը մի կոպէկով էին առնում, կօշկակարին տէրտէր էին ձեռնադրում, 10 հատ ձուի համար 2 կոպէկ էին տալիս, մի գրոշ էլ ետ էին ստանում. ծառան տիրացու էր դառնում, խիարի հարիւրը մի արասուց դէն չէր գնում, միկիտանը սարկաւազ էր ձեռնադրւում, իսկ արշինանոց թագա ձուկը, էն որ ջրից հանել են ու դեռ բոլորովին չեն հանել, 5 կոպէկով առնում, խորովում էին ու սարկաւազի տանը քէֆ անում... լաւ օրեր էին, բայց անցան...

Տէր Թոմասը իր հաշւի մէջ չի սխալւում. Չաքարից օրինակելի տիրացու է դուրս գալիս. ամօթխած, աշխատասէր, հնազանդ ու համբերող. այդ վերջին յատկութիւնը նրա մէջ այնքան էր զարգացել, որ նրա համբերութեան և իղէալական համբերութեան միջև համարեա մի մագ էր միայն մնացել. եթէ կարողանար՝ Չաքարը այդ մագէ կամուրջն էլ անց կըկենար: Եթէ համադանի ականջեղ մոխրաթաւանները նախանձելու ընդունակ լինէին՝ շատ շուտով կը-

խղճահարւէին, տեսնելով Չաքարի համբերութեան չափն ու սահմանը... այո, կըխղճահարւէին և միազրդո հաւանութեամբ եօն ջայից դափնիներ կըհիւսէին ու նրանցով կըպսակէին Չաքարի չարքաշ ճակատը: Երկու-երեք տարւայ ընթացքում տիրացու Չաքարը ժողովրդի սիրելին է դառնում: Ուղիղ է, նա ձայն չունի, եղանակ էլ չունի, լեզուն էլ ծանր է շարժւում բերնի մէջ, վախից թէ ինչից վախտ վախտ պապանձւում է, այնուամենայնիւ ժողովուրդը նրան համակրանք և մի տեսակ օտարոտի կարեկցութիւն է ցոյց տալիս: Տիրացու Չաքարը ամենից վաղ է եկեղեցի գալիս և ամենից վերջը դուրս գալիս. տանը եկեղեցական գրքեր է միայն կարդում, իսկ եկեղեցու բակը նրա միակ գրօսավայրն է դառնում. խորին հաւատը, որով նա տոգորւած է երևում, նրա բոլոր շարժումներին, խօսքերին ու գործերին, կարծես, մի տեսակ վեհութիւն է տալիս և մի տեսակ խորհրդաւորութիւն:

Երբ որևէ հարուստ ծխականի տանը խնջոյք է լինում, Տէր Թոմասը տիրացու Չաքարին էլ է անպատճառ հետը տանում: Ուղիղ է, Չաքարի հետ աղաները առհասարակ չեն խօսում, բայց նա այդ բանի մէջ ոչ մի անյարմարութիւն չի տեսնում. ժամերով մի տեղում լուռումունջ

նստած՝ նա սփռոցի գոյնզգոյն թելերն է եղունգի ծայրովը տնտղում, ճանճերի համարձակ թռիչքներին է աչքերովը հետևում, հարուստ մարդկանց մատները վրայ փայլող ոսկեայ մատանիների քաշը և ադամանդների գներն է մտքումը որոշում, ուրիշների հետ ինքն էլ է ծիծաղում՝ առանց պատճառը իմանալու, կենացներ է խմում, իր բաժակը ուրիշների բաժակների հետ է չրխկացնում, ուրիշների հետ ինքն էլ է նստում, վեր կենում, մի խօսքով տիրացու Ջաքարը առանց զբաղմունքի չի մնում: Եթէ Տէր Թումասը բուրնոթու տուփը մի տեղ դրած ու մոռացած է լինում, Ջաքարը իսկոյն թռչում է տեղից, որտեղիցորէ տուփը գտնում, բաց անում ու դնում է նրա առաջ: Նրա այդ պատրաստականութիւնը աղաներին շատ է դուր գալիս, նրանց քէֆն է բերում: Եթէ Պօղոս աղան լաւ կօնծելուց յետոյ գուռնա է պահանջում, բայց գուռնաչին տանը չի լինում, այն ժամանակ Տէր Թումասը Ջաքարին ունքերովը նշան է տալիս. նա էլ, հասկանալով թէ ինչ է ասում տէրհայրը, իսկոյն ձգւում է նստած տեղում, երկու-երեք անգամ հագում ու կոկորդն է մաքրում, աչքերը գցում առաստաղին և երկար ու բարակ երգում այն ամենը՝ ինչ որ իմանում է: Քանի նա երգում է, հանդիսականներն էլ, առանց նրան լսելու, գոռում են և բղաւում, խօսում են ու ծի-

ծաղում. բայց հէնց որ տիրացու Ջաքարը, շատ երգելուց յոգնելով, մի ըոպէ լռում է, որպէս զի կարգին շունչ քաշէ, հանդիսականներն էլ նոյնպէս լռում են և պահանջում որ տիրացուն շարունակէ երգել. և նա շարունակում է, կոկորդը միայն ժամանակ-ժամանակ գինով թացացնելով: Մի գեղեցիկ օր Տէր Թումասը տիրացու Ջաքարին մի սիրուն աղջկայ հետ պսակում է, ինքն էլ նրա հարսանիքին լաւ քէֆ է քաշում. պէտք է յիշել որ Տէր Թումասի այրիանալը շատ տարի է: Տիրացու Ջաքարը պսակելուց յետոյ հետըհետէ փոխւում է. կնկայ բազմաթիւ ազգականները սկսում են նրա մօտ յաճախել, ինքն էլ նրանց մօտ է յաճախում, խմում է շատ, ուտում է նոյնպէս շատ և դառնում է շատակեր. բարակ փորը ճարպոտւում ու բլրակի ձև է ստանում. աչքերը կարմրում են ու փոսիկների միջից դուրս ցցւում. ինքը դառնում է համարձակ ու շողակրատ: Ուտելու և խմելու մէջ չափազանց առաջադիմելով՝ նա մինչև անգամ նոր ճաշակ է մըտցընում իր մօտիկ ազգականների շրջաններում. նա շատ է սիրում ուտել այն պատառը, որը նրա անունով կոչւում է *գ ա ք ա ը ե ա ն թ ի ք ա*. դա՛ սպիտակ հացի պատառ է, որի վրայ Ջաքարը նախ երկու շերտ գոմշի սերից եփած *գ ա յ մ ա դ* է դնում, նրա վրէժն երեք զթալ վարդի մուրաբա

է ածուս, նրա վրայ էլ դնում է խաւեարի մի հաստ շերտ. գրագ է գալիս և այդ շորս յարկանի թիքան, ազատօրէն բերանը կոխելով, մի ընկնում խժրում է, առանց որևէ վշտանք թողնելու միրուքի վրան: Երբ տիրացու Ջաքարի որևէ ազգականի տանը ժամանակ-ժամանակ մրցակից է դուրս գալիս և վերոյիշեալ գաքարեան թիքան ձեռին բռնած՝ նրան ասպարէզ է կանչում, այդ դէպքում Ջաքարը մեծ ճարպիկութիւն է ցոյց տալիս. պատառը ձեռին՝ հեգնելով ասում է նա իր հակառակորդին.

«Եւ դու պարսիկ ախոյեան,

«Պարեն կուլ տալ զթիքան.

«Հապօն, արի ի մէյդան...

Հանդիսականները իսկոյն շրջապատում են Ջաքարին և նրա ախոյեանին: Թիքան բերնին մօտեցնելով՝ Ջաքարը ասում է.

«Մ'ոտ ի տուն տեառն-ի բերան»:

Եւ յանկարծ տեսնում են որ Ջաքարի բերանը արդէն դատարկած է. մինչդեռ պարսիկ ախոյեանը թիքայի կէսը խժրած, կէսը չխժրած, սկսում է սաստիկ հազալ և քիչ է մնում խեղդելի: «Կ ե ց ց է» բղաւում են հանդիսականները, ծիծաղից թուլանալով, և իսկոյն Ջաքարի կենացը խմում. իսկ երեխաները՝ խմբովին հաւաքւած Ջաքարի փորի առաջ՝ բոլոր ժամանակը ակնա-

ծութեամբ մտիկ են տալիս նրա փոր ու բերնին և համեմատում իրայինների հետ: Ասենք Ջաքարը միայն շատ մօտիկ ազգականների տներում էր իրան թոյլ տալիս մրցել ախոյեանների հետ. իսկ օտարների առաջ նա միշտ միևնոյն ամօթխած ու համեստ տիրացուն էր:

Ջաքարը իննը տարի միայն տիրացութիւն է անում. տասներորդ տարւայ սկզբին՝ Տէր Թոմասը նրան տէրտէր է ձեռնադրել տալիս. տիրացու Ջաքարը դառնում է Տէր Խաչատուր և սկսում ծուխ հովւել. չար լեզուները ասում են՝ իբր նրա տէրտէր լինելու միակ պատճառը սիրունիկ կնիկն է եղել: Ի ուր պէտք է տեսնէիք թէ ինչպէս ամօթխած ու համեստ էր պահում իրան Տէր Խաչատուրը առաջին տարիները. ինչպիսի ջերմեռանդութեամբ էր նա պատարագ մատուցանում. ինչպիսի նազուկ շարժումներով էր բուրվառում՝ սրբերին, քահանաներին և ադա ծխականներին. նախ՝ խորը երկրպագում էր, յետոյ երեք անգամ բուրվառում ու կրկին երկրպագում: Թաբախ ման ածելիս՝ աչքերը եկեղեցու պատերին էր գցում. ժամուց ստանալիս՝ փողը ձեռի միջում չէր շօշափում, այլ յուշիկ շարժումով տանում ուղիղ գրպանն էր գցում. իսկ մատաղամիս ուտելիս՝ բոլոր քահանաներից յետոյ էր թիքա վերցնում: Եկեղեցուց դուրս էլ

Տէր Խաչատուրը իրան օրինակելի էր բռնում. խօսում էր առհասարակ քիչ և հազիւ լսելի ձայնով. քայլում էր ծանր. հարուստ ծխականներին 20 քայլ հեռաւորութիւնից էր բարևում. մեռելահաց ուտելիս՝ փոքրիկ թիքաներ էր վերցնում. իսկ ծամելիս՝ նրա ուժեղ ծնոտները հազիւ էին շարժւում: Նորընծայ Տէր Խաչատուրը շատ անգամ սաստիկ ամօթխածութիւնից դժւարանում էր թիքաները կարգին կուլ տալ և ինքնիրան խեղդւելու վտանգին էր ենթարկում. թիքան կոկորդի խոռոչներում կծկւելով՝ ոչ ցած էր գնում և ոչ վեր բարձրանում. Տէր Խաչատուրը հազում էր սաստիկ, աչքերը կոպերից համարեա դուրս էին գալիս, արցունքի կաթիլները միբուրքի ծայրից կաթ-կաթ թևի վրայ էին թափւթփում, և միայն որևէ գլթառատ հարևանի փրկարար բռունցքն էր որ այդ բոպէին օգնութեան էր շտապում, մի քանի ծանրակշիռ հարւածներ էր իջեցնում Տէր Խաչատրի ծոծրակին ու փորձանքի առաջը առնում: Տիրացու Զաքարը Տէր Խաչատուրը դառնալուց յետոյ հաւատն ու ջերմեռանդութիւնը կրկնապատկում է: Երբ պատարագ անելու հերթը նրան է գալիս, ամբողջ շաբաթ-լայ ընթացքում՝ երեկոններին եկեղեցու բակում մենակ «ե կ ե ս ց է» է ասում, իսկ առաւօտեան՝ տեղից շատ վաղ վեր կենալով՝ սաղմոս է քա-

ղում իր առանձնասենեակում: Պատարագից առաջ նա ոչինչ չի ուտում՝ ոչ պանրով հաց, ոչ էլ կաթնով թէյ. կօշիկով սեղանի վրայ բարձրանալը սրբապղծութիւն է համարում, իսկ պաս ուտելը մահացու մեղք: Պատմութիւններ շատ է նա իմանում, մանաւանդ ճգնաւորների կեանքից, և սիրում է երկար ու բարակ պատմել. իր պատմածին նա ինքն էլ է հաւատում, լսողներն էլ են հաւատում. այդ պատճառով պատմածքի վերջը միշտ սրտաշարժ է լինում. ինքն էլ, լսողներն էլ արտասուում են: Եւ ահա մի օր նա նոր միտք է յղանում՝ գրել իր իմացած պատմութիւնները ու տպել տալ. մի քանի երես մինչև անգամ գրում է, բայց յանկարծ մտաբերում է որ այդ բոլորը կարելի է Այսմաւուրքից քաղել. այդպէս էլ նա անում է. մի գիրք է կազմում, անունը դնում է «Վարք Սրբոց» ու տպել տալիս: Գ. քաղաքում այն ժամանակները գիրք ասած բանը հազւագիւտ մի գարդ էր համարւում. և յանկարծ լուր է տարածւում թէ Տէր Խաչատուրը գիրք է հնարել. նրա անունը, հեղինակութիւնը միանգամից բարձրանում է. նա էլ օգտւելով այդ հանգամանքից՝ պատահողի ձեռին մի-երկու օրինակ Վարք Սրբոց է տալիս: Տգէտ ժողովուրդը ամաչելով փողը տալիս ու գիրքը վեր առնում տուն է տանում, մի քա-

նի անգամ նրան ձեռներէ մէջ շուռ է տալիս, մեծ ու ծաղկատառերն է կէնտ-կէնտ արտասանում և յետոյ, կարգալուցը սաստիկ յողնելով, ծածկում է գիրքը, տալիս է կողակցին ու ասում.

— Վեր առ, Վարդուհի, էս գիրքը Տէր Խաչատուրը ինքն ա գրել... ասում ա՛ Սրաբիոն ճրգնաւորի պատմութիւնն էլ ա սրա միջումը. մեծ ուսում ունի, ինչ ուզում ես, ասա, գիրք ա հնարել մարդը, հանաք բան չի... տնօրհնէնքի որ գայ՝ մի ըուբլու տեղաք երկուսը պէտք ա տւած, մէկէլ տէրտէրների թայը հօ չի...

— Հալբաթ որ, պատասխանում է Վարդուհի խանումը և գիրքը վեր առնում պահարանի խորը գցում, որտեղից միայն մկները, տարիների ընթացքում քիչ-քիչ ուսումնասիրելով, ամբողջգիրքը համեղ կազմի հետ միասին իրանց փոքերն են տեղափոխում: Տէր Խաչատրի ծուխը, նրա մօտիկ և հեռու ազգականները «Վարք Սըրոց»ի պատճառով սկսում են աւելի պատուով վերաբերել դէպի նա. մսավաճառները, ձկնավաճառները, դուքանչիները և արհեստաւորները, մէկ-մէկու առաջ կտրելով, համարեա ամեն օր խընդրում-աղաչում են ու Տէր Խաչատրին իրանց մօտ հացի տանում: Այդպիսով նրան յարգողների շըրջանը գնալով աւելի և աւելի է ընդարձակւում.

նա դառնում է աւելի համարձակ, սկսում է ծխականների տներում պատմութիւններ պատմել, քարոզել, խրատել ու զանազան խորհուրդներ տալ. միևնոյն ժամանակ բոլորից էլ խստիւ պահանջում է՝ պասպահել, եկեղեցի յաճախել, Աստըծու տւած բարիքներից եկեղեցուն ևս բաժին տալ: Այդ միջոցներում մեռնում է Տէր Թումասը. նրանից մի քանի տարի առաջ էլ մեռել էր Տէր Գէորգը, որի ծուխը առժամանակ միւս քահանաները բաժանել էին իրանց մէջ և հովւում: Տէր Թումասի ծխականներից նրանք, որոնք նոր հարստացած ու աղա դարձած մարդիկ էին, Տէր Խաչատրի հետ մտերմացած լինելով, դառնում են նրա ծուխը. մնացած ծխականների վրայ մի ինչ որ տիրացու, որը լուութիւն պահելու մէջ մեծ հմտութիւն էր ցոյց տալիս, տէրտէր է ձեռնադրւում, ստանալով Տէր Յովակիմ անունը. իսկ հանգուցեալ Տէր Գէորգի ծուխին գալիս զօրով տէր է դառնում Տէր Մարուքէն. շորը քահանան Տէր Բարսամն է, որից Տէր Խաչատուրը չի քաշւում ամենեին. այդպիսով Տիրամօր եկեղեցու 4 քահանաներից Տէր Խաչատուրը դառնում է ամենահեղինակաւորը և ժողովրդի ամենասիրելին: Ծերունի Յովհաննէս աղան, որը շատ տարի է երեցփոխանութիւն է անում և մոմերի հաշիւը պահելուց ջոկ ոչ մի բանի չի

խառնուում, Տէր Խաչատրի համար աւագութեան իրաւունք է բերել տալիս: Անցնում են 20 երկար տարիներ. այդ միջոցում Յովհաննէս աղան էլ է մեռնում և այն հին աղաներն էլ են մեռնում, որոնք բարձրից էին նայում Տէր Խաչատրի վրայ. այդպիսիներից մի քանիսն էլ սրնանկանալով՝ ասպարէզից դուրս են գալիս. իսկ գլխեմբարների, մսավաճառների և զանազան դուքանչիների միջից, որոնք Տէր Խաչատրի հետ, ինչպէս հարազատ եղբօր հետ, մտերմացած էին վաղուց, նոր-նոր աղաներ են դուրս գալիս և հասարակական գործերի դեկը առնում իրանց ձեռները. լինելով բոլորովին տգէտ՝ այդ աղաները առանց Տէր Խաչատրի խորհրդէն ելին ոչինչ չէին կարողանում անել. ահա այդտեղ արդէն Տէր Խաչատուրը, տեսնելով որ ասպարէզը միայն իրան է մնացել, դիմակը դէն է գցում և դառնում է այն, ինչ որ էր սրտի խորքումը: Ամօթխած Տէր Խաչատուրը դառնում է անամօթ. ջերմեռանդը—ծիսամոլ. համբերողը—հալածող և հնազանդը—խստապահանջ: Ով նրա առաջ դողալով է կանգնում, կոյր հնազանդութիւն է ցոյց տալիս, նրան էլ Տէր Խաչատուրը առաջ է քաշում, հասարակութեան մէջ որևէ պաշտօնի արժանացնում. այն երիտա-

սարդներին, որոնք Մոսկայում ուսում են առնում և ամառային արձակուրդներին Գ. քաղաքը գալով հասարակական գործերով են սկսում հետաքրքրւել, Տէր Խաչատուրը սաստիկ է ատում և թոյլ չի տալիս, որպէս զի նրանք էլ իրանց կարծիքները յայտնեն այս ու այն հասարակական հարցի վերաբերմամբ: Այժմ Տէր Խաչատուրը երկու փառաւոր տներ ունի շինած Գ. քաղաքի լաւ փողոցներից մինի վրայ. բոլոր պետական ուսումնարաններում կրօն և լեզու է աւանդում, թէև աշակերտները, 6-7 տարի սովորելուց յետոյ, երբ ուսումնարանից դուրս են գալիս, վանկեր կապելով հագիւ են կարողանում կարգալ: Քաղաքում գտնւած բոլոր հասարակական հաստատութիւնների մէջ Տէր Խաչատուրը կամ նախագահ է, կամ հոգաբարձու և կամ պատուաւոր անդամ. իսկ հոգևոր կառավարութեան վրայ նա նայում է՝ ինչպէս իր սեփական դուքանի վրայ: Կոնսիստորի քարտուղարը, առաջնորդը, սիրնողի անդամները նրան յարգելով-յարգում, սիրելով-սիրում են. նրանց յարգանքներին ու սիրուն գաղտնիքը Տէր Խաչատուրը մենակ ինքն է իմանում. թիկը տւած այդ շինական պարսպին՝ տասնեակ տարիների ընթացքում նա ամբողջ Գ. քաղաքը սուսիկ-փուսիկ իր շնչին ես-ին է ծառայեցնում: Յովհան-

նէս աղայի մեռնելուց յետոյ Տէր Խաչատուրը շատ է շարձարւում և Մարկոս աղային նոր երեցփոխան է հաստատել տալիս, որը մինչև այժմ էլ վարում է այդ պաշտօնը և գուցէ մինչև մահն էլ մնայ այդ պաշտօնի մէջ: Մարկոս աղան Տէր Խաչատրի շատ մօտիկ բարեկամն է. նա շարչիութիւնից է սկսել իր գործը, վաշխառութեամբ էլ, կարծեմ, ուզում է վերջացնել. ստոր, կեղտոտ և գող արարած է Մարկոս աղան, բայց Տէր Խաչատրի կամքը նրան սրբագործել է ժողովրդի աչքում:

Գ. քաղաքի միւս եկեղեցիների քահանաներն ու տիրացուները այնքան խեղճ են, որ նրանց մասին խօսելը ժամանակի կորուստ է միայն: Տէր Խաչատուրը այդ եկեղեցիների համար երեք թէ չորս քահանայ է ձեռնադրել տւել. բայց ինչպիսի մարդիկ է ընտրել և ինչպէս է նրանց պատրաստել այդ կոչումի համար... գիւղերից փախած, բթամտութեան համար ամեն տեղից քստրւած խղճուկ և անգրագէտ արարածներ են դրանք: Տէր Խաչատուրը նրանցից ամեն մինին նախապէս 10-15 տարի շարունակ իր աչքի առաջ ամեն օր ծառայեցրել է՝ թէ իբրև ծառայ, թէ իբրև տիրացու, թէ իբրև ստորաբարշ գրագիր և թէ իբրև լրտես ու մատնիչ. ամեն մինի հոգու, սրտի, փորի, աղիքների, լեար-

դի ու երիկամունքների խորն է քրքրել, ինչ որ մարդկային է գտել, բոլորը անխնայ ոչնչացրել է և յետոյ միայն տէրտէր է ձեռնադրել տւել, վստահ լինելով որ նրանք այնուհետև նրա համար սուերներ կըլինեն միայն և ոչ բանական արարածներ:

— Հայրիկ, ինչ նշանաւոր գործեր է արել Տէր Խաչատուրը, որ այդքան խաչեր ու շքանշաններ է կախում կրծքին, հարցնում է մի անգամ Մոսկւայում սովորող մի խելօք պատանի իր հօրը:

— Ի՞նչ գործ ես ուզում, իշու ձագ, պատասխանում է նրա հայրը բարկացած. — Ինչ վնաս արեց տալիս Տէր Խաչատուրը իր խաչերովն ու շքանշաններովը: Մեր եկեղեցու աւագ քահանան ա, ամօթ չի մեզ համար որ գոնէ մի հատ փ առ աւ ու ու զարդարուն քահանայ չունենանք վերևի դասումը կանգնած. բալամ, ուսում ես առել, բայց, ինչպէս տեսնում եմ, հաւատդ պակասել ա... Տէր Խաչատրի նման խելօք մարդ ըսկի Մոսկովումն էլ չես գտնի, հաւատա էջմիածնումն էլ որ փնտրես՝ մէկ կասես ու կրկանգնես... վեր առ Վ ա ը ք Ս ը բ ո ց ը ու կարդա, տես, թէ ինչ ա գրել Տէր Խաչատուրը... Մի անգամ մի ուսումնական քահանայ է գալիս Գ. քաղաքը մասնաւոր գործով, մի քա-

նի շաբաթ նա մնում է այդտեղ. կիրակի և տօն օրերին նա Տիրամօր եկեղեցին է յաճախում: Մի կիրակի օր նրա և Տէր Խաչատրի մէջ կռիւ է ծագում. ուսումնական քահանան բէմին մօտենալով ինչ որ մաղթանք է սկսում ասել. բայց Տէր Խաչատուրը մատուռից դուրս վազելով բօթում է նրան և ուզում է մաղթանքը ինքն ասի. հակառակորդը, աւելի ուժեղ լինելով, մնում է տեղումը կանգնած և հեռանում է միայն այն ժամանակ, երբ սկսած մաղթանքը վերջացնում է. բայց այդ նրան թանկ է նստում, որովհետև հետևեալ կիրակին Տէր Խաչատուրը արգելում է նրան դասը բարձրանալ. քահանան հոգևոր կառավարութեան գրաւոր բողոք է ներկայացնում. բայց շուտով ստիպւած է լինում թողնել Գ. քաղաքը և հեռանալ, տանելով իր հետ և գրաւոր բողոքը: Այդ դէպքը երկու-երեք շաբաթ խօսակցութեան առարկայ է դառնում քաղաքում. բայց նոր երեցփոխան-Մարկոս աղան շատ շուտով կարողանում է պղտորւած մտքերը պարզել ու հանգրստացնել:

— Տէր Խաչատուրը լաւ չվարւեց քահանայի հետ, ասում է Պօղոս աղան խնջոյքում.

— Իհարկէ լաւ չվարւեց. եղբայր, ինչպէս կարելի է, մարդը ուսումնական է, միթէ կարելի է այդպէս նրան բօթել, նկատում է Սողոմոն աղան.

— Տէր Բարսամին հօ ամեն օր է բօթում, մարդը ըսկի ձէն չի հանում, նկատում է խորամանկ Գալուստ աղան.

— Ինչ էք դուրս տալիս, ինչ ա պատահել, դուք էս ասէք միայն՝ ոչխարն ա լաւ թէ գայլը, մէջ է ընկնում Մարկոս աղան.

— Իհարկէ ոչխարը, պատասխանում են նրան դէսից-դէնից.

— Գրծաւ գնաց... ուսումնական տէրտէրը գայլ ա, հասկանում էք թէ չէ, ձեռաց կրկծի ու կուտի...

— Հալբաթ իր... մրթմրթում է տանուէրը. Մարկոս աղան շարունակում է.

— Էլի Տէր Բարսամը բոլորիցը լաւ ա, ոչխարի նման հանգիստ ա իրան պահում. ուզում ես՝ դմակիցը հուպ տուր. չես ուզում՝ բրդից խուզիր, ձէն չի հանիլ... տնայէն, վատ բան մ...

— Հա, հա, հա, լաւ ես ասում, նկատում է Սողոմոն աղան և ակամայ լուում: Նա մտքումը ամենեկին համաձայն չէ Մարկոս աղայի հետ, բայց վախենում է նրանից, այդ պատճառով էլ լուում է. Մարկոս աղան համ երեցփոխան է, համ լաւ փող ունի, համ էլ շատ մարդկերանց հետ է ծանօթ: «Ե թ է ուզի, բ ու ը դ ս ք ա մ ու ն կ ը տ ա յ, ի ն չ գ ո ը ծ ու ն ե մ, տ օ» մտածում է նա և լուում: Նոյնը մտածում են և Պօ-

դոս ու Գալուստ աղաները և երեսանց համա-
ձայնուում Մարկոս աղայի հետ:

Տէր Խաչատրի կինը անգաւակ է. այժմ
նա դառել է շաղիկ մի տանտիկին. սիրում է
լաւ ուտել, լաւ խմել, լաւ էլ քնել. սիրում է
նոյնպէս որ ծխականները կնանիք նրան պատ-
ուով ընդունեն և լաւ հիւրասիրեն. խօսում է
քիչ, լսում է ուշադրութեամբ, մանաւանդ եթէ
իգական սեռի թոյլ կողմերի վրայ է լինում խօ-
սակցութիւնը, կուշտ-կուշտ էլ ծիծաղելու սո-
վորութիւն ունի: Տէրտէրակինը և Տէր Խաչա-
տուրը միմեանցից շատ գոհ են: Այժմ, երբ Տէր
Խաչատուրը արդէն 62 տարեկան է դառել, շատ
ու համով ուտելու սովորութիւնը նրա
մէջ և՛ն աւելի է զարգացած. դրան գոհացնելու
համար՝ նա միշտ հարուստների մօտ է հաց ու-
տում. իսկ իր տանը շատ քիչ անգամ է հաց
ուտում, այն էլ առանց ախորժակի: Այն օրից,
երբ նա պատահամբ իմանում է որ օրը կէս
գիշերից է սկսում, չորեքշաբթի և ուրբաթ օրե-
րին խնջոյքներում պատահելիս՝ մինչև գիշերւայ
ժամի 12-ը պասուայ սեղանի մօտ նստած՝ գէյ-
թուն ու հալա է ուտում. բայց հէնց որ ժա-
մացոյցը 12 է խփում, իսկոյն գնում ուտիսւայ
սեղանի մօտ է նստում և սկսում դայմադով խաւ-
եար, ճուտով փլաւ և գառան խորոված անուշ

անել: Պատարագ անելիս նա էլի առաջւայ նման
երեկոներին «եկեսցէ» է ասում, առաւօտեան՝
սաղմոս քաղում, առանց մաշիկի ամենևին թոյլ
չի տալիս մէկին սեղանի վրայ բարձրանալ, պա-
տարագից առաջ ոչինչ չի ուտում, իսկ եթէ
տեսնի որ եկեղեցու գմբէթին բու է նստած և
վայում է, իսկոյն միւս օրը ծանուցումն է
անում և զգուշացնում ժողովրդին, որպէս զի ա-
ղօթք անեն և խնդրեն Աստծուց՝ հեռացնել Գ. քա-
ղաքից բուի գուժած անբաղդութիւնները...

IX

Գասպարն ու Մելքոնը մի տեղում երկար
ժամանակ չեն կանգնում. նրանք շուտ-շուտ մի
դասից միւսն են գնում, գրքակալն են բէմի ա-
ռաջ բաց անում, փակում և կամ տեղափոխում...

Տիրացու Դաւիթն ու տիրացու Մինասը միա-
սին փոխ են ասում, սաղմոսներ են քաղում,
մի-մի ժամանակ շարականի դիւրին կտորներն
էլ են երգում, երբ դասումը մնում են մենակ:
Դաւիթը բարձրահասակ է և յաղթանդամ, իսկ
Մինասը կարճահասակ է և շատ նւաղ: Դաւիթ
ձայնը ուժեղ բասօ է, Մինասի ձայնը թոյլ բա-
րիտօն. բայց երբ Մինասը որևէ յանձնարարու-

Թեամբ է զբաղած լինում, այն ժամանակ տիրացու Դաւիթը Մելքոնի հետ է ստիպւած լինում սաղմոս ասել. այդտեղ արդէն գործը բաւական դժւարանում է. Մելքոնը իր երեխայական բարակ ու զիւ ձայնովը բարձրից է սկսում, տիրացու Դաւիթն էլ իր ձայնը թէև ամեն կերպ աշխատում է յարմարացնել, բայց տեսնելով որ անկարելի է, սկսում է քթի տակից մրմռալով ասել. եթէ նրանց ձայները կամենանք որևէ բանի նմանացնել, տիրացու Դաւիթի ձայնը պէտք է կոնտրբասի մոնչօցին նմանացնենք, իսկ Մելքոնի ձայնը մոծակի բզզոցի. մոնչոց և բզզոց, մոնչոց և բզզոց, մոնչոց և բզզոց...

Տիրացու Դասպարի լեզուն թլւատ է, տիրացու Սիմօնի լեզուն էլ է թլւատ, թէև նա շատ է աշխատում սքօղել այդ. իսկ ինչ վերաբերում է լեզւի թ ո ա ծ լինելուն՝ ցաւիսիրտ պէտք է խոստովանել, որ բոլորի լեզուններն էլ թ ո ա ծ են. այսինքն՝ ծանր-ծանր կարդալ չեն կարող. հէնց որ մի սաղմոս, աղօթք կամ քարոզ սկսեցին՝ մի քանի խօսքերից յետոյ յանկարծ լեզունները լպլրծուն ձկնիկների նման բերաններումը տրտինգ են տալիս և մին էլ տեսնես՝ մաղթանքն էլ, քարոզն էլ վերջացրին ու պրծան. Դրա պատճառը, կարծեմ, այն է, որ նրանք ոչ մի կետադրութեան նշանակութիւն չեն տալիս. ստորակէտ-

ները, միջակէտները և կամ հարցական նշանները նրանց համար բոլորովին աւելորդ բաներ են. Բացի դրանից՝ նրանցից ոչ մինը իր կարգացածը չի հասկանում. և այդ տգիտութիւնը նրանք աշխատում են փոքր հասակից սկսած ամեն կերպ ծածկել ուրիշներից. ծածկում են նրանով՝ որ շուտ-շուտ և զարմանալի արագութեամբ են աշոյատում կարդալ ամեն ինչ, չղանդաղելով ամենևին այն խօսքերի վրայ ևս, որոնք շատ դժւարութեամբ են արտասանուում:

Նրանք ե և է տառերը Ի-ի հետ են խառնում. Տ-ն Ա-ի հետ և այլն. գիրքը մի շնչով են սկսում կարդալ և նոյն այդ շնչով էլ աշխատում են ինչքան կարելի է շատ ու շուտ կարդալ. և որտեղ նրանց շունչը կտրուեց, այնտեղ էլ կանգ են առնում և իրանց սեփական վերջակէտը դնում. այդ պատճառով ոչ ոք նրանց կարգացածից ոչինչ չի հասկանում. ոչ իրանք, ոչ ժողովուրդը:

— Եւ ևս խաղաղութեան զՏէր աղաչեսցուք, բառաչում է տիրացու Սիմօնը, մի ըոպէ բերանը լայն բանալով. բայց և իսկոյն քարոզը այնպիսի արագութեամբ է շարունակում ասել, որ միայն «վ ա ս ն, վ ա ս ն» է լսում նրա բերնից: Իսկ Տէր Խաչատուրը, գուցէ ատամներ չունենալուն համար, աղօթք կարդալիս՝ միայն սկզբից, մէջտեղից և վերջից է մի քանի խօսք մի փոքր լսելի

ձայնով ասում. մնացածը բոլորն էլ առանց ձայնի, մտքումն է ասում. գոնէ կարծում են, թէ ասում է. եկեղեցում լռութիւն է տիրում. տիրացուները, ուշադրութիւնները լարած, սպասում են, թէ երբ կըլսեն նրա վերջին խօսքերը:

— Հայր մեր որ յերկինս ես, ասում է Տէր Խաչատուրը ու լռում:

— Զհաց մեր հանապազօրդ տուր մեզ այսօր, ասում է նա մի փոքր անցած և էլի լռում.

— Փառք յաւիտեանս ամէն, ասում է նա յանկարծ և վերջացնում:

— Տէր Խաչատուրը էլի կերաւ, շշնշում է ծխականներից մինը միւսի ականջին.

— Ի՞նչ կերաւ.

— Աղօթքի կէսը.

— Ի՞նչ ես իմանում, կարելի է բոլորն էլ ասեց.

— Ես չլսեցի.

— Ի՞նչ անենք որ դու չլսեցիր. Աստծու ականջը հօ լսեց...

Եկեղեցին արդէն հոծ բազմութեամբ է լեցւած. սրբերի առաջ բազմաթիւ մոմեր են վառւում. Մաթոսն ու Բաղայր կիսավառ մոմերն են հանգցնում. չքաւոր մարդիկ մոմերը իրանց ձեռներովն են վառում, իսկ հարուստները, մանաւանդ Պետերբուրգում կըթւած նրբասուն տիկին-

ները, Մաթոսին մօտ են կանչում, փող են տալիս և բացատրում, թէ ինչ արժողութեան և քանի հատ մոմ պէտք է առնէ և որ սրբերի առաջ պէտք է վառէ. այդ միջնորդ-ծառայութեան համար նրան միայն տասը կոպէկ են տալիս, որովհետև Մաթոսը նրանց հետ սակարկութիւն չի անում:

Տէր Բարսամն ու Տէր Յովակիմը արդէն վաղուց կանգնած են իրանց տեղերում. ընթերցողը նրանց հետ դեռ ևս ծանօթ չէ և եթէ շատ էլ չի հետաքրքրւում նրանցով, այնուամենայնիւ, գոնէ Պարոնեանի մատնանիշ արած ա Ր և Ե Լ Ե ա ն ք ա ղ ա ք ա վ ա Ր Ո Լ Թ Ե ա ն հետեւելով, պէտք է նրանց հետ ևս ծանօթանայ, մանաւանդ զրա համար առանձին դժւարութիւններ չկան, հետեւեալ գլուխը միայն պէտք է կարդալ:

VI

Տէր Բարսամը Տիրամօր եկեղեցու քահանաներից ամենահասակաւորն է, 67 տարեկան է այժմ. ոչ աւագութիւն ունի, ոչ կամիլաւկա և ոչ ծաղկեայ փիլոն. այդ բոլորի փոխարէն նա ունի մի փառաւոր սպիտակ միրուք և երկու կապտագոյն շատ բարի աչքեր. նրանք ում վրայ

նայում են, նրան էլ, կարծես, օրհնում են. ծխականներից շատերը նրա դէմքը Գրիգոր Լուսաւորչի դէմքին են նմանեցնում: Ժամանակով Գ. քաղաքում եղել է մի յայտնի կօշկակար, ուստա Վիրապ անունով. նա շատ բարեսիրտ, խոնարհ և անշահասէր մարդ է եղել. ազատ ըոպէններին Ս. Գիրքն է նա կարդալիս եղել, որը նոյնպէս կօշկակարական գործիքների արկղումն է պահելիս եղել: Քաղաքում տարափոխիկ հիւանդութիւն է յայտնուում, շատ մարդիկ են մեռնում. նրանց միջին մեռնում են և Տիրամօր եկեղեցու երեք քահանաները-մինը միւսի ետեւից: Արհեստաւոր դասակարգը միաձայն հաւանութեամբ ուստա Վիրապին իր համար քահանայացու է ընտրում. եպիսկոպոսն էլ նրան ձեռնադրում է և անունը դնում Տէր Բարսամ: Երկար տարիների ընթացքում Տէր Բարսամը շատ է չարչարուում, շատ է աշխատում, որպէս զի ժամասացութիւնը կարգին սովորի, բայց այդ նրան լիովին չի աջողւում: Նա թէև տանը աղօթքները միշտ անգիր է անում, բայց երբ եկեղեցու դռնից ներս է մտնում և երբ մանաւանդ տեսնում է Տէր Խաչատրի կնճռած դէմքը, իսկոյն սովորածը մտքիցը փախչում է: Այդ պատճառով նա միշտ խընդրում է Սահակ սարկաւազից, որպէս զի մոռացած կտորները մի կերպ նրան յիշեցնէ: Սարկա-

ւազը թէև մեծ յօժարութիւն է ցոյց տալիս, բայց որովհետև նրա ականջները ծանր են, այդ պատճառով չի կարողանում հեռւից լաւ լսել, թէ Տէր Բարսամը աղօթքի ինչ տեղումն է կանգնել, ուստի շատ անգամ ուրիշ բան է թելադրում և աւելի է սխալացնում Տէր Բարսամին: Այն օրը, երբ նա առանց սխալների է պատարագ մատուցանում, զւարթ տրամադրութեամբ է տուն վերադառնում, ճանապարհին անդադար կրկնելով շարականի «Ս ր բ ու հ ի ա ն ա ը ա տ, գ ք ե գ մ ե ծ ա ց ու ց ա ն ե մ ք» յայտնի նախադասութիւնը. բայց այդպիսի օրեր շատ քիչ են պատահում: Ինքը լինելով սաստիկ հաւատացող, ջերմեռանդ և երկիւղած, խորապէս խոցում է Տէր Բարսամը, երբ Աստծու սեղանի առաջ՝ Ս. Գիրքը կարդալիս՝ սխալներ է անում: Երբ նա աւետարանը ձեռն է առնում, սրբազան դող է անցնում իսկոյն նրա ամբողջ մարմնովը, աչքերը պղտորւում են և նա յափշտակւածի նման է արտասանում բառերը, բովանդակութեան համարեա նշանակութիւն չտալով:

—Մատուցին նմա պատարագ ոսկի՝ և կընդրուկ և ը գ մ ու ո ս... կարդում է նա ամեն անգամ սաստիկ ոգևորւած, ձայնն էլ ոլոր-մոլոր երկարացնում:

—Փուչ կենդանի, գմոռս ասա, գմոռս,

գմնուս, փնթփնթում է Տէր Խաչատուրը ձախակողմեան դասից:

Տէր Բարսամի երեսի գոյնը փոխուում է իսկոյն. նա թէև չի լսում Տէր Խաչատրի խօսքերը, բայց գլխի է ընկնում որ էլի սխալ է արել. աւետարանը կարդալ—վերջացնելուց յետոյ նա մօտենում է Տէր Խաչատրին և ասում.

—Տէրտէր, մեղայ Աստծու, միւս անգամ չեմ սխալելի:

Բայց անցնում են շաբաթները, կրկին հերթը Տէր Բարսամին է գալիս, կրկին աւետարան կարդալիս նոյն սխալն է անում և Տէր Խաչատուրն էլ նոյնը փնթփնթում. իսկ ծխականները լուռ ու մունջ մտիկ են տալիս և անմեղօրէն զւարճանում. բայց ոչ ոք սիրտ չի անում յանդիմանել Տէր Բարսամին կամ ծաղրի առարկայ շինել նրան: Ծխականներից մի քանիաներին նոյնպէս լաւ յայտնի է որ Տէր Բարսամը երկու անհաշտ թշնամիներ ունի, որոնց դէմ նոյն իսկ քահանայ դառնալուց առաջ ոչինչ չի կարողացել անել և չի կարողանում. դա՛ Ղ և Ջ տառերն են. հէնց որ աւետարանի որևէ երեսում Տէր Բարսամը այդ երկու տառերին է հանդիպում՝ կոխը սկսում է իսկոյն. տէրհայրը տառը Ղ է կարդում. բայց նոյն ըոպէին խորամանկ Ղ-ն թըռչում է և Ջ-ն գալիս-նստում նրա տեղը. և կամ

հակառակն է պատահում. տէրհայրը թէև նկատում է այդ, բայց իրան յատուկ բարեսրտութեամբ չտեսնող ձեանալով, խաղաղ ձայնով առաջ է գնում: Բայց ահա նրա թշնամիներից մինը կրկին մօտենում է, միայն յայտնի չէ թէ ո՞րն է. Ղ-ն է թէ Ջ-ն. տէրհայրը այս անգամ արդէն անմեղ խորամանկութեան է դիմում. դէմքը խոփորած՝ կանգ է առնում ու մոմ բռնող Գասպարին նկատողութիւն անում, թէ ինչու մոմը աւետարանից հեռու է պահում, բայց և միևնոյն ժամանակ աչքի պոչովն էլ ամեն կողմից զննում է իր թշնամուն: Գասպարը մոմը աւելի է մօտեցնում. Տէր հայրը աչքերն է լարում և քաջ զինւորի նման կուրծքը թշնամուն ուղղակի դէմ տալիս. բայց... զարմանալի բան... երկուերեսանի թշնամին համ Ղ-ի է նման, համ էլ Ջ-ի, այ քեզ օյին... այդտեղ արդէն տէրհայրը յուսահատուում է և լեզւի կապը բաց թողում: Լեզուն էլ, կարծես, հէնց զրան էր սպասում. իսկոյն բերնի մէջ մի-երկու անգամ տրտինգ է տալիս և տէրհայրը, մի ինչ որ անորոշ ձայն հանելով, իր աչքերը դէպի հետևեալ բառն է դարձնում և գայթններից: Նրա ձեռները վերջին ժամանակները սկսել են նկատելի կերպով դողդողալ. այդ հանգամանքը տիրացու Սիմօնին ուրախացրել է, որով-

հետև Տէր Խաչատուրը արդէն դիմել է ուր հարկն է և խնդրել, որպէս զի Տէր Բարսամին արգելեն պատարագ մատուցանելը. թուղթը էսօր-էգուց պէտք է գայ:

Տէր Յովակիմը 10 տարով մեծ է Տէր Մարութից. կարճահասակ է և բարակ փորով. դէմքը— դեղնագոյն, աչքերը— տխուր, բայց խորամանկ. Մկրտիչ վարժապետի մօտ է սովորել. աւետարան ու գիրք ազատ է կարդում. ձայնն էլ բաւական դուրեկան է. լ ո ո լ թ ի լ ն ը նրա կեանքի այժմն է եղել. նրա ետևից գնալով-գնալով հասել է մինչև քահանայական պաշտօնին և այժմ թէկուզ ցանկանայ էլ խօսել՝ չի կարող ամեն ժամանակ յաղթել իր լուսթեան այժին: Տէր Խաչատուրը նրանից այնքան չի վախենում, որքան նրա լ ո ո լ թ ի լ ն ի ց, այդ պատճառով հետը առհասարակ զգոյշ է վարւում: Ինքնասէր է Տէր Յովակիմը, նախանձոտ և իշխելու մեծ փափաք ունի. բայց առ այժմ լուռ է մնում, որովհետև նրա ծխականների մէջ հարուստ աղաներ դեռ ևս չեն դուրս եկել: Զիթ ծախող Եզնիկը ասենք էսօր-էգուց ադա դառնալու մօտ է. այդ պատճառով Տէր Յովակիմը աւելի յարգանք է նրան ցոյց տալիս և շուտ-շուտ է նրան այցե-

լում: Դուքանումը երես երեսի նստած՝ Եզնիկն ու Տէր Յովակիմը թէյ են խմում, բարեկամներին են բամբասում և ապագայի համար ծրագիրներ կազմում: Եզնիկը Տէր Յովակիմի համար արդէն ծաղկեայ փիլոն կրելու իրաւունք է բերել տւել. տէրհայրն էլ նրան խորհուրդ է տալիս երեցփոխան դառնալ, խօսք է տալիս ամեն կերպ նրան աջակցել: Տէր Խաչատուրը մի քանի անգամ տեսնում է Տէր Յովակիմին Եզնիկի դուքանումը նստած և անհանգստանում. այո, նա լաւ է տեսնում որ Տէր Յովակիմն էլ նրա նման աղաների միջոցով է ձգտում հեղինակութիւն ձեռք բերել... և ինչ զարմանք, եթէ մի օր էլ նրան, Տէր Խաչատրին որևէ հակառակութիւն ցոյց տայ... «խ ա բւ ե ց ի, խ ա բւ ե ց ի, ի ն չ ա բ ա ծ» ասում է նա յաճախ ինքնիրան՝ Տէր Յովակիմի ձեռնադրութեան մանրամասնութիւնները մտաբերելով:

Տէր Յովակիմը իր տանը նոյնպէս աշակերտներ է կարդացնում. նոյն սաղմոսը, հին ու նոր կտակարանը, նարեկն ու Այսմաւուրքը կարդում են նրա աշակերտները. նա ճիպոտ չի գործածում, չի էլ ծեծում, որովհետև ներդային է, աղիքների հիւանդութիւն ունի, յաճախ է զկրտում և սիրտը վեր ածում. այդ պատճառով ազմուկ չի կարողանում տանել: Աշակերտները գալիս

նստում են իրանց տեղերը և սուսիկ-փուսիկ դասերը կարդում: Ժամի 9-ին մտնում է նրանց սենեակը Տէր Յովակիմը և նստում սեղանի առաջ. աշակերտները, ինչքան սագի փետուրներ ունեն հետները բերած, թափում են նրա առաջ. տէրհայրը գրչահատը գրպանից դուրս է բերում և ժամերով սկսում է ծանր ու բարակ գրչի ծայրերը կտրել ու սրել. աշակերտներն էլ հետզհետէ գալիս ու վերցնում են սեղանի վրայից իրանց գրիչները. ժամի 1-ին գրչահատութիւնը վերջանում է. այնուհետև աշակերտները հերթով կանգնում են տէրհօր առաջ և դասերը կարդում. եթէ աշակերտը շուտ-շուտ և առանց դանդաղելու է կարդում, տէրհայրը դասը փոխում է և մատիտի ծայրովը նշան անում. հակառակ դէպքում դասը թողնում է միևնոյնը: Ժամի 2-ին նա արձակում է աշակերտներին և գնում հաց ուտելու: Եթէ հացը համով է լինում, Տէր Յովակիմը, չնայելով բժիշկների տւած խորհրդներին, շատ է ուտում. բայց երբ զկրտալ է սկսում, իսկոյն թողնում է սեղանը ու դուրս գալիս սենեակից:

Թէև Տէր Յովակիմը խորամանկ է և շատ զգոյշ, այնուամենայնիւ ծխականներից մի քանիսը արդէն նկատել են որ նա կեղծաւոր է. նրա խօսքերն ու գործերը հակասում են միմեանց: Եկեղեցում և նրանից դուրս նա ամենքին խոր-

հուրդ է տալիս՝ որպէս զի երեխաներին կարդալգրել սովորացնեն, ուսում տան և խելացի քաղաքացիներ պատրաստեն նրանցից. իսկ ինքը իր 4 որդիներին էլ, որոնք այբուբենը հագիւ են կարդում, հարուստ վաճառականների մօտ ծառայութեան է տւել, որպէս զի դուքաններում առևտուր անել սովորեն, փող աշխատեն և ժամանակով նրանք էլ, թէև յիմա ր, բայց հարուստ աղաներ դառնան:

XI

Ժամասացութիւնը, կարծես, ընդհանուր է դառնում. վերևի դասից և ներքևի դասից փոխփոխ շարականներ են երգում. միայն Տէր Խաչատուրը և Տէր Յովակիմը լուռ են. հինգ ըոպէն մի անգամ նրանք ետ են դառնում և ծխականներին մտիկ տալիս՝ արդեօք հարուստներից ով է եկել, որտեղ է կանգնել և այլն և այլն. Տէր Մարութէն աչքի ծայրովը տեսնում է, որ իր հարուստ ծխականը-գինեվաճառ Մեխակը Տիրամօր պատկերի առաջ մոմ է վառում. նա իսկոյն ոգևորւում է և իր ամենաբարձր ձայնովը շարական սկսում. երկու նպատակ նա ունի. համ ուզում է Մեխակին դուր գալ, համ էլ տիրացու Միմօ-

նին նեղը գցել ու խայտառակել: Միւս դասում
Տէր Մարութէի ձայնին հաւասար ձայն չկայ. Սա-
հակ սարկաւազը միայն կարող է իր ճրճուոցով
մի կերպ նրան յարմարել, բայց դժբաղդաբար
նա էլ Տէր Մարութէի հետ միևնոյն դասումն է
կանգնած: Միւս դասից փորձ են անում շարա-
կանի հետևեալ տունը ասել, բայց իզուր, չի ա-
ջողուում... տիրացու Միմօնը թէև բառաչում է մի
փոքր, բայց կոկորդը սկսում է բոր գալ և սաս-
տիկ հազը հուպ է տալիս ու ձայնը կտրում: Իս-
կոյն նրա բերնից առնելով՝ Տէր Բարսամբ, Տէր
Յովակիմը, տիրացու Մինասը և Մելքոնը ձայն-
ձայնի տւած զօրում են, տիրացու Միմօնն էլ է
նորից միացնում ընդհանուրի ձայնին իր աննման
բառաչք, բայց ոչինչ չի դուրս գալիս. իւր չտե-
սած անիւնների ճրճուոց է միայն լսում. մի հայ
չերքէզ, որը հիւսիսային դրան մօտ է կանգնած,
մեքենաբար լուսամտից դուրս է նայում, կար-
ծելով, թէ սայլերի քարւան է անցկենում: Իսկ
Տէր Մարութէն, վերևի դասումը անշարժ կանգ-
նած, քր՛ ու-քր՛ ո ծիծաղում է ու միրուքը շոյում:
Տէր Խաչատուրը վերջապէս Սահակ սարկաւազին
բօթելով հրամայում է՝ գնալ միւս դասը և շա-
րականը մի կերպ վերջացնել: Սարկաւազը իս-
կոյն մատների մէջ առած բուրնոթին նորից տու-
փի մէջ է ածում ու շտապում դէպի միւս դասը...

և ահա նրա ճռնչոցը վէտ-վէտ ալիքներով սկսում
է լող տալ օդի մէջ ու բարձրանալ դէպի բիւ-
զանդական փառաւոր գմբէթի առաստաղը...

«Փ ա ո ք ի բ ա ը ձ ու ն տ»ից յետոյ եկեղե-
ցի է մտնում և երեցփոխանը—Մարկոս աղան իր
փոքրիկ որդու-Համբարձումի հետ և կանգնում
մոմի պահարանի առաջ. ծանօթ աղաները, մօ-
տիկ կանգնած լինելով, իսկոյն նրան բարևում
են և ձեռը սեղմում:

Մարկոս աղան 56 տարեկան է. կարճ հա-
սակով և հաստափոր. սալիտակ մազերը կարճ է
խուզում. նեղ ու ցած ճակատը դուրս է ցցւած.
Թաւ բեխերը քթի երկու կողմերից ցած կախ-
ւելով՝ նրա ահագին բերանը փոքր են ցոյց տա-
լիս. սև աչքերը թափանցող են և արիւնախառն.
Նրանց պոչերը պարբերաբար կծկւում են, այդ
պատճառով կոպերն էլ փայլակների նման ստէպ-
ստէպ են բաց ու խուփ անում: Նրա թուլացած
ու դեղնագոյն թշերի ճարպոտ կաշին բերնի եր-
կու ծայրերից ծալ-ծալ կախ ընկած լինելով՝
դէմքը որսորդական շան դնչի շատ է նմանում:
Նրա ածիլած երեսը և հաստ ու ճարպոտ պա-
րանոցը շուտ-շուտ են քրտնում. ծոծրակի վրայ
և կզակի տակին մի քանի ճարպոտ ծալքեր են
կախ ընկած. նրանք Մարկոս աղային թոյլ չեն
տալիս գլուխը աջ ու ձախ դարձնել. այդ պատ-

ճառով նա ստիպւած է ամբողջ մարմնով աջ ու ձախ շուռ գալ ճիշտ այնպէս, ինչպէս անում են գայլերը, խոզերը և մի քանի ուրիշ կենդանիներ: Ամենից աւելի աչքի է ընկնում Մարկոս աղայի վիթխարի փորը, որը իր ձեովը, կարծես, մի տեսակ նմանութիւն ունի մեծ ու ձուռածկ սամաւարների հետ, միայն այն զանազանութեամբ՝ որ սամաւարները պղնձից են առհասարակ շինած լինում, իսկ Մարկոս աղան ճարպից է թխել իր սամաւարը: Մարդիկ պղնձէ սամաւարները հետները ման չեն ածում. իսկ Մարկոս աղայի սամաւարը նրա անբաժան ընկերն է. նա ուր գնաց՝ փոր-սամաւարն էլ հպարտ-հպարտ առաջիցն է գնում, համ ճանապարհ է բաց անում իր տիրոջ համար, համ էլ ուրիշներին ծիծաղացնում այնպիսի շարժումներով, որոնք գինով լիքը գումշի տկճորն են յիշեցնում: Մարկոս աղան երբ ոտով է ման գալիս՝ «թլը՛ փ-թլը՛ փ» ձայն է լսում իր փորի միջից. իսկ երբ ստիպւած է լինում շտապել, այն ժամանակ գլուխը ետ է դցում, փորը առաջ է տնկում, ձեռներն ու ոտնամանները քթիկները աջ ու ձախ է չռում և սկսում է օդի մէջ ալիւր մաղելու շարժումներ անել: Նրա ամբողջ կազմը այդ միջոցին նաւակի նման է օրօրւում, ոտները պէտք եղածից աւելի են ծալւում, կոկորդից էլ «խոռթ-խոռթ» ձայներ է արձակում:

Մարկոս աղան ինքն էլ ուրախ չէ որ վիթխարի փոր ունի. հաշտարար դատաւորի մօտ նա շատ յաճախ է լինում, իսկ դատարանի դռները նեղ են և նա ամեն անգամ՝ այնտեղ մըտնելիս ու դուրս գալիս՝ սաստիկ է ցաւացնում իր փորոտիքը: Բացի դրանից՝ Զատիկի տօներին նա ակամայ խուսափում է կարճահասակ շեկ աստիճանաւորների շնորհաւորութիւններից. որովհետև նա պարտաւոր է երեք համբոյր ստանալ, նոյնքան էլ վերադարձնել. բայց նրա փոր-սամաւարը արգելք է լինում դրան. առանց այլ և այլի նա հուպ է տալիս աստիճանաւորին ու դցում Մարկոս աղայի կամ աջ և կամ ձախ ուսի վրայ. հետեանքը լինում է այն, որ Մարկոս աղան իր բերանում համբոյրի փոխանակ աստիճանաւորի ականջն է շօշափում, որը, բացի նրանից որ Մարկոս աղայի բերնին համ չի տալիս, վտանգաւոր ևս կարող է լինել իր հետեանքովը, մանաւանդ եթէ աստիճանաւորը հաշտարար դատաւորը լինի և կամ դատախազը՝ այն ժամանակ հօ Աստուած հասնի: Ծանօթները շրջանում Մարկոս աղան շատ անգամ ինքն իր բռունցքովը իր փոր-սամաւարին հարւածներ է տալիս և կիսածիծաղ լրջութեամբ բացազանչում.

— Անիծեալ լինիս, դժոխավայել կպրի կաթսայ, հողիս հանեցիր, անիրաւ, հողիս...

Մարկոս աղան երբ խօսում է, այնպէս է թւում, կարծես, նրա հաստ ձայնը խոր հորից է դուրս գալիս. իսկ երբ բարկանում է ու ձայնը բարձրացնում՝ անտառում ապրած մարդը իսկոյն աչքերը այն կողմը կրդարձնէ, որտեղ ծառեր են բուսնում, կարծելով, թէ տանձի սիրահար արջը ճիւղեր է ջարդոտում:

Երբ իրանից կախումն ունեցող կամ չքաւոր մարդի հետ է խօսում Մարկոս աղան՝ նրա երեսին ամենեւին չի նայում. կամ նրա ձեռներին ու ոտներին է մտիկ տալիս, կամ թէ չէ՝ աչքերը իր փորին յառած՝ ձախ ձեռովը վզի ճարպոտ ծալքերն է շփշփում: Բայց երբ հարուստ մարդի հետ է խօսում՝ աչքերը նրա աչքերից չի հեռացնում, իւղալի ժպիտը նրա շրթունքներից չի պակասում. հինգ ըոպէն մի անգամ էլ խօսակցի թիկունքն է քնքշօրէն թափահարում:

Նա ունի մի լաւ տուն, կողքին—պարտէզ. նրա ծառաները որբ երեխաներ են եղել. որտեղիցորէ ճարել է նրանց և ծառայեցնում, փոխարէնը տալով միայն՝ օրական մի փոր հաց, տաբեկան երկու ձեռք շոր:

Տասներկու տարի շարունակ Մարկոս աղան Տիրամօր եկեղեցու երեցփոխանութեան պաշտօնն է վարում: Ամեն անգամ, երբ նա իր պաշտօնի ժամանակամիջոցը լրանալուց մի-երկու ամիս ա-

ռաջ հրաժարական է տալիս, առարկելով, թէ լուծը թէև քաղցր է, բայց և շատ ծանր՝ ծխականները Տէր Խաչատրի նախագահութեամբ ժողով են կազմում և խնդրում Մարկոս աղայից, որպէս զի հրաժարականը ետ առնէ. նա էլ ամեն անգամ, մի փոքր տատանումից յետոյ, զիջանում է, նորից վեր է առնում այդ քաղցրածանր լուծը և դնում իր ուսերի վրայ:

Գ. քաղաքի ժողովուրդը սկզբից եղել է միայն արհեստաւոր, մասամբ էլ հողագործ: Ժամանակի ընթացքում՝ արհեստաւորները, կուլտուրական շրջաններից բոլորովին կտրւած ու կղզիացած ապրելով, դառնում են անպէտք, մնում են անգործ: Սովածութեան երկիւղը նրանցից աւելի համարձակներին դուրս է մղում նահապետական շրջանից. նրանք դէն են գցում մուրճն ու մրկրատը, ընկնում են առևտրի ետևից և կարճ միջոցում հարստութիւն ձեռք բերում: Եւ ահա այդ մի քանի հարստացած մարդիկն են սկսում առաջին անգամ յեղաշրջել Գ. քաղաքի կարգ ու սարքը, փոփոխութեան ենթարկել ժողովրդի նահապետական պարզ նիստն ու կացը: Սոխով հաց և կամ մի բուռը լոբի ուտելով օրերը մթնեցնող արհեստաւորները տեսնում են յանկարծ, որ Բալիենց Մկրտիչը և Զումբալենց Սերոբէն, որոնք մի քանի տարի առաջ դուքանի շեմքին նստած

ոտնամաններ էին կարկատում, այժմ մեծ-մեծ տներ են շինում, սեփական կառքեր ունին, ծառաներ են պահում, ամեն օր ճուտով փլաւ, գառան մսի խորոված են ուտում. զինին ու արաղը տակառներով են առնում բազարից, զուռնան ու թառը նրանց տներից անպակաս է. մի խօսքով՝ ապրում են այնպէս՝ ինչպէս մի ժամանակ ապրում էին թուրք աղաները, նրանց պապերի կեղեքողները...

Եւ ահա այդտեղ արդէն զարթնում է անկիրթ մարդու վատ բնազդը. խղճուկ արհեստաւորները ոչխարային հօտը քծնել է սկսում, շողորթութել է սկսում հարուստներին, աղա է կոչում նրանց ու վեր առնում իր գլխի վրայ դնում. նա յոյս ունի, որ մի օր, աղայի միջոցով, գուցէ ինքն էլ բարօրութիւն տեսնէ: Նորակոչ աղաները թէպէտև սկզբումը իրանք էլ են զարմանում, թէ էդ երբ նրանք այդպէս շուտ աղա դառան, բայց շուտով մտնում են իրանց դերի մէջ, հպարտութեան և գոռոզութեան դիմակներ են դնում երեաներին, անցնում են ժողովրդի գլուխը, սանձն ու զեկը պինդ հուպ են տալիս փոքրերին և սկսում աղայութիւն անել. այսինքն՝ բարերարութեան անունի տակ զրկելով ու գողանալով փառք և պատիւ վայելելի:

Այդտեսակներից է և Մարկոս աղան. Տէր Խաչատրի հետ անխղի կապերով է կապւած. ուրիշների հաշիւն նրանք մէկմէկու այնքան լաւ ու թիւններ են արել, որ այլ ևս չեն կարող առանձին-առանձին մտածել:

— Մարկոս ջան, մենք պէտք է միմեանց պահպանենք, շեշտելով ասում է Տէր Խաչատուրը ծանօթութեան հէնց առաջին օրերից.

— Հրամբես, տէրտէր, միմեանց պէտք է անպատճառ պահպանենք, ուրիշ կերպ չի կարելի, համաձայնում է Մարկոս աղան:

Եւ ահա տասնեակ տարիներ նրանք պահպանում են միմեանց. ժամանակ-ժամանակ ինչ որ հաշիւ են գրում եկեղեցական մատեանի մէջ և ուղարկում ուր հարկն է. այնտեղ էլ սուս ու փուս մատեանը վեր առնում գցում են այնտեղ, որտեղից դեռ ևս ոչ մի մատեան դուրս չի եկել.

— Ղրկեցիր մատեանը, հարցնում է Մարկոս աղան հազիւ լսելի ձայնով.

— Գնաց, անհոգ եղիր, պատասխանում է Տէր Խաչատուրը.

— Ակռաժաժիկը քիչ չի, տէրտէր.

— Բ՛՛՛՛՛ ա, շատը լաւ չի, թէ չէ երես կառնեն... զուտեղումդ հանգիստ նստիր, Մարկոս

ջան... մատենանը Յազկերտի Անյուշ բերդումն ա հրմի... ինձ լսիր ու հաւատա...

— Կեցցէ Հայաստան, բացականչում է Մարկոս աղան ուրախացած ու նոր սիրգարա ծխում...

Տասներկու տարւայ ընթացքում Մարկոս աղան համարեա ամեն տարի եկեղեցին է դրսից ու ներսից նորոգում. անցած տարի նա մինչև անգամ Եհովայի պատկերն է նկարել տալիս մեծ գմբէթի առաստաղին: Կոնսիստորից այդ առիթով հանդիսաւոր օրհնութեան թուղթ է գալիս Մարկոս աղայի անունով, իսկ հոգևոր կառավարութեան անդամներին հրամայւում է միասին հաւաքել, պատկերը տեսնել ու քննել՝ արդեօք լուսաւորչական եկեղեցու աւանդութիւններին հակասող ոչինչ չկայ այնտեղ և այնուհետև միայն նրան օծել:

Հաւաքւում են տէրտէրները. նախանդամն էլ Տէր Խաչատուրն է. գալիս է և Մարկոս աղան հայ նկարչի հետ: Տէրտէրները, միրուքների ծայրերը դէպի գմբէթի առաստաղը բարձրացրած, երկնք մտիկ են տալիս պատկերին. վերջինը ներկայացնում է Աստծուն, Որը ամպերի միջով ցած է նայում և օրհնում է մարդկանց: Տէր Սարգիսը նկատում է թէ նկարը վատ չէ. Տէր Խաչատուրը նրա ձայնը լսելով բարկանում է և պատասխանում, թէ պատկերը անբնական է, որովհետև

Աստուծ եթէ ամպերի միջով է մտիկ տալիս, ուրեմն դէմքը պէտք չէ երևայ.

— Մենք երևակայութեամբ պէտք է նրան տեսնենք, հասկանում էք թէ չէ, ասում է նա հեղինակօրէն:

— Իհարկէ, իհարկէ, պատասխանում են միւս տէրտէրները, մինը միւսի ետևից իր հաւանութիւնը տալով:

Նկարիչը սկսում է ինչ որ բացատրել, բայց տեսնելով որ ոչ ոք նրան չի լսում, վիրաւորւում է և հեռանում: Միւս օրը Մարկոս աղան մի շեկ ներկարար է կանչում, որը, հասկանալով թէ բանը ինչումն է, վրձինը թաթախում է մոխրագոյն ներկի մէջ, բարձրանում է գմբէթի մօտ, Եհովայի պատկերը զանազան կողմերից ներկում է և դարձնում երևակայական: Նորից հաւաքւում են տէրտէրները, նորից վերև են բարձրացնում միրուքները և պատկերին մտիկ տալիս երկնք ժամանակ նրանցից ոչ մինը ոչինչ չէր ասում. լուռ էր և Տէր Խաչատուրը. այդպէս լուռութեամբ էլ նրանք հաւանում են պատկերին և օծում: Այդ առիթով Մարկոս աղան տէրտէրներին փառաւոր հաց է ուտացնում իր տանը:

Չատ տարի առաջ Մարկոս աղան ինչ որ գիւղում, ասում են, դուքան է ունեցել. երկուերեք անգամ կտակակատար է եղել, յետոյ Գ. քա-

դաքն է վերադարձել, տուն է գնել և իր համար ապրում է. մարդը փող ունի և ապրում է. ո՞ւմ ինչ գործ... այդպէս է խօսում ժողովրդի մեծամասնութիւնը: Բայց կան մի քանի պառաւներ, որոնք Մարկոս աղային աւելի լաւ են ճանաչում: Խունդուզենց Սրաբը մօտ հարիւր տարեկան կրփնի, Արթին բիծան և ուստա Օվակը այնքան են պառաւել, որ չեն էլ յիշում թէ երբ են ծընւել: Այդ երեք պառաւներն էլ սե չուխայ են հագնում, սե ու երկար փափաղներ են դնում գլըխներին, ծանր ու բարակ են ման գալիս, նոյն կերպով էլ բուրնոթի քաշում: Երեքն էլ բարձրահասակ են, բարակ ու նիհար. ուստա Օվակի իրանը արեւածաղկի ցողունի նման առաջ է թեքւած: Երբ տաքարե օր է լինում՝ նրանցից ամեն մինը իր տնից դուրս է գալիս և քայլերը ուղղում եկեղեցու այն պատին, որը արեւին է նայում. հէնց որ մինը հասնում է պատին, միւս երկուսն էլ միմեանց ետեից հեւլով ու մշմշալով գալիս են և երեքով կողք-կողքի նստում պատի մօտ, քարի վրայ: Ամեն մինը իր կարմիր կամ կապոյտ թաշկինակը պարզում է առաջին, բուրնոթու տուփն էլ դնում վրէն: Սկզբում բուրնոթուց են խօսում նրանք, այդպէս է սովորութիւնը. տուփերը բացուխուփ անելով ամեն մի-նիցն էլ քաշում են և քննում՝ թէ ում բուրնո-

թին աւելի թունդն է: Այնուհետև բաւական ժամանակ լուռ ու մունջ արեգակի լուսով լուսաւորւած առարկաներին են մտիկ տալիս... և երբ նրանց սառած արիւնը արեգակի ջերմութիւնից մի փոքր տաքանում է, այն ժամանակ նրանք ոգևորւում են և սկսում խօսել... մեծ մասամբ հին ժամանակից, երբ նրանք դեռ ևս երիտասարդներ էին և երբ, այսպէս ասած, աշխարհը նրանցն էր: Պատահում է որ նրանց մասլահաթի թունդ միջոցին՝ անցորդներից մինը կամ միւսը նրանց գլխների վրայ բղաւելով բարև է տալիս, անցնում ու գնում. մեր պառաւները երեքով էլ իսկոյն աջ ձեռների հինգ մատները ճակատներին տանելով՝ անցնողի ետեիցն են նայում, որպէս զի իմանան թէ ով էր նրանց բարև տուողը:

—Մընգըռենց Սեփանն ա, նկատում է ուստա Օվակը բոլորից առաջ.

—Հը՛, հարցնում է Խունդուզենց Սրաբը.

—Հը՛, ինչ ա իլել, հարցնում է բէխաբար Արթին բիծան հեղինակօրէն.

—Մընգըռենց Սեփանն ա, այ տղայ, չես լսում, Մագթաղ բաջու թողը, էլի, տաքանում է ուստա Օվակը.

—Ախար էդ որն ա է...

—Տօ, Մագթաղ բաջուն չես ճանանչում,

տնաշէն, տունը համամի կշտին ա... Սեփիա-
նենց Կարապետի հարսն ա, էլի...

— Հը՞...

Այդ ըոպէին մէկ ուրիշ անցորդ է նրանց բա-
րեում. նրանք էլ, առաջինին թողած, երկրորդի
մասին են սկսում խօսալ:

Գուրս է գալիս, որ այդ պառաւները Մար-
կոս աղային շատ լաւ են ճանաչում. երբ նա,
առանց բարև տալու, անցնում է նրանց մօտով,
պառաւների մէջ ամեն անգամ հետևեալ խօսակ-
ցութիւնն է մօտաւորապէս տեղի ունենում:

— Զուռնաչի Օհանի թոռն էլ անցաւ, ասում
է ուստա Օվակը, փափաղի ծայրը թափահարելով.

— Հը՞, հարցնում է Արթին բիծան.

— Երեցփոխանի համար եմ ասում, զուռնա-
չի Օհանի թոռը...

— Մարկոսը, Մարկոսը...

— Հնա՞...

— Այ տղայ, բաղդ եմ ասում է... հէրը ինչ
էր, ինքը ինչ դառաւ, մշմշում է խունդուզենց
Սրաբը:

— Մէ շավար հագին՝ բազարումը սայլերի
աակից դարման էր հաւաքում քու էդ Մարկոսը,
նկատում է ուստա Օվակը.

— Հոգին, հոգին... դու ասա՛ հոգին վերջը
նրտեղ ա գնալու...

— Այ տղայ, միտդ ան թէ չէ... աչքիս առաջն ա
էլի... հէնց որ դուքանս բաց չէի անում... մին
էլ տեսար էդ քո Մարկոսը առաջովս էր անցկե-
նում... քոսոտ գատ էր... ալլախ, ալլախ... էսօր,
օրինակ, հագած էր ըլում երկար շուխայ, գըլ-
խին՝ քրդի քօլօզ, ոտներին՝ բրդի կօշիկներ...

— Ո՞րտեղից էր ճարում, դու էդ ասա...

— Ինքը հօ չէր ճարում, մատաղը իր ոտովն
էր գալիս նրա մօտ, էն աստղի տակ ա ծնւած...
մէկէլ օրը տեսնում ես նրան ու չես ճանանչում...
շորերը դիփ փոխել ա... տրապիզոնցու լէն շալ-
վար ա հագել, ուսերին ուս սալդաթի շինել ա
գցել, ոտներին՝ մաշիկ, գլխին էլ՝ էս իմ փա-
փաղի նման մենծ փափաղ...

— Գժեւել ա, տօ...

— Ինչի ա գժեւել. իր բանը նա լաւ ա իմա-
նալիս իլել. չարչին ըսկի գիժ կըլի... տօ՛ճ, մէ
ասեղ ա նիսիա տալիս, փափաղդ վեր առնում
ամանաթ ա պահում, դա գիժ ան...

— Ետոյ ուրիշի վրայ ծախում, հը՞...

— Բաս, ետոյ ուրիշի վրայ ծախում. աղբերը
մեռաւ, նրա դուքանը գաւթեց. քաւորը մեռաւ,
նրա ունեցած—չունեցածը գաւթեց ու եթիմ
աղջկանը անբաղդացրեց, ըսկի դրանում խըճ-
պըտանք կըլի...

— Գժոխքի բաժին ա դրա հոգին, ես իմ

Ասուած, սատանաները դժոխքի համամում նրա սևացած հոգովը պրտի քիսա քսեն Մաթայէլին... վայ ինձ, վայ ինձ, մշմշում է երկար ու բարակ Խունդուզենց Սրաբը:

Այդպէս են խօսում պառաւները Մարկոս աղայի մասին. լսողները թէև գնում ուրիշներին են պատմում, բայց Մարկոս աղայի պատիւը դրանով չի պակասում. ընդհակառակը՝ հեռւից են նրան բարևում, որովհետև շատ պէտք մարդ է. և ինչպէս չբարևեն... գալիս են մօտը, պատմում են իրանց նեղ վիճակը և փող ուզում. նա էլ մեծ մասամբ տալիս է և ինչ որ տոկոսներ հաշւում. փողը ժամանակին չտւեցիր՝ նա էլ ունեցածդ—չունեցածդ ծախել կըտայ և իր փողերը կըսաղացնէ. բա սոնց անէ, հօ ուրիշի փողերը չի պահանջում, իր արդար քրտընքովը աշխատած փողն է ուզում մարդը... նոյն իսկ Տէր Խաչատուրը շատ անգամ, ասում են, Մարկոս աղայից փող է վերցնում և ժամանակին տոկոսով վերադարձնում... էլ այդտեղ երկար ու բարակ խօսելը կամ բամբասելը յիմարուծիւն է...

XII

Մարկոս աղայի կինն ու երեխաները վաղուց են մեռել. մնացել է միայն մի տղայ— Համբարձումը,

որի հետ նա ապրում է իր տան շորս պատերի մէջ:

Համբարձումը արդէն 10 տարեկան է. նա մի վերին աստիճանի օտարոտի և ներդային արարած է. մանկական անհոգութիւն դուք չէք նկատիլ նրա մէջ. նրա մեծ-մեծ սևորակ աչքերի միջից տաղտկութիւնն է միայն մտիկ տալիս: Իր հասակից աւելի զարգացած լինելով՝ հօր անմիջական ազդեցութեան տակ՝ մարդկանց ու կեանքի մասին բոլորովին տարօրինակ գաղափարներ է կազմել. նա համոզւած է որ ամբողջ աշխարհում միայն հայրն է նրան սիրում, իսկ ուրիշները թշնամիներ են, ուստի օտարներից ամեն կերպ աշխատում է խորշել, թէև ամեն անգամ նրան այդ չի արդուում, որովհետև նրա մանկական սիրող սիրտը ժամանակ-ժամանակ կաշկանդող մտքերը խորտակելով՝ ամենաքնքոյշ և բուռն զգացմունքներ է արտայայտում՝ նոյն իսկ օտարների վերաբերմամբ:

Համբարձումի նուրբ կազմը, կարմիր ու կլորակ թշերը, սև ու արտայայտիչ աչքերը ամենքի վրայ լաւ տպաւորութիւն են թողնում. բայց երբ փորձում ես հետը խօսել, մանկական հարցեր ես առաջարկում՝ լաւ տպաւորութիւնը իսկոյն ցաւակցութեան է փոխւում, որովհետև Համբարձումը իսկոյն ցնցւում է, աչքերը գցում է գետնին և ձեր բոլոր հարցերին կամ լռութեամբ

պատասխանում և կամ գլուխը շարժելով: Մարկոս աղան ժամանակ-ժամանակ Համբարձումին հետն առած ուս աստիճանաւորների մօտ հիւր է գնում: Այնտեղ երեխաները հրաւիրում են Համբարձումին, որպէս զի նա էլ մասնակցի նրանց խաղերին. բայց նա գլուխը շարժելով մերժում է նրանց առաջարկը, գոռոզ դէմքով և սեղմած շրթունքներով գնում—անշարժ նստում է իր հօր մօտ և բոլոր ժամանակը լնւո շուրջը դիտում: Մարկոս աղայի քէֆն է գալիս, որ որդին նրանից չի բաժանւում. ուրիշների հետ խօսելիս՝ նա Համբարձումի գլուխն է փայփայում և սեղանից վեր առնում նրան ուտելիցէն կամ շաքարեղէն տալիս: Համբարձումը 2 տարեկան է լինում, երբ նրա մայրը մեռնում է. այդ ժամանակից Մարկոս աղան իր անմիջական հսկողութեան տակ է պահում ու մեծացնում նրան: Ամբողջ աշխարհում միայն Համբարձումն էր, որին Մարկոս աղան սիրում էր, ինչպէս աղւէսը իր ձագուկին. միայն Համբարձումն էր՝ որ վերջիվերջոյ պէտք է տիրանար նրա այնքան դժւարութեամբ հաւաքած հարստութեան. այդ միտքը նրան շատ էր զբաղեցնում և անհանգստացնում... ինչպիսի որդի պէտք է նրանից դուրս գայ, կլուինի արդեօք նա այնքան խելօք ու հնազանդ, որպէս զի հօր կարողութիւնը պահպանէ ու չփչա-

ցնէ. այդ այրող մտքերի ազդեցութեան տակ Մարկոս աղան աշխատում է իր սեփական ճաշակովը կրթել որդուն, որպէս զի նրանից այնպիսի մարդ դուրս գայ, ինչպիսին ինքն է ցանկանում և երեակայում: Այդ պատճառով էլ նա Համբարձումին փակած է պահում տանը, որպէս զի նա չփչանայ. Համբարձումը ոչ մի երեխայի երես չի տեսնում, ոչ մի մանկական ընկերութեան չի մասնակցում. այդպէս է նրա հօր կամքը: Մարկոս աղան փափաքում է, որպէս զի նրա որդին իր հօգու բոլոր ուժովը սիրէ—նախ՝ հօրը, յետոյ պաշտէ նրա փողը. լինի հնազանդ, դառնայ ճարպիկ, ուրիշներին արհամարհէ, իսկ փող աշխատելու անյազ ցանկութիւնը սրտին զարդ շինէ:

Եւ ահա Համբարձումը իր բոլոր ժամանակը համարեա անց է կացնում սենեակում և կամ պարտիզում. նրա հետ լինում են՝ կամ նրա ծիծամայրը—Լուսիկը, կամ ծառաները և կամ ինքը—Մարկոս աղան: Նա խաղալիկներ ունի և նրանցով պէտք է զւարճանայ. տարօրինակ են և նրա խաղալիկները. միջատ ու թռչուն որսալու ցանցեր, ճանճի և մկան թակարդներ, կատի ու շան թաթերը սեղմող կոճղեր, նապաստակ և աղւէս որսալու գործիքներ, պարսաքար կաշուց, պարսաքար փայտից, մանկական ատրճանակներ, մո-

դեզ սպանելու սրածայր գաւազաններ և այլն և այլն: Համբարձումը մի արկղիկ ունի՝ լիքը ոսկորի խորանարդներով, որոնց վեց երեսներին էլ նրբութեամբ նկարած են՝ ոսկի և արծաթ փողերի նշանները: Նա ունի նոյնպէս երկու արձան, որոնք մետաղից են ձուլւած և մի-մի ոտնաչափ բարձրութիւն ունին. իրանց նրբութեամբը նրանք առանձնապէս են աչքի ընկնում: Մինը ներկայացնում է մի աղէս, որի քթի մօտ մի կոյտ ձուկն է դիզած. բերնումն էլ մի ձուկ բռնած նա ուտում է. ձկան պոչը բերնի ձախ կողմից դուրս է ցցւած. աղէսը ձախ թաթը ձկան կոյտի վրայ է դրել, աչքերի պոչերովն էլ այն կողմն է նայում, որտեղ գայլն է կանգնած նիհար ու տխուր դընչով. աջ թաթը դէպի աղէսը պարզած՝ գայլը նրանից ձուկն է խնդրում: Երկրորդ արձանը ձուկ խնդրող գայլին է ներկայացնում, որը առանց պոչի և բոլոր ուժովը փախչում է. սառած ջրի միջից նրա պոչի ծայրն է երևում. չորս գիւղացի, մի-մի գոմբալ ձեռներին, գայլի ետևիցն են վազում. աղէսը, հեռուն կանգնած, բերանն է բաց արել, գայլին լեզու է ցոյց տալիս: Այդ արձանները Մարկոս աղային ընծայ են ուղարկւած:

Մարկոս աղան ուտելու և խմելու շատ լաւ ախորժակ ունի. բայց ուտելուց յետոյ նրա փորսամաւարը մինչև այն աստիճանն է ծանրանում,

որ նա երկու—երեք ժամ շարունակ չի իմանում թէ գլուխը որ պատուր տայ... պառկել չի կարող, բժիշկները խորհուրդ չեն տալիս. ոտով մանզալ—գբօսնել նոյնպէս չի կարող, որովհետև շունչն է կտրւում. ամեն տասը քայլին ստիպւած է լինում նստել, հանգստանալ: Առաջները նա Համբարձումի հետ պարտէզ էր գնում, գործիքները լարած՝ աղէս էր որսում. բայց այժմ այդ էլ նրա համար դժւարացել է. այդ պատճառով, հէնց որ հացի սեղանից նա վեր է կենում, քաշ է տալիս Համբարձումին իր քնարանը, դռները պինդ ծածկում է, դուրս է բերում գաղտնի պահարանից մի արկղիկ, որի բաց անելու և կողպելու գաղտնիքը միայն ինքն է իմանում, բաց է անում և որդուն զանազան հրաշալիք ցոյց տալիս: Հանում է տեսակ-տեսակ կողպէքներ և նրանց գաղտնիքը մանրամասնօրէն բացատրում, ցոյց է տալիս հայելիներ, որոնց միջոցով կարելի է տեսնել թէ հարևան սենեակում ինչ է կատարւում: Հանում է ոսկի և արծաթ փողերի ժողովածու և նրանցից ամեն մինի մասին երկար ու բարակ խօսում ու ցոյց տալիս այն միջոցները, որոնցով ճիշտ կարելի է որոշել իսկական ոսկին: Թանկագին քարերը արժողութիւնների համեմատ դարսում է սեղանի վրայ այնպէս, որ արեգակի ճառագայթները ուղղակի նրանց

վրայ ընկնեն. և միառմի բացատրում է նրանց զանազանութիւնները և առանձնայատկութիւնները: Այդպէս այդ բոլորը նրան ցոյց տալուց յետոյ նորից կողպում է արկղիկը և պահարանի զագտնի խորշերում անհետացնում: Այնուհետև նա սկսում է երկար ու բարակ պատմութիւններ պատմել ու խրատներ տալ որդուն, որոնք Համբարձումին հետզհետէ տաղտկութիւն են պատճառում, որովհետև միևնոյն բանն է անդադար կրկնուում: Մարկոս աղան ոչ մի առիթ ձեռից բաց չի թողնում ներշնչելու իր որդուն, թէ հարուստը, ինչքան էլ յիմարու վատթար լինի, դարձեալ հասարակութեան մէջ պատիւ և նշանակութիւն կունենայ. իսկ փող չունեցողը ինչքան էլ խելօք լինի՝ դարձեալ նրա գինը մի քանի ըուբլի է. հարուստը կարող է գնել նրան և հետը վարել այնպէս, ինչպէս վարւում է իր ձիաների հետ. այսինքն՝ սանձը բերնին դրած՝ նրան կըքշի այն կողմը, որ կողմը ինքն է ուզում. եթէ չլսի՝ հարուստը նրան կըմտրակէ. եթէ թուլանայ՝ դնչին ոսկեղէն գարու տոպրակ կըկախէ: Համբարձումը առաջին տարիները բաւական հետաքրքրութիւն էր ցոյց տալիս իր հօր խօսքերին և գանձերին. բայց այժմ նրանք այլ ևս չեն հետաքրքրում նրան, որովհետև տարիների ընթացքում խիստ շատ

անգամ է նա լսել ու տեսել միևնոյնը: Մարկոս աղան վերջին ժամանակները ինքն էլ է արդէն նկատում, որ Համբարձումը մի տեսակ անտարբերութիւն է ցոյց տալիս նրա խօսքերին, անուշադիր է երևում և խելացնոր. այդ պատճառով սկսում է ամեն մի քայլին յանդիմանել իր որդուն, սպառնալիքներ կարգալ, որպէս զի երեխան սրտում երկիւղ ունենայ և ուշադրութեամբ լսէ ու միտքը պահէ այն ամենը, ինչ որ հայրն է ասում:

Լուսիկը Համբարձումի ծիծմայրն է եղել և մինչև օրս էլ Մարկոս աղայի տունն է կառավարում. Համբարձումին իր աչքի լոյսի նման խնամել ու պահպանել է: Երեխան թէև սիրում է նրան իր մանկական քնքոյշ սրտի բոլոր ուժովը, բայց հայրը շատ անգամ նրան հասկացնում է, թէ Լուսիկն էլ օտար է, անփող է, ծառայ է, պէտք չէ նրան սիրել ու վզին փաթաթել: Համբարձումը լուրթեամբ է լսում հօր այդ խօսքերը և բնազդօրէն աշխատում է հօր առաջ չիօսել Լուսիկի հետ. բայց երբ հայրը տանը չի լինում, այն ժամանակ նա երկար չի կարողանում բռնաբարել իր սիրտը: Մօտենում է, օրինակ, Լուսիկը և կամենում է նրան համբուրել ու փայփայել. իսկ նա երեսը շուռ է տալիս. բայց երբ Լուսիկի աչքերում արցունք է տեսնում, իսկոյն

Թռչում է տեղից, ընկնում է նրա գիրկը և ինքն է սկսում խելագարի նման նրան համբուրել, արտասուել ու թոթովել.

—Նանի ջան, լաց մի լինիր, ուզում ես, համբուրիր ինձ:

Լուսիկը մի ձեռով արցունքներն է չորացնում, միևսովն էլ իր հոգուց անելի սիրած, իր կաթնով ու սիրով խնամած Համբարձումին փարւելով՝ մայրական ամենաքնքոյշ համբոյրներ է գրօշմում նրա աչքերին, ճակատին, թշերին... հիացածի նման ուշիուշով լսում է նրա անմեղ զրոյցներն ու մխիթարում:

—Ինչի չես թողում որ քեզ համբուրեմ, հոգիս, մրմնջում է նա սաստիկ շիկնելով.

—Ախ, նանի ջան, հայրիկիցս եմ վախում... բայց չեմ կարող, նանի ջան, չեմ կարող նրա խրատները կատարել...

—Հայրիկիդ պէտք է լսես, հոգիս...

—Հնա, լսես... նա ասում է որ դու օտար ես, ծառայ ես, քեզ համբուրել չի կարելի.

—Գու էլ մի համբուրիր.

—Լաց ես լինում ախար

—Լաց չեմ լինիլ.

—Ինչի, ինձ չես սիրում.

—Ո՛նց չեմ սիրում, մենակ քեզ եմ սիրում աշխարհիս վրայ, սրղիս, բալէս, ջանս, արևս...

ուզում ես, քեզ համար համով գաթա եմ թխել տւել, գնանք...

Համբարձումը համ գաթա է ուտում, համ էլ թռչկոտում է Լուսիկի շուրջը և խօսում.

—Նանի ջան, բաբօն լաւ մարդ ա.

—Լաւ մարդ ա, որդի.

—Նրան էլ գաթա կըտամ.

—Գըտամ.

—Բամբակիցդ էլ ինձ մի քիչ կըտամ.

—Վեր առ, ինչքան սիրտդ ուզում ա, հոգիս.

—Գիտես ինչի համար եմ ուզում.

—Գիտեմ.

—Գիտես... հով քեզ ասեց.

—Ես ինքս տեսայ.

—Տեսար... հայրիկիս չես ասիլ, չէ.

—Չէ, չէ, չեմ ասիլ, հանգստացնում է նրան Լուսիկը համբուրելով սպրդնած թշիկները. Համբարձումը մի քանի կտոր բամբակ վեր առնում ծոցն է դնում, նրանցով թռչնիկների բներն է նա յարթում, ծերունի Բաբօյի համար էլ մի գաթա ձեռին բռնած՝ դուրս է գալիս բակը, վազում ու մտնում պարտէզ:

Համբարձումը չափազանց սիրում է բնութիւնը. հայրը նրան դեռ ևս այդ չի արգելել. գուցէ մոռացել է: Հէնց որ պարտէզի դուռը ետեւից ծածկելով նա մտնում է ծառերի և թփերի,

արօտների և ծաղիկների խորքը՝ հետզհետէ հոգով-մարմնով անձնատուր է լինում գեղեցիկ բնութեան և դառնում նրա հարազատ գաւակը։ Հոտաւէտ ծաղիկների հետ նա ծաղկում—կարմրում է, թաւիշ ու մետաքս թիթեռների հետ թռչկոտում—ժպտում է և քաղցրաձայն թռչնիկների հետ ճլվլում-ծրվծրվում։

Գոյնզգոյն ծաղիկներից, հիւթալի դալարներից փնջեր, պսակներ ու գօտիներ է հիւսում, նրանցով իր սիրունիկ ճակատը, կուրծքն ու մէջքն է զարդարում. մեծ-մեծ տերևներից հովանոցներ է շինում, ձեռին բռնած ուրախ-զւարթ ման է գալիս ծառերի շուրջը և անմեղ շթունքից անորոշ խօսքեր բաց թողնելով՝ երկնքի թռչնիկներին իր գիրկն է հրաւիրում. նա սաստիկ է փափաքում բռնել նրանց իր նազուկ թաթիկների մէջ, ցանկանում է սիրել նրանց, ինչպէս սիրում է Լուսիկին ու Բարօյին, ցանկանում է համբուրել նրանց, իր թշերին մօտեցնել և այդպէս մի փոքր կարօտը առնելուց յետոյ՝ նորից ազատութիւն տալ նրանց։ Բայց թռչնիկները նրանից վախենում են. նրա ոտների ձայնը լսելիս՝ բարձրանում են ծառերից, թռչում են դէպի եթերային աշխարհը և Համբարձումի սիրող սիրտը վշտացնում։ Տխուր աչքերով է նա դնում նրանց թեթև թուփշքը... Ինչպէս

ցանկանում է նա, ինչպէս փափաքում է նա, նոյնպէս թեթև թևեր սունենալ, նոյնպէս դէպի երկինք թռչել, ազատ և ուրախ թռչնիկների հետ եղբայր դառնալ։ Այդ ցանկութիւնից մղւած՝ շատ անգամ է նա բարձրանում հսկայ ծառերի գագաթները, որտեղից սքանչելի տեսարաններ են պարզւում մինչև ընդարձակ հորիզոնի հեռաւոր կլորագիծը...

Այնտեղ, շատ հեռւում, որտեղ երկինքը երկրի հետ է միացած, լեռների շղթաներ են երեւում. նրանց սրածայր և բուլթ գագաթները, ձեռ-ձեռի տւած հսկաների նման, կարծես, պար են գալիս, մէկ չօքում են, մէկ բարձրանում. մի քանիսը գլխներին սպիտակ թաշկինակ են գցել, մի քանիսն էլ—կապոյտ. իսկ նրանց շուրջը մանր ու սպիտակ բազմաթիւ ոչխարներ են հաւաքւած. նրանք մերթ հսկաներին են մտիկ տալիս, մերթ կանաչ արօտը պոկում...

Հորիզոնից մի փոքր բարձր՝ երկնքի երեսին՝ արծաթ և ոսկի ամպիկներ են խաղ անում արեգակի շուրջը. ինչքան նման են նրանք նոր կշտացած կայտառ գառնուկներին... ինչքան սիրուն են, թեթև են, ուրախ են... խաղալով—խաղալով ամպիկները մօտեցան ու ծածկեցին արեգակի երեսը. բայց նոյն ըոպէին արեգակի ճանհները ոսկէզոյն փետուրների նման դուրս

Թուան ամպիկնների գրկերից, գնացին ու մեխուեցին սարերի ձիւնագարդ գազաթներին... տեսէք, տեսէք... գազաթները վառուեցին ու կրակ դառան... ինչքան նման են դեղնագոյն շաքարի գլխներին... նանի ջան, վեր առ մուրճն ու դանակը, նրանցից մի կտոր ջարդիր ու ածա շաքարամանի մէջ, ես այսօր այդ շաքարովն եմ կամենում սուրճ խմել...

Սարերից դէսը ընդարձակ դաշտ է տարածւած. նրա մի մասը մուգ կանաչ գոյն ունի, միւսը—բաց դեղին. դաշտի միջով գետն է օձի նման սողալով գալիս և անցնում Գ. քաղաքի միջով. Համբարձումը իր ձախ կողմից քաղաքի մէկ-մէկու վրայ կուտակւած տներն է տեսնում, իսկ այ կողմում նրանց ընդարձակ պարտէզի այն մասն է, որտեղ պտղատու ծառեր են միայն տնկւած և որտեղ լինում է մեծ մասամբ Բաբօն, ծերունի պահապանը: Համբարձումը տեսնում է նրան և զիլ ձայնով բղաւում. «Բ ա բ օ օ»... բայց Բաբօն նրան չի լսում. նա ցած է իջնում ծառից և նորից վազում ծերունու մօտ: Համբարձումը շատ է սիրում Բաբօյին, շատ է սիրում լսել նրա զրոյցները. ինչն է զրա պատճառը, նա չի կարող բացատրել. գուցէ նրա համար է սիրում, որ Բաբօն շատ է պառաւ, նրա գլուխը և ամբողջ երեսը՝ մինչև աչքերը և ականջների ե-

տեր սպիտակ ու երկար մազերով է ծածկւած. գուցէ նրա համար է սիրում, որ Բաբօն միշտ մինակ է ապրում պարտէզի խորքում, ոչ մի ծանօթ շունի և ոչ ոքի հետ չի խօսում. եթէ մի բան հարցնես՝ կարճ պատասխան կըտայ, այն էլ հինգ ըուպէ մտածելուց յետոյ. վերջապէս Համբարձումը Բաբօյին գուցէ նրա համար է սիրում, որովհետև ինքն էլ, բնութեան գրկում սրբագործւելով, գլխից մինչև ոտը մարմնացած սէր է դառնում ամեն անգամ:

Բաբօն պարտիզում անգործ չի մնում ամենեւին. դանակն ու կացինը, սղոցն ու մուրճը միշտ մօտին է դրած: Համբարձումը կախ է ընկնում նրա թեւից և խնդրում, որպէս զի թողնէ գործը և նրա հետ զրոյց անէ: Բաբօն սկզբում սովորաբար ոչինչ չի պատասխանում, լուռ ու մունջ իր գործն է շարունակում: Պէտք է ասել, որ նա Համբարձումին սրտով շատ է սիրում, իր կորած թոռան կարօտը նրանից է առնում: Համբարձումը բնագրով զգում է որ Բաբօն նրան սիրում է, ուստի չի խրտնում նրա օտարոտի վարմունքից. ինչպէս երես առած երեխայ՝ նա այնքան է նրան աղաչում ու ճտովը ընկնում, որ վերջիվերջոյ Բաբօն կատարում է նրա ուզածը. երկսով գնումնստում են մեծ կաղնու տակ. Համբարձումը, Բաբօյի ծնկների մօտ պազած, անթարթ աչքերն

էլ նրա դէմքին ուղղած՝ սրտատրոփ սպասում է՝ թէ երբ նրա բեխերը կըշարժեն, բերանը կըբացուի, լեզուն խօսել կըսկսի: Բարօն, բեխերի նմանող թաւ ունքերը մի քանի անգամ խաղացնելուց յետոյ, աչքերը տրեխի լայն քթին յառած՝ մի քանի ըոպէ մտածմունքի մէջ է խորասուզուում. ապա ինքնիրան մըթմըթալով, հուպ է տալիս փափաղի ծայրը, խորն է խրում գլուխը նրա մէջ, մի քանի անգամ նրանով օդն է պոզահարում և վերջապէս, ահագին ձեռներովը օդի մէջ ճանճ բռնելու շարժումներ անելով, խօսել է սկսում: Նա խօսում է գլխաւորապէս հովիւների, որսորդների և հողագործների կեանքից, անտես չի անում և աւագակներին. Համբարձումի թախանձանքներին զիջանելով՝ տասներորդ անգամը պատմում է և իր թոռան Աւետի մասին՝ թէ ինչպէս նա սարի լանջին գառնուկների հետ խաղ էր անում. Բարօն իր թոռան համար դարմանից գլխաման էր հիւսում, ժայռերի մամուռներից նրա համար փափուկ անկողին էր պատրաստում ու վրէժն քնացնում: Երբ Աւետը ծարաւ էր լինում՝ Բարօն այծի ծծերից կաթն էր կթում լայն տերևների մէջ ու նրան խմացնում: Բայց Աւետին չար մարդիկ զողացան. Բարօն մինչև այսօր էլ չի իմանում թէ նրա թոռը որտեղ է, ո՞րք է թէ մեռած: Համբարձումը ծերունու աչ-

քերում արցունք է նկատում, իր աչքերն էլ արցունքով են լեցում: Բարօն բարձրանում է տեղից և դանդաղ քայլերով հեռանում. Համբարձումը մնում է մինակ. ձախ ձեռով կաղնու բունը գրկած, ճակատն էլ ձեռին յենած՝ լուռ ու մունջ նա նայում է Բարօյի թիկունքին, ուզում է բան ասել, բայց չի կարողանում, կոկորդը հա՛ կըծկրում է, նա հագիւ է կարողանում այնտեղ հաւաքւած արցունքի կաթիլները հետզհետէ կուլ տալ... տխրութիւնը որտեղիցորէ գալիս և մառախուղի նման ծանրանում է նրա վճիտ ու սիրող սրտի վրայ. Բարօն անբաղդ է, նա այդ զգում է. զգում է նոյնպէս, որ եթէ Աւետը լինի, Բարօն այլ ևս լաց չի լինիլ, իրան բաղդաւոր կըզգայ. բայց ի՛նչպէս գտնել Աւետին... և ահա Համբարձումի մանկական ուղեղը մտատանջութիւնների մէջ է ընկղմում... նա զարթնում է միայն այն ժամանակ՝ երբ ծառայի ձայնն է լսում՝ թէ հայրիկդ քեզ է կանչում. նա բարձրանում է տեղից, գնում է դէպի տուն... և հէնց որ մտնում է իր հօր սենեակը, անախորժ զգացմունքներն էլ մտնում են նրա սիրտը և արճիճի գնտակների նման ծանրանում նրա վրայ...

XIII

Համբարձումը թէև 10 տարեկան է արդէն, բայց հազիւ մի ամիս կըլինի ինչ որ սկսել է կարգալ-գրել սովորել. տիրացու Սիմօնի մօտն է նա կարգում. Տէր Խաչատրի ասելով՝ նրանից աւելի հմուտ վարժապետ Գ. քաղաքում չկայ. ասենք՝ Մարկոս աղան որդու ուսման մասին շատ էլ չի մտածում. նամակ գրել և անունը ստորագրել իմանայ, համարակալի վրայ էլ կոպէկների և մանէթների հաշիւը ճիշտ գցի՝ հերիք է. ինքը 30 տարեկան էր, անունը գրել չէր իմանում, մարդ հօ դառնա... առանց ուսուցչի, իր աշխատանքովն է նա կարգալ սովորել. էֆիմերդէն մշտական դրած է նրա սեղանի վրայ. եթէ նրա փորի որևէ մասը խաղայ՝ իսկոյն բաց անում կարգում է և իմանում թէ դա ինչ է նշանակում. այդ գիրքը շատ է տարածւած Գ. քաղաքում. տուն չէք գտնիլ՝ որտեղ նրանից մի կամ երկու հատ չլինի:

Մարկոս աղան գրել ևս իմանում է. իր անունից և ազգանունից ջոկ ուրիշ խօսքեր ևս նա գրում է. բայց երբ իր գրածը դժարանում է յետոյ կարգալ, յարմար առիթ է փնտրում, իր ձեռագիրը ուրիշներին է կարգալ տալիս և այդպէս մտաբերում բովանդակութիւնը: Մարկոս ա-

ղան գրելու մէջ երկար ժամանակ փորձելուց յետոյ այն եզրակացութեան է հասել, որ այբբենաբանում աւելորդ տառեր շատ կան, որոնք համ ժամանակ են խլում, համ էլ մարդու գլուխը շժմեցնում. հեշտութեան համար նա համառօտել և իր համար նոր այբբենաբան է կազմել: Նրա այբբենաբանում, օրինակ, Ռ և Օ տառերի տեղ միայն Օ տառն է ընդունւած. Ե և Է տառերի տեղ — Է, Ի և Վ-ի տեղ—Վ, Հ և Յ-ի տեղ—Յ և այլն: Մարկոս աղան երկու տառ շատ է սիրում. դրանք՝ Ը և Յ տառերն են. նա նրանց այնքան է սիրում, որ մի որևէ բառ գրելիս՝ ամեն մի վանկում աշխատում է նրանց էլ անպատճառ տեղ տալ. եթէ երկուսին միասին գետեղելը անհնարին է թւում, գոնէ մէկին Մարկոս աղան անպատճառ կըհիւրասիրէ: Ջարմանալին այն է, որ այդ աւելորդ տառերը միայն ուրիշներին են մոլորեցնում. ինքը—Մարկոս աղան, իր ձեռագիրը կարգալիս, աւելորդ գրած Ը և Յ տառերը չի արտասանում: Պատահում է որ նա, մի խօսք գրելիս, սխալւում է, մի տառի տեղ ուրիշը գրում. այդ սխալ գրւած տառերը լինում են դարձեալ կամ Ը և կամ Յ, այսինքն նրա սիրած տառերը. իսկ կետադրութեան նշանները նրա համար ամենևին զոյուլթիւն չունին. երբ մինը նրան այդ մասին նկատողութիւն

անէ՝ «ճանճերի հետքեր են դրանք, տօ» պատասխանում է Մարկոս աղան, հեգնելով: Եթէ նրա ձեռատետրը ձեր ձեռը ընկնի, այնտեղ դուք անա ինչպիսի ուղղագրութեամբ գրած բառեր ու նախադասութիւններ կրկարդաք.

«Փ ը ո ղ, յ ը ա ց, օ յ ը թ ը ի (որդի), դ ը ա տ ը ա վ ը օ ը (դատաւոր), է յ ը ը թ օ ը մ (երդում), յ ա յ ը օ ը (հարիւր), Թ ա յ թ ը օ ս ը ի ց ը ը ս տ ա յ ց ը ա յ ը է ը կ օ կ ը օ վ ը (թաթոսից ստացայ երկու կով), դ ա յ ս ը ա բ ը խ ը է չ ը օ ի ը է շ ը ս ա յ տ ը կ ը է լ ա թ օ ը վ մ ա ն ը ս կ ը օ յ ը ը ա վ ը (դասար խեչօյի էշը սատկել ա, թումանս կորաւ):

Այդպէս է գրում Մարկոս աղան և շատ գոհ է իր գրածից, թէև մի-մի ժամանակ աւելի լուրջ սխալներ ևս է անում: Հաշիւ տեսնելիս՝ մինի հաշիւը միւսի հետ է խառնում, ստացած փողը մոռանում է գրել, տւած փողը երկու անգամ է գրում. այդ պատճառով շատ անգամ աղմուկ է բարձրանում նրա և ուրիշների մէջ. բայց հաշտարար դատաւորը ամեն ինչ պարզում է և Մարկոս աղան իր փողերը լիովին ստանում:

Համբարձումին ուսումնարան ղրկելուց առաջ՝ Մարկոս աղան մի քանի փորձ է անում, որպէս զի որդուն համարակալի վրայ հաշիւ անել սովորեցնի.

—Մէ կոպէկ, մէ կոպէկ, մէ կոպէկ... հը', ասա ու գցիր, հրամայում է որդուն: Համբարձումը հատիկները շաքարեղէնների նման բռնելով դէպի ձախ է տանում և բարակ ձայնով ասում.

—Մէ կոպէկ, մէ կոպէկ, մէ կոպէկ...

—Էլի գցիր ու ասա.

—Մէ կոպէկ, մէ կոպէկ, մէ կոպէկ.

—Հը', էլի տար.

—Մէ կոպէկ.

—Պրծաւ.

—Պրծաւ.

—Ինչքան կոպէկ տարար.

—Մէ կոպէկ.

—Տօ, յիմար, տասը կոպէկ ախար գցեցիր. ասա տասը...

—Տասը.

—Հրէս քեզ տասը, ասում է Մարկոս աղան, տասնաւորներից մի հատիկ դէպի ձախ տանելով.—դէ, նորից գցիր, մէ կոպէկից ասա.

—Մէ կոպէկ, մէ կոպէկ, մէ կոպէկ, ասում է Համբարձումը, տասնաւորներից երեք հատ դէպի ձախ տանելով.

—Տօ, էշի լակոտ, էդ կոպէկ չի, բղաւում է Մարկոս աղան, սաստիկ բարկանալով. Համբարձումը երկու ձեռները արցունքախառն աչքերին է տանում.

—Կորիւր աչքիցս, հրամայում է Մարկոս աղան. երեսխան երկչոտ քայլերով սենեակից դուրս է գալիս և վազում Լուսիկի մօտ:

Համբարձումի գնալուց յետոյ Մարկոս աղան ամեն անգամ դառն մտածումնքների մէջ է ընկնում. նա սաստիկ է վշտացած, որովհետև որդին բթամիտ է երևում, խելքը ոչ մի բան չի կտրում. դրա վերջը ինչ կըլինի խխար... սարսափելի մտքեր են գալիս ու փաթաթւում նրա ուղեղի շուրջը. սրտումն էլ ինչ որ մի բան ասեղի նման հն ծակում է և ցաւ պատճառում. սառը քրտնքի խոշոր կաթիլները հետզհետէ կաշու տակից դուրս են գալիս ու նստում նրա ճակատի ու քունքերի վրայ...

—Ա՛ խ, մ ե ն ան կ ե մ, մ ե ն ան կ, մըմնջում են նրա փամփիլիկ շրթունքները...

Վերջապէս մի օր Մարկոս աղան որդու ուսման մասին երկար ու բարակ խորհուրդ է անում Տէր Խաչատրի հետ. հետևանքը մեզ յայտնի է: Տիրացու Սիմօնի տունը Մարկոս աղայի տնից շատ հեռու չէ. նայն օրը Մարկոս աղան Համբարձումին վեր առնում նրա մօտ է տանում: Բերսարէ խանումը, ծամոնը բերնին սեղանի առաջ նստած, ինչ որ թերթեր է կարդում. աշակերտներն էլ բակումը խաղում են: Մարկոս աղային տեսնելով՝ Բերսարէ խանումը իսկոյն

վեր է կենում տեղից և նրան առաջարկում իբր տեղը նստել, որովհետև Սիմօնը էս ըռպէիս տուն պէտք է գայ: Մարկոս աղան նստում է և մեքենաբար թերթերից մինը առնում ձեռք... Ինչ որ հայերէն է գրած. ակնոցը աչքին է նա դնում և սկսում կարդալ. «Ով խնձորը կրմաքրի և չի ուտիլ, ով աղջկայ հետ կընստի և նրան չի համբուրիլ, ով գինի կունենայ և չի խմիլ, նա իսկական յիմար է»...

—Լա՛ւ, ասում է Մարկոս աղան և մի ուրիշ թերթ վերցնում սեղանից ու կարդում. «Ով մէկ անգամ համբուրեց և երկրորդ անգամ չի համբուրիլ, նա արժանի չէ ստացած բաւականութեանը»...

—Փի՛հ, ասում է Մարկոս աղան և էլի կարդում. «Ինչո՛ւ են գեղեցիկ ծաղիկներին համբուրում և նրանք դարձեալ գեղեցիկ են մնում.— գեղեցիկ օրիորդներ, թողէք ձեզ էլ համբուրեն, դրանից դուք չէք վատանայ»...

—Հողեմ քո գրողի գլուխը, մըթմըթում է այս անգամ Մարկոս աղան դժգոհ ձայնով, դէն է գցում թերթը և երրորդը վեր առնում-կարդում. «Չպէտք է բարձր համբուրել, սակայն համբոյրը խուլ էլ չպէտք է լինի: Համբոյրից յետոյ անմիջապէս չէ կարելի խօսել. պէտք է մի փոքր միջոց սպասել, որ տպաւորութիւնը չթուլանայ»:

Այդտեղ նա թողնում է թերթը և դառնում Բերսարէ խանումին.

— Սպանեց, էլի, խանում, էս ինչեր ա գրած ախար.

— Լաւ, լաւ բաներ է գրած, Մարկոս աղա.

— Ինչն ա լաւ, աղչի, սա ինչ ա, գազետ ա...

— Հրամբես, Մարկոս աղա, մեր միակ շաքաթաթերթն է.

— Ո՞րտեղ ա ըլում, անունը ինչ ա...

— Մ ա ը ա խ է անունը...

— Մ ա ը ա խ...

— Հրամբես, Մ ա ը ա խ. երևելի շաքաթաթերթ է Մ ա ը ա խ ը, Մարկոս աղա:

Մարկոս աղան էլի կարդում է. «Օրիորդի ճիտը միայն համբուրել—դա միւնոյնն է թէ մի կտոր պանիր ուտել և համեղ դոլման թողնել»...

— Զահրումար ուտես դոլմի տեղաք, փուչ կենդանի, ասում է Մարկոս աղան ու թերթը գցում ոտի տակ: Բերսարէ խանումը լուռ ու մունչ թերթը բարձրացնում է ու կրկին դնում սեղանի վրայ:

— Ախար գազետ, գազետ որ ասում են, միջումը էդպէս բաներ են գրում, հը՞, խանում, խելքդ ո՞նց ա կտրում.

— Մարկոս աղա, ներեցէք, բայց մեր ազգը ապերախտ է.

— Ո՞նց...

— Մ ա ը ա խ ը այսքան երկար տարիներ մատաղ սերունդ է կրթում, մինչև անգամ զօրով է կրթում... այո, տղերանց խելքին կուշտ կերակուր է տալիս, աղջկերանցն էլ ճաշակն է ազնւացնում, այսինքն՝ ինչպէս ասեմ որ դուք հասկանաք... այսինքն՝ ցոյց է տալիս թէ ինչպէս հայ օրիորդները պէտք է երիտասարդների հետ համբուրեն. եթէ Մ ա ը ա խ ը չլինի՝ հաստատ իմացէք որ հայերը թէ իրանց լեզուն կը մոռանան և թէ նորից կը սկսեն ասիացու նման կոշտ ու կոպիտ ձայներով համբուրել օրիորդների հետ...

— Հա, հա, հա, այ խանում ջան, շատ հանաքբազն ես եղել, ես այդ չէի իմացել...

— Իհարկէ կը ծիծաղէք... մեր հասարակութիւնը դեռ ևս տգէտ է:

— Ինչով ա տգէտ, խանում.

— Ես ինչ իմանամ թէ ինչով, բոլորն էլ այդպէս են ասում, գրում...

— Ի՞նչ են գրում է...

— Գրում են որ հայ հասարակութիւնը իբր խմբագիրներին գնահատել չի սիրում...

— Սաքի ո՞նց գնահատել.

— Գնահատել, էլի, չէք հասկանում, փող տալ, որպէս զի ինքը—խմբագիրը լաւ ուտի, լաւ

լամի ու չհիւանդանայ, որովհետև նրա կեանքը իրան չի պատկանում, ազգին է պատկանում...

— Զեմ հասկանում, խանում ջան, ինչեր ես ասում.

— Այ, բոլորն էլ ձեզ նման են խօսում, Մարկոս աղա. ամենքն էլ սպասում են, թէ երբ կըմենուի խմբագիրը, որպէս զի նրա դազադի վրայ պսակներ դնեն...

— Գիտես ինչ կայ, խանում... ես ոչ Մարախ եմ ուզում, ոչ խմբագիր թաղել և ոչ աղջիկ համբուրել, հասկանում ես թէ չէ. ես ուզում եմ որ իմ որդին կարդալ, գրել ու հաշիւ անել սովորի, լաւ սովորի, հասկանում ես թէ չէ... ես էդ թաւուր գազետին ոչ փող կըտամ, ոչ էլ կըկարդամ. առանց քու Մարախին ես մարդ եմ դառել, իմ որդին էլ հալբաթ շուն չի դառնալ...

Այդ միջոցին տիրացու Սիմօնը ներս է մտնում. իմանալով թէ խօսակցութիւնը ինչի մասին է, նա սաստիկ է բարկանում կնոջ վրայ, Մարախի թերթերը սեղանի վրայից հաւաքում է ու տանում զցում այն օթեակը, որը խոհանոցին առհասարակ մօտ է լինում և որտեղ ոչ որ ձի կամ էջ հեծած չի գնում:

Մարկոս աղան, այդ տեսնելով, մի փոքր հանգստանում է. պայմանների մասին մանրա-

մասնօրէն խօսելուց յետոյ Համբարձումին թողնում է այնտեղ ու գնում տուն: Մենք էլ թողնենք նրանց ու վերադառնանք եկեղեցի:

XI

Մաթոսը պատարագի զանգ է խփում. տիրացուները վերևի դասն են հաւաքւել և «խորհուրդ խորհին» են երգում. Սահակ սարկաւազը շատ բարձրիցն է սկսել, հրաշալի ելեէջներով ճոճուում է և բառերի վանկերը անատամ բերնի մէջ շարաշար ծամծմում: Կանանց դասից ինչ որ ձայներ են գալիս. Մարկոս աղան ունքերը կիտած այն կողմն է նայում, մուխսի Բաղալին մատի ծայրովը մօտ է կանչում և հրամայում—գնալ այնտեղ և սաստել կանանց՝ որպէսզի եկեղեցում չխօսեն:

Մուխսին գնում է. իսկ Մարկոս աղան շուռ է գալիս և նրա աչքերը պատահամբ մտավաճառ Փանոս աղայի փորին են ընկնում, որը թէև նոյնպէս մեծ է, բայց ոչ այնքան. մի ըստէ նա մտիկ է տալիս այդ փորին և յանկարծ յիշում, որ ինքը ուզում էր նրան, այսինքն Փանոսին, տեսնել ու մի կերպ ծախել նրա վրայ իր նորածին աբու հորթը, որովհետև նրան պահելու հաշիւ չկայ.

եթէ էգ լինէր, ինչպէս նա յոյս ունէր որ կըլինի, ուրիշ բան էր: Եւ ահա Մարկոս աղան շարժուում է տեղից, ծանր քայլերով մօտենում է սրբերի պատկերներին և սկսում կիսավառ մոմեր հանգցընել. հանգցնելով-հանգցնելով նա հետզհետէ Փանոս աղային է մօտենում:

— Խաղաղութիւն ամենեցուն, ասում է պատարագիչը: Մարկոս աղան երեսն է խաչակրնքում և յետոյ մատի ծայրովը Փանոսի փէշից քաշում:

Վերջինը շուռ է գալիս և հէնց որ տեսնում է նրան՝ իսկոյն բերնի ծայրերը մինչև ականջներն է ձգում և քծնողի սովորական շարժումներով մի քանի անգամ սեղմում իրան պարզ-լած ձեռը:

— Բան եմ ասում, Փանոս, սկսում է Մարկոս աղան.

— Հրամայիր, Մարկոս աղա, պատասխանում է Փանոսը, ականջը նրա բերնին մօտեցնելով.

— Մի հորթ ունեմ, արի քեզ վրայ ծախենք, ուզում ես տեսնել.

— Տեսել եմ, արու ա, ծնած սահաթն էլ եմ իմանում, Մարկոս աղա, էդ մեր փէշակն ա. հորթդ շատ ա մատղաշ, քաշն էլ հալբաթ թեթև կըլի:

— Ի՞նչ ես տալի.

— Քու քէֆը ինչքան ա ուզում, Մարկոս աղա. — Եօթը մանէթ կըտաս.

— Չատ թանկ ես ասում, ոսկոր-կաշի ա նա հըմի, ինչքան պէտք ա ուտի՝ որ միս ու եղ կապի: — Վեց մանէթ չես տալ.

— Հինգ մանէթ կըտամ, էն էլ քո անուշ խաթեր համար, Մարկոս աղա. ուզում ես, փողն էլ էս սահաթիս տամ:

— Էժան ա, բայց թող քո ասածը ըլի. ժամից որ դուրս գանք՝ մարդ ղրկիր, վեր առ, հորթը հըմի քոնն ա:

— Սաղ ըլես, համեցիր քո հինգ մանէթը:

Մարկոս աղան հինգ մանէթը սուսիկ-փուսիկ գրպանն է ղնում ու հեռանում նրա մօտից: Կանանց դասում բարձրաձայն խօսակցութիւնը չի վերջանում. ընդհակառակը, գնալով աւելի է սաստկանում:

— Ախար դա ի՞նչ անկարգութիւն է, նկատում է Մարկոս աղան իր հարևանին.

— Է՛հ, կնանիք են էլի, ըսկի կարելի բան է դրանց սուս անելը, պատասխանում է վերջինը:

Մարկոս աղան ոչինչ չի ասում. գալիս է Բաղալը. Մարկոս աղան իսկոյն նրան է դառնում.

— Այ տղայ, էգ ի՞նչ աղմուկ ա ախար.

— Օռօռօյենց հարսն ա, Մարկոս աղա.

— Ի՞նչ ա ասում.

— Իր բերած խալիչայի վրայ ուզում ա նստի.
— Յետոյ.

— Ուշացել ա. նրանից առաջ եկողները պինդ
նստել են խալիչայի վրայ ու չեն ուզում վեր կենալ.

— Ովքեր են էդ նստողները.

— Էլի նրանք են, Մարկոս աղա. Պուտպու-
տենց Լուսիկն ու Մայասիկենց Զմրուխտը. ան-
նամուս զատեր են. վեր կացէք եմ ասում. «քո
դուշմանը փոսից վեր կենայ ու շլինքիդ նստի»
ասում ա Պուտպուտենց Լուսիկը ու վրէս ծի-
ծաղում:

«Առէք-կերէք»ի զանգն են խփում. դպիրները
ներքևից, Սահակ սարկաւազն ու տիրացու Սի-
մոնը սեղանի վրայից սկսում են խմբովին եր-
գել. Գասպարն ու Մելքոնը ճզվզում են, Մինասն
ու Սիմոնը բզզում, սարկաւազը ճռնչում է, Գա-
ւիթն էլ մռնչում:

«Սուրբ-Սուրբը» Գաւիթն է ուզում երգել, բայց
Մինասը առաջ է ընկնում և խլում է նրա բեր-
նից: Գաւիթը բարկանում է և այդ պատճառով
«յամենայնիւն» աշխատում է մինակ ինքն ասել.
Գասպարն ու Մինասը թէն փորձում են նրա հետ
միասին երգել, բայց կէս ճանապարհին կանգ են
առնում, որովհետև Գաւիթը շատ փի ս-փի ս
է նրանց մտիկ տալիս, համ էլ իր մռնչոցով
նրանց ձայնը խափանում է բոլորովին: Տէր Բար-

սամը, երկար ժամանակ լուռ կանգնելուց ձանձ-
րանալով, նոյնպէս իր ձայնը խառնում է դպիր-
ների ձայներին և ահա եկեղեցում մի սար-
սափելի աղաղակ է բարձրանում. կանանց ձայ-
ները այլ ևս չեն լսում. ժողովուրդը, ընտելա-
ցած լինելով այդ սարսափելի ձայներին, դուրս
չի փախչում, այլ անշարժ մնում է կանգնած իր
տեղում. շատ մեծ է նրա հաւատը, ականջն էլ
ծնւած օրից ճռնչոցներից ջոկ ուրիշ ոչինչ չի
լսել: Բայց կան մի քանի կրթւած երիտասարդ-
ներ, որոնց լսողութիւնը նրբացած է. նրանք
չեն կարող անտարբերութեամբ լսել տիրացու-
ների անկարգ և անհամ գորգոռոցը, նրանք հո-
գեպէս չարչարում են. այդ պատճառով շուտով
են դուրս գալիս եկեղեցուց: Տէր Խաչատուրը
սաստիկ է ատում այդպիսի երիտասարդներին,
անհաւատն Եր է նրանց կոչում:

Գասպարը բուրվառը ձեռին մատուռն է վա-
զում. մի ըոպէից նա ետ է գալիս և կրակով լիքը
բուրվառը մօտեցնում Տէր Յովակիմին. վերջինը,
խնկամանի վրայ խաչակնքելով, երկու գդալ
խունկ է վեր առնում և ածում վառ ածուխի
վրայ. խնկածուխը սկսում է առատութեամբ դուրս
գալ այնտեղից և տարածւել օդի մէջ:

Տէր Յովակիմը՝ աջ ձեռին բուրվառը բռնած, ձախ ձեռին էլ զոգաւոր ահազին թաբախը, ըսկըսում է բուրվառել՝ սրբերին, տէրտէրներին ու զպիրներին. յետոյ վերեւի դասից ցած է իջնում և մտնում ժողովրդի մէջ. ո վ ն ր ա թ ա բ ա խ ը փ ո գ է գ ց ու մ, ն ա է լ ն ր ա ք թ ի ն խ ու ն կ է ծ խ ու մ: Տէր Յովակիմի ետեւից թաւալեւոյ՝ գնում է երեցփոխանը—Մարկոս աղան... փորսամաւարը առաջ ցցած՝ հանդիսաւոր ձայնով բարբառում է. «հրամայեցէք եկեղեցու թաբախին»: Նրա ետեւից գնում է տիրացու Միմօնը, որը սեղանից յատկապէս դրա համար է ցած իջել. ոչխարի ձայնով նա շուտ-շուտ բառաչում է. «հրամայեցէք լուսարարի թաբախին». նա լուսարարութիւն էլ է անում: Նրա ետեւից երեք երեխաներ են գնում. երկու ձեռներով թաբախները կրծքերին սեղմած՝ զիլ ձայներով նրանք հա կանչում են. «հրամայեցէք էջմիածնի թաբախին, հրամայեցէք աղքատաց թաբախին, հրամայեցէք որբոց և այլոց թաբախին»: Ամենից վերջը գնում է ժամկոչ Մաթոսը. գլուխը ցած գցած՝ երկչոտ ձայնով նա ժամանակ-ժամանակ արտասանում է. «հրամայեցէք ժամկոչի թաբախին»: ժողովուրդը նրա թաբախը կոտրած գրօշներ ու ժանգոտած կոպէկներ է գցում. իսկ Տէր

Յովակիմի ու երեցփոխանի թաբախները—մեծ մասամբ արծաթ փոդ:

Վերջապէս Տէր Յովակիմը փողով լիբը թաբախը ձեռին կրկին դասն է բարձրանում. նա պէտք է մատոււր մտնի և հաւաքած փողը կարմիր կնքամոմով կնքած մեծ արկղի վերեւի ծակից ներս գցէ. բայց հէնց որ նա մատուոն է մտնում, Տէր Խաչատուրն էլ նրա քամակիցն է մտնում, չկամենալով նրան մենակ թողնել այնտեղ:

Եւ ահա, վերեւի դասում՝ երկու տէրտէր արկղի ծակից մէջը թըխկ-թըխկ փոդ են գցում. ներքեւի դասում՝ տիրացու Միմօնը իր փողերի հաշիւն է տեսնում. իր սեղանի առաջ՝ Մարկոս աղան եկեղեցու, էջմիածնի, աղքատաց և որբոց համար հաւաքած փողերի հաշիւն է անում. ժամկոչ Մաթոսն էլ իր ընկեր-Գաբօյի հետ խցիկում նստած՝ գլխներն են քորում և իրանց քամբազը թաբախի միջից ժանգոտ կոպէկներ են դուրս բերում ու վրայ-վրայ զիզում, որպէս զի իրանց մէջ կիսեն:

Բողոքնց Չաքարը, որը էջմիածնի թաբախն էր ման ածում, հէնց որ թաբախը երեցփոխանին է յանձնում, իսկոյն եկեղեցուց դուրս է գալիս ու կորչում: Աղքատաց թաբախը ման ածող երեխան որբոց թաբախը ման ածողին մի կողմ է քաշում և ականջին փսփսում.

— Գէորգ, գիտես ինչ տեսայ.

— Ի՞նչ.

— Զաքարը թարախից փող զողացաւ.

— Վա՛հ...

— Աչքովս տեսայ. մի արծաթ փող կատի նման թաթովը մշտեց ու թևի մէջ դցեց:

— Վա՛յ, վա՛յ, վա՛յ... նրա հողին հըմի սեացաւ...

— Սեացաւ.

— Բաս, սեացաւ. Զաքարը դժոխք կրգնայ.

— Որ էդպէս ա՛ նրա հետ էլ ես չեմ խաղայ.

— Ես էլ չեմ խաղայ:

Պատարագը վերջանում է. լսելով որ հիւսիսային դրան մօտ մատաղ են բաժանելու՝ ժողովուրդը խոնարհ է այնտեղ. դառնում է սաստիկ նեղածը. մարդիկ միմեանց կողք են թակում, ոտներ են կոխոտում, կանանց շրջագրեստներն են պատառում, ամենքն էլ շտապում են դուրս գալ եկեղեցուց, որպէս զի մատաղամից անմաս չմնան: Փամկոչ Գաբօն, ձախ ձեռով մատաղ ուհացով լիքը տաշտը դրկած կանգնել է դրան մօտ. ով եկեղեցուց դուրս է գալիս՝ նա նրան հացի վրայ դրած մի կտոր մատաղ է տալիս: Բայց հողիւ տասը թիքա է նա կարողանում այդ կերպով բաժանել, որովհետև երեխաների և պատանիների մի խումբ թափուում է Գաբօյի վրայ,

խփում է նրա ոտներին ու ցած դցում. մատաղամիսը հացի թիքանների հետ թափուում է քարէ սանդուխի վրայ, դաշտն էլ զլորւում է ցած. Գաբօն հագիւ է կարողանում իր սեփական գլուխը դուրս բերել մարդկանց ոտների տակից: Ժողովուրդը իրար է անցնում. մեծ ու փոքր թափուում են մատաղամիսի վրայ. ով ինչքան կարողանում է ձեռք է դցում ու փախչում. իսկ ուշացողները մատաղամիսի միայն հոտը քթերի մէջ առած եկեղեցու բակից դուրս են գալիս:

Գաբօն դատարկ դաշտը շալակած վաղուց փախել, մատաղատուն է մտել, դռուն էլ ետևից կողպել: Բայց ահա Մաթոսը վազելով գալիս է և դուռը թակում. Գաբօն բաց է անում և նրանք երկսով մի ահազին սինիով մատաղամիս չորս ձեռների վրայ բռնած՝ տանում են այն սենեակը, որտեղ տէրտէր ու տիրացու պէտք է հաւաքեն և ուտեն:

Այն միջոցին՝ երբ ժողովուրդը եկեղեցու դրանը մէկմէկու դունչ էր թակում մի կտոր մատաղի համար՝ տէրտէրները, սենեակում հանգիստ բազմած, մատաղամիս էին անուշ անում: Տէր Խաչատուրը իր սիրած թիքաններից հինգտասը կտոր լաւ ուտելուց յետոյ բերանը սրբբում է ու վեր կենում. տիրացու Սիմօնն էլ է վեր կենում. նրանք երկսով մի հարուստ ծխա-

կանի մօտ են գնում, որպէս զի տօնը շնորհաւորեն. Տէր Խաչատրի գնալուց յետոյ միւսները սկսում են ազատ շունչ քաշել, ուտել, խօսել ու ծիծաղալ: Տէր Բարսամն ու Մահակ սարկաւազը փափուկ կտորներ են դիզում իրանց առաջ և ծանր ու բարակ ծամծամում: Տէր Յովակիմը իւզալի պատառներ է ջոկում, փիլիսոփայօրէն ամեն կողմից գննում է նրանց և յետոյ արագութեամբ բերանը կոխում. իսկ Տէր Մարուքէն ինչ թիքա էլ որ ձեռը ընկնի՝ իսկոյն բերանն է կոխում և ազահաբար ուտում. ժամանակ-ժամանակ նա շտապով Մաթոսի խցիկն է վազում, շիշը կըլկըլացնելով ումպ-ումպ արագ է խմում և կրկին վերադառնում դէպի մատաղամսի կոյտը. Մահակ սարկաւազը խղճուկ դէմքով մտիկ է տալիս նրա կարմրած երեսին, ան է քաշում ու սուսիկ-փուսիկ մատաղը ծամծամում: Մուխսի Բաղալն ու տիրացուններն էլ՝ մի-մի թիքա գալիս սեղանից վերցնում են և հեռուն կանգնած ուտում. իսկ ժամկոչ Մաթոսն ու Գարօն լրջօրէն մտիկ են տալիս հեռուից այդ բոլորին և ժամանակ-ժամանակ իրանց մէջ քչփշում:

Ամենից առաջ Տէր Մարուքէն է տեղից բարձրանում. Տէր Բարսամին դառնալով նա ասում է:

— Տէրտէր, վեր կաց, հերիք ա ինչքան ծամեցիր. գնանք տուն, մի քիչ էլ տանը կըծամես:

— Տօ, հէնց իմանաս պառաւ ոչխարի միս ըլի, ծամումեմ, ծամումեմ, ըսկի բան դուրս չի գալի, նկատում է Տէր Բարսամը խղճուկ ձայնով ու տեղից բարձրանում. նրանք երկսով միասին են դուրս գալիս եկեղեցուց: Մահակ սարկաւազը, իր առաջը դիզած մսի կոյտը քթի թաշկինակի մէջ փաթաթելով, գրպանն է դնում ու նոյնպէս դուրս գալիս: Տէր Յովակիմը, որը բոլոր ժամանակը մի տեղում նստած լուռ ու մունջ ուտում էր, զկրտալ է սկսում. նրա ստամոքսը դրանով իր բողոքն է յայտնում. Տէր Յովակիմը վերջին թիքան, որը ձեռումն էր բռնել, ետ է գցում, բայց զկրտոցը գնալով սաստկանում է. նա վեր է առնում բաժակով ջուրը և սկսում ումպ-ումպ նրանից խմել... բայց զկրտոցը չարագուշակ կերպարանք է ստանում. այդ նկատելով՝ Տէր Յովակիմը իսկոյն վեր է կենում տեղից, հագնում է վերարկուն, հիւսիսային դռնով դուրս է գալիս և մեծ-մեծ քայլերով շտապում դէպի տուն: Նոյն ճանապարհով դուրս է գալիս և մուխսի Բաղալը, մատաղատան դրան բանալին ձեռների մէջ խաղացնելով: Նրանից յետոյ ջահիլ տիրացուններն են դուրս գալիս, թղթի մէջ փաթաթած մատաղամսի թիքաները ձեռներին. եկեղեցու դրանը մնում են մի քանի մուրացիկներ, նրանց էլ Մաթոսն է բոթելով-բոթելով դուրս անում. ամբողջ

եկեղեցում մնում են միայն Մաթոսն ու Գարօն և սկսում պատրաստութիւն տեսնել, որպէս զի նրանք էլ վերջապէս, տէրտէրների նման հանգիստ հաստած, մատաղամիս ուտեն և Աստուած փառաբանեն: Գիշերապահ Մակիշը, թեի մէջ ինչ որ պահած, զգոյշ քայլերով եկեղեցու բակն է մըտնում, երկ-երկու աստիճան փոփոխելով արևմրտեան սանդուխով վեր է բարձրանում և ուղղակի մտնում Մաթոսի խցիկը. այնտեղ արդէն սեղանը պատրաստ է. մեծ ափսէով մատաղամիսը սեղանի մէջտեղն է դրած. նրա շուրջը դարսւած են՝ կանաչեղէնը, ոչխարի գլխի մի մասը—խաշած, թոքերը-խորոված, մի բուլիկ էլ մատաղապուր:

—Մակիշ, որտեղ ես կորել, կեր, խմի՛ր, քէֆ արա, բացագանչում է Մաթոսը նրան տեսնելով: Նրա աչքերը փայլում են, բերնից էլ արաղի հոտ է գալիս. Մակիշը այդ նկատում է և թեի միջից երկու շիշ արաղ հանում ու դնում սեղանի վրայ:

—Հոգիդ ուտեմ, Մակիշ, բղաւում է Մաթոսը, շիշերը տեսնելով. ցատքում է ու Մակիշի վզովը փաթաթւում: Գարօն այդ միջոցին անձայն քայլերով մօտենում է նրա ետեից և մի շիշ էլ արաղ ինքն է սեղանի վրայ դնում:

—Արի է, քեօփակ, բղաւում է Մաթոսը

շուռ գալով. բայց յանկարծ երրորդ շիշն էլ որ շի տեսնում՝ ա՛ա՛ա, օ՛օ՛օ բացագանչելով խլում է շիշը սեղանի վրայից և սկսում խցիկի մի անկիւնից միւսը գժի նման ցատքըտել ու տրտինգ տալ, շիշը երկու ձեռով գլխից բարձր բռնած...
—Մաթոս, եավաշ, շիշը կըջարդես, նկատում է Մակիշը:

Եւ հէնց այդ իսկ բոպէին շիշը զարնւում է քարէ պատին ու ջարդւում. արաղի կէսը թափւում է Մաթոսի գլխին. իսկ շիշի միւս մասը զգուշութեամբ բերնին մօտեցնելով՝ նա բոլոր արաղը մի շնչով խմում է.

—Տօ, մեզ բան չթողեցիր, բացագանչում է Գարօն անհանգիստ ձայնով.

—Օխայ, այ ափսոս, կէսը թափաւ, շշնչում է Մաթոսը խորը շունչ քաշելով և արխալուղի փէշովը բերանը սրբելով. նրա երեսը իսկոյն կարմրում է ինչպէս եփած խեցգետին:

—Տօ, եկէք է, էս մատաղը ո՞ւմ համար ա ախար, ասում է Մակիշը. նա արդէն բաց է արել արաղի շիշերը, երկու թաս խմել է, մատաղիցն էլ է կերել և այժմ ոչխարի ծնոտն է կըրծոտում.

—Մենք երկու անգամ կերել ենք էլ, խմել ենք էլ, Մակիշ, արխային կաց, էլի կուտենք էլ, կըխմենք էլ... ասում է Մաթոսը, կանգնած տե-

դում ճօճանակի նման տատանւելով: Նրա ձայնը շատ քաղցր է դուրս գալիս փորիցը, շիւ աչքը մի բանով, կարծես, սաստիկ է գմայլած: Վերջապէս նրանք երեքով նստում են և նորից ըսկրսում ուտել և խմել...

—Տղէրք, բղաւում է Մաթոսը, վերջին լիքը բաժակը ձեռին բռնած.— էս էլ խմենք մեր երեքի կենացը. Ասուած մեզ առողջ պահէ. մեռելը բժլ ըլի, կնունքը բժլ ըլի, մատաղը բժճլ ըլի... դրնւտ եմ ասում.

—Գրուստ ան, բացականչում է Մակիչը, երկու ձեռները եզան պոզերի նման ականջների մօտ բռնած.

—Քեօփակ, չես լսում, դառնում է Մաթոսը Գարօյին:

Բայց Գարօն նրան չի լսում. երկու ձեռներով աթոռի թիկունքը գրկած, խիարած և գլուխն էլ ձախ ուսին թեքած, մեղմ ձայնով նա իր քէֆի համար հան երգում է.

«Թող սև ըլի, բճլ ըլի,

«Թող տաք ըլի, բճլ ըլի»...

Վ Ե Ր Ջ



ՀՀ Ազգային գրադարան



NL0323873 //

28.133